


聞見
述奇



海上醉花生葉珊氏著

聞見述奇

文明進行社出版

自序

希世苟合之士，蓬蔕戚施之徒，俛仰尊貴之顏，逶迤勢利之場，意無是非，讚之如流言，無可否應之如響。踰踰諂夫，誠恥之也。僕有鑒於斯，而視儕輩之類，是者亦不禁笑目存之，嘗讀魯論夫子之言曰：天下有道，則見無道則隱。生當叔季，自安於貧且賤焉可耳。且夫排巢父，拉許由，微百世蔑王侯，臨世濯足，希古振纓，逍遙乎山林之阿，放曠乎人間之世，偃息不過茅屋茂林之下，談話不過農夫田父之客，豈必親魚鳥，樂林草哉？日月逝矣，歲不我與，引壺觴以自酌，塊壘頻澆，結翰墨之因緣，見聞可述，非敢有所作也。第就耳目之所及者，賞其奇而筆之於書，昔

太歲在玄默，困敦清和夏始，海上醉花生，琴珊氏自序於味閒居斗室之中。

序
文



聞見述奇目錄

卷之一

湯城隍

黃七姑娘

才妓

祝由科

騙術

再生緣

妒婦

李鬍子

鎖喉鬚

苗大姑

廉令女

老蚌生珠

丹公

邱缺鼻

女變男

吳子姜

福來雙桂

鬼乾

月下老人

見色忘身

吳某

畫中燈

守錢奴

卷之二

保定婦人
一錢致富
當人頭
行脚僧
新豐令
淘井得官
大寶
郡守女
九江公子
盜改行
糊塗廟
木蘭祠
靈光

城隍充軍
金瓦
少年大力
測字者
熊生奇遇
巧對
興邑狡婦
賢主嘉賓
舟人
人圈
小脚會
韓女
借尸還魂

卷之三

野人頭

方俊官

朱大圭

童子索命

燒火三相公

錢相國

張大美

拾金不昧

非非子

封仙

卷之四

王廉使

兵差奪船

三脚女

佟阿寶

妖異

許阿妹

老夫女妻

藏魂罈

恒山學博

林秀

盜婦留情

義牛塚

魚怪

信石活人

鍾俊

陳制軍

陸都閫

朝鮮王子

朱衣點額

太平父母

結實頭皮

何首烏

相士神斷

重義輕財

蛇妖

李綠芸

菊隱山莊

汪百萬

標客女

妾爲妻

老丐遇騙

繩伎

女陳平

奔牛司巡檢

易筋經

翁吞壻銀

轉女爲男

飛車

湖市

陸學海

魯澄軒

聞見述奇卷之一

海上醉花生琴珊氏述

湯城隍

乍浦有饗人子湯姓者。無名人。皆以湯大呼之。賣餠爲業。出言狂悖。似瘋非瘋。有時作拱立狀。云是某神過。有時若舉手爲禮者。云是某神謁我也。迨道光十三年。忽語人曰。吾於某日將死。獨老母在。奈何。旣又語人曰。幸矣。吾死卽爲此地城隍神。老母當不至飢寒也。且謂其母曰。吾死。慎毋以尋常衣服殮。須如廟中城隍神一式。吾家貧。以紙爲之可也。棺勿停家中。可舁至某處山上。母以爲妄。而湯乃數數言之不已。至期晨起。卽跪母前。哭而言別。且伸前約。然爾時尙無恙也。俄而曰。時至矣。遽然入戶而寢。久之不起。視之果死。於是鄉人競至。勸母從其言。母乃如其言。殮之。并舁其棺厝某處山上。而其爲神與否。不可知也。居無何。有自遠方來者。逢人輒問湯城隍廟。人皆答以不知。適有鄰人在傍。聞之。詫曰。得無卽湯大乎。乃曰。吾處有湯城隍。而無廟。遂導至其家。有木主存焉。其人曰。是也。吾家中有病人。夢至此處。果惟敗屋數椽而已。犧牲酒醴。致祭而

去。由是傳聞遠近。禱病者。踵乎其門。皆如響。應遂相率。醵金塑像。且新其室。禱者日衆。室不能容。因構敞於室之外。已而香火益盛。并廠亦不能容矣。乃共爲之立廟。湯之母。人爭奉養。以終其身。湯之瘞棺處。雖遇大雪。無寸雪之積焉。是亦奇已。

丹公

四川之巴東。有名丹公者。能以符咒爲人治病。而不計較酬謝。貧家僅須青蚨四十二枚。其富家大族。遇危險之症。亦增至四千二百文而止。過此卽多一錢。亦必敲門送回。湖州沈某。商於巴東。因家焉。某年爨下婢持斧劈柴。誤斷其臂。痛極而撲。命之不絕者如縷。因延丹公治之。丹公初亦不敢直任。第屬多市香燭。供之堂中。親自拜禱。拜畢。忽謂主人沈某曰。婢尙可活。君其無憂。但須用開天門法耳。開天門者。於彼法爲最靈。然必萬不得已。而始用之者也。乃取清水半甌。以利刃自劈其頭。血泔泔下。注於甌。甌滿而血亦止。卽戟手畫符其中。取斷臂浸少許時。命人舁婢於牀。以臂續之。口噙血水。噴婢身。幾徧。有餘灌婢口中。令其徐徐嚥下。并覆以布衾。屬三日勿啓視。迨至三日。婢忽欠伸起臂。竟屈伸如故。視之略無斷續痕。又某姓家一傭工人。口銜淡巴菰筒。長僅尺許。忽然失足。跌撲於地。筒自腦後穿出。命亦在呼吸間。急延丹公至。丹公視之。笑曰無

妨取水畫符。就患處噴之。徐以手出其筒。約一時許。而傭已蘇。問之。了無所苦。此豈漢末張衡輩之遺法。猶有存焉者歟。不然。何其術之神也。嘉慶間。川督琦善。怒丹公之妖妄。捕數十。丹公至。將置之法。又詰得其師在某山中。尅期往捕之。是日晚起。忽於案頭得一箋云。吾以符治病。於人有益無損。且此法自漢以來。相傳不絕。有何得罪國家。而乃械繫吾諸弟子。今并聞將來捕我。我勸汝不來爲妙。來則恐不免有小驚嚇也。琦督見箋愈怒。其屬員有諫止之者。黜勿聽。親自率衆而往。舟行萬山中。溪路愈進愈窄。未至其山數十里。忽回顧來處之山。漸漸移合。急令回舟。則已無路可出。琦督不得已。正冠攝衣。至船頭頓首遙祝之。乃得返舟。自此遂不敢復禁丹公之治病矣。

黃七姑娘

六合鄉人陳柏傭。於某典肆中。一日。偶登後樓洒掃。見一麗者坐檐上。心知其非人。豔其姿。屢目之。迨晚事畢。歸至臥所。將就枕。忽見麗者推扉入。云。愛郎誠慤。故願委身。詰其姓氏。則曰黃姓。行七。儕輩皆以黃七姑娘呼之。綢繆繾綣。歡洽異常。由是往來無間。久之。柏乃精神恍惚。日就羸瘠。典中知之。召其家族領回。而女亦隨之而去。柏之父憤其子之被祟也。一日醉後。持義入其室。亂搗之。突一黃鼠狼貫腹死。室中大嚷。謂搗其

姪死。從此崇大作。火或焚於窗。飯或投於穢。會張真人至揚州。陳柏之父。乃往具牒焉。真人予以二符。一粘室中。一焚戶外。是晚寂然。咸相慶。以爲果被真人收去矣。而柏自是亦真氣漸復。出而備於儀徵。一典中。閱三年。女又至。索之家不得。遂至儀真。相從。柏由是復回家。問其何以能復。至。則曰。真人符。第靈二年耳。三年後不復靈矣。且我又未嘗傷人。真人亦不能以法死我也。女自再至。後頗安靜。不復爲祟。陳父母亦相與安之。陳家故貧。迨至。是以柏坐食益窘。女時小有周給。由是仇女者轉而德女。又數年。忽別柏去。云將之蘇州。留之不可。而陳家遂致飢寒。無何。柏亦有蘇州之行。於皋橋。見一肩輿過。謂是鉅家眷屬也。比近。忽攀簾。問曰。若非陳某耶。何藍縷至此。視之女也。愬以故。相對歔歔。女曰。無憂。某日汝再至此。吾當小有助汝。屆期往。則有人以五十金相贈。柏乃持金歸。六合。益思女不置。而女不數月。亦至。問之。則云在蘇州爲一富家妾。前之所贈。乃轉乞之主翁者也。女自三至柏家後。益老成。終日居一樓間。爲人談咎。頗驗。又兼爲人治病。求之者填戶。柏藉其資。得以小康。亦肯與人相見。好事者竭誠而往。然第見其下半截。繡裙蓮。不覩全身也。休寧有汪姓。字菊泉者。年四十無子。往叩之。空中擲下五棗。以意測之。當可免伯道憂矣。嗣果得丈夫子五人。又休寧某姓。以媳病往問。

吉凶。約以三日後再至。比至則柏轉述其言曰。七姑娘已親至君家探視。汝媳之病無妨。并言其門經及媳之臥房。悉合。而柏並未嘗至徽者也。餘事尙多。不能悉誌。七姑娘竟與陳柏偕老。是殆真有夙緣者歟。

邱缺鼻

武進南門外教場中。一男子被人謀殺。邑令陰畢。弔苦主至縣。詢以死者何事。進城。因悉其人家有養媳。將以除夜成婚。先期進城。製備喜事。所需諸物。身邊帶番蚨數十枚。趁晚歸家。不圖中途忽遭此危也。教場地僻。四無居人。武進令遣役四出偵探。迄未得凶手主名。入春後。府尊提案。躬自研訊。并遣陽湖捕役協緝。而毫無端緒。維而念陽湖捕役不足恃。密往江陰。弔捕役六人至。召入私室。厚賞之。而語以故。捕請予半月限。許之城隍兩廡所塑土偶。有名邱缺鼻者。陰役之最靈者也。捕出市香燭。至城隍廟禱之。夜卽臥於廡下。夢缺鼻告以吃狗肉三字。醒而思之。吃狗肉者。乞丐之所爲也。教場中有閱武廳。羣丐棲身之地也。神以此三字示我。得非欲我等於乞丐中求之乎。次日共易敝衣。市一狗。并酒一瓶。携至閱武廳煨而食之。俄有數丐至。延與共食。相對甚歡。次日益多。市酒脯。而丐之來者益衆。數日後。彼此浹洽。披肝瀝胆。畧無隱諱。一捕乃於醉

後佯告曰。我輩以乞爲名耳。若專效伍大夫吹簫故事。何處得如許錢供醉飽。一捕鼓掌和之曰。誠然。吾輩初來。苦無大得手處。否則大肉肥魚。不妨與爾等夜夜酣歌達旦矣。一捕掀髯起曰。君自來遲。失一好機會耳。如早來此。則去冬某人所齎婚費。何至盡裝入他人橐乎。言未已。一丐在旁微笑。捕卽飛一觴至曰。爾笑有因。得毋某人事爾爲之乎。果爾亦可謂能事人也。丐曰。我何能爲。但幸得少分其所有耳。諸捕聞此喜甚。然恐機洩。致此丐遠颺。亂以他語而罷。次日入署告知府尊。并請傍晚來捕此丐。至晚諸捕復與丐轟飲。捕志突至。鎖此丐去。府尊升堂鞠之。初猶不承。而諸捕已易衣出告之曰。昨晚爾言云何。願不實言之。乃甘受公堂刑法耶。丐乃俯首曰。事誠有之。去冬我獨臥閱武廳。見數人共斃一人。而搜括其身邊所有。以其係武進捕快。不敢聲張。事畢潛尾其後。伊等欲滅我口。遙擲英蚨一枚與我。我實未與同謀也。府尊立捕武進捕快。至一訊咸伏。乃抵之法。卽丐亦從末滅。而厚賞江陰諸捕。諸捕領賞。遂往城隍廟演劇。酬謝邱缺鼻而去。邱缺鼻之爲靈。眞昭昭哉。

才妓

高陽某生。舊家子也。少孤。家業甚豐。以委託非人。乾沒折閱。銷耗垂盡。及生長知事。年

少負氣奮欲恢復舊業。遂將存產盡行鬻變。作孤注。得二萬金。服買遊吳。計反掌間。可與陶倚墻富。時吳下有名姬仙露者。年甫破瓜。豔聲鼎盛。生方喪耦。耳姬名。姑具贄往訪。一見目成。兩情相洽。酒闌燈灺。遂留髡焉。枕席綢繆。各吐衷曲。割臂締盟。矢以嫁娶。自是無日不往。未及一年。腰纏漸絀。難厭媪欲。頓遭白眼。生將負衣貸馬。以供纏頭之資。姬微聞之。謂生曰。君以尋常狹邪視兒耶。則已。如以伉儷視兒。則宜早爲之計。大抵平康中生活有資。卽事趨承。雖富有銅山。亦不能填無底之壑。日來偵君囊橐告匱。微聞變質衣物。殊非長策。且過此以往。又將何如。生沉思久之。答曰。小生所謂得過且過。倘過此以往。計無所之。拚一死以殉知己。姬聞之。凄然泣曰。果爾。則君之計亦左矣。君如實心愛妾。彼此不妨熟商。搗所欲者貨財耳。君自去年到此。耗費已復不少。况爾我白首之約。方君盛時。媪曾極口許諾。君試申前說。料亦不至十分苛求。得聞第往探之。需價多少。君如不足。妾薄有私蓄。當以相助。商計已定。越日生果如言詢媪。且謂嫁娶之約。媪所親許。言猶在耳。實所共聞。小生久客當歸。理宜不背前盟。聘資若干。合當如命。敢以爲請。媪微冷笑。揚目答曰。所說誠然。然自妮子入門。老婦教養。亦頗不易。今欲脫籍。其身價在他人。必得千金。念公子平日伉爽。願減其半。如有五百金。卽惟命是

聽。否則莫怪老婦不情也。生唯唯。退以告姬。姬問生能得幾何。曰：變鬻衣物，可得二百金。姬曰：若此易矣。君速去措辦。俾事早諧。遲恐生變。生急慘淡經營。姬亦爲之傾篋。倒篋。湊合如數。携以獻媪。媪初意以爲生已資斧竭蹶。五百金非生所能猝辦。今竟如數交付。得難反齒。不得已納金署券。乃盡襦去姬之衣裙首飾。僅存和袴。遂今隨生速去。時方暮春。天氣薄寒。姬再三哀求。給一舊絮布襖。聊以禦寒。媪始諾之。生遂攜姬至旅舍。檢理行裝。所存無幾。資短途長。莫知所措。逆旅主人憐兩人荏弱。慨贈白金一流。甫得成行。半肩行李。生自負荷之。姬乃亂頭粗服。徒步相從。一日祇行十餘里。不及旅店。輒寄人檐下。或宿古刹。以爲常。經秋始至齊境。斧資不給。會陰雨連綿。泥淖難行。足趾皸破。血流濡襪。脫以示生。生歎曰：小生飄泊窮途。孽所自取。固無尤怨。累卿憔悴若此。於心何忍。姬曰：是何言也。妾從君時。早知必有今日。人特患無志氣耳。吃苦何足患哉。君傾產出賈。爲恢復前業也。今舊業未復。產資蕩盡。攜妾而歸。立錫無地。其能免鄰里鄉黨所姍笑乎。生曰：然則奈何。姬曰：妾意小作貿易。較跋涉長途爲安逸。或冀少得什之一利。亦可聊以解嘲。還見故鄉父老。君以爲何如。生曰：卿言良是。願何從得資。姬曰：容妾圖之。詰旦笑脫左履。出珠一顆。大如發粟。付生入市。售得五十金。遂稅屋三椽。操

業雜貨。與姬共作苦。約計半年。食用粗給。姬笑問生曰。君業此不厭手。生曰。以今視昨。較僕僕奔馳棲皇無定。相去已不啻天淵矣。何厭爲。姬曰。固然。但所操太狹。必稍擴充。而潤色之。方可生曰。談何容易。姬笑脫右履。又出一珠。其大如前。付生售之。價亦相等。遂兼售米醯鹽醬等類。日有生色。不半年。漸蓄備媪。生日操會計。夜擁麗人。自以爲人生之樂如是已足。一日。姬忽問生曰。君將浮沉於此。以終身耶。抑尙有他志耶。曰。小生得隴不敢望蜀矣。曰。敢問賈與仕孰優。曰。賈不如仕。又何待言。曰。若然。君何棄不賈而仕。曰。卿僨也。耶。明知小生讀書未成。從何求仕。曰。妾聞司馬文園尙不以資郎爲恥。豈古之循良吏。皆由科目起家耶。君如有志仕進。曷不納資以求之。生不覺失笑曰。卿益復囁語。些些薄資。僅敷餬口。那有多資可納。姬正色曰。君果欲仕。妾自能設法。曰。將如何。曰。君欲何仕之求。曰。佐貳可乎。姬搖首嗤之曰。何其卑也。曰。亟丞牧令可乎。曰。未也。盍再等而上之。曰。意者其爲郡守乎。曰。如斯差可。萬不得已。亦必須如此。庶可稍展妾志。生問何法之設。姬笑指舊所着布絮襖。謂之曰。妾簪之已熟。此中所藏。不止一郡守之資。其餘可留作資斧。無俟他求也。以兩儀刀折之。中綴明珠不下三千顆。次第鬻之。共得五萬餘金。遂罷買。趣生赴部納資。銓得粵東太守。指日挈眷之任。時濱海州郡。

所在患盜。行旅苦之。姬謂居官。當首先爲民除害。因囑生檄所部各邑。嚴行緝捕。又出多資。遍募健兒。散布津隘。以備偵訪。連獲劇魁百數十人。悉置之法。盜蹤頓戢。水陸慄。遠近頌之。姬固拊曉文義。自生之官。凡催科撫字。聽訟察吏。事無大小。皆決於姬。庶務畢理。生惟優游素餐。坐享其成而已。三年政成。受上考。擢浙東觀察使。尋遷浙臬。前後不及十年。開藩吳下。以千金謝逆旅主人。適焉媼之夫。爲怨者所管。株連繫獄。媼僞爲賣珠寶者。夤緣入署。求姬爲道。伏地見姬。攢珠簇翠。華絰坐七寶牀上。容光四照。較前尤爲豐美。麗婢數輩。環侍承命。媼膝行匍匐而入。伏地不敢仰視。叩稱老婢死罪。當日不識貴人。過於計較。乞賜恕宥。乃泣白所求。姬鮮腆欠伸。微哂曰。阿媽休矣。瀕行時。幸叨布襖之惠。不致凍餒。填溝壑。念此一點香火情。容與官人謀之。聯以報德。且藉以補身價五百金。免使阿媽齒冷。媼汗流淫面。稽顙有聲。姬揮令去。與生言之。不日卽出其夫於獄。後生督至豫。撫嚮用方殷。蒞豫甫半載。姬笑謂生曰。以君之才。何能獨當一面。語云。駑馬戀棧。久必蹶蹇。不如避位。免譏覆餗。且人貴知足。大丈夫而能如是。是亦足矣。何必畫蛇添足耶。生從其言。遂疏乞罷歸。姬封夫人。年尙未及四十。望之如二十許麗人。生二子一女。二子讀書。均成進士。一入部曹。一入詞館。富貴甲於一鄉。姬勸生

力行善事。培養英才。周恤窮乏。創設義塾義倉。仿范文正公條定章程。刊碑以垂久遠。鄉人至今猶稱頌不衰云。

女變男

江浦吳解元家楣有女。年已及笄。字同里中表親某姓子。于歸有日矣。一夕忽覺下體腫痛。臥不能興。翌晨以手捫之。駭甚。覺垂纒盈掬。已成偉男。父因告諸婿家。堅不肯信。甚至結訟。經官飭官媒探驗後。始釋然。予譜兄曹君保生曾親見之。以保生嗣祖海珊公。與解元交契。攜與偕來。時年已及壯。且娶妻生子。已多年矣。並言兩耳尙有環孔。兩足纖細。不能納履。終年俱着吉英靴中。實以棉絮云。予聞而異之。謂非有大陰德。不能致是。及聞解元家近江岸。行人來往。苦不得渡。解元乃首先創捐於兩岸。各置舟楫。創設義渡。永占利涉。萬口交稱。時解元年已垂老。殊苦無子。一旦化雌爲雄。可見天之報施善人。真不爽也。

祝由科

湖北以祝由科治病。相沿已久。鄭竹虛云。烏鎮嚴某爲漢口鎮別駕。一女患喉風。有言祝由科能治之者。嚴惡其左道。不欲令其入署。未之許也。已而女病頗殆。諸醫束手無

策不得已。延一祝由科至。問以能治否。曰能。問若何治法。則但請於女房門上挂一簾子。而令女在簾內。其人持水一甌。齎符其上。於簾外喃喃持咒語。呪畢。舉甌一飲而盡。出立庭中。大吐。當其吐時。女於簾內亦大吐。比吐畢。而女之病遂若失矣。嚴大喜。厚贈之。而去。術之神若此。是亦非無補於人者。特其不能過江。則又不知何說也。

吳子姜

新城吳子姜。庚子孝廉也。獲隄後。有事於浙湖之孝豐。肩輿而行。迷失道塗。入亂山中。崎嶇曲折。杳無人煙。而日已將暮。執樵者問之。須再行數十里。方有村鎮。而吳既懼虎。狼。又虞盜賊。遂謀借宿於山家。行數里。忽見山坳中。露草屋數椽。吳大喜。下輿自往。叩門。俄一人出見吳。趨承甚恭。迨聞吳欲借宿。則曰。敝廬湫隘。不足以辱從者。離此不遠。有郎姓者。富而好禮。我請爲君先容。君其乘輿。緩至。吳諾之。未半路。有道人迓於塗。則郎姓者所遣也。比至。已上燈矣。寒暄甫畢。殺核紛陳。備極豐腴。時浙西山中。無處無棚。民所爲多不法事。吳頗滋疑懼。勸之食。不食。勸之飲。不飲。郎姓者似已覺之。曰。君何疑乎。深山固無王化。設吾將行。不利於君。豈以君之不食而遂免乎。吳覺其言良。是遂大飲啖。既而曰。我倉猝客。君倉猝主人也。何以能叱嗟立辦若是。郎姓者曰。俟明日爲君

言之因導之歸寢。則屋宇雅潔。枕衾華美。吳終懷疑不釋。竟夕不能成寐。明晨將辭而行。郎姓者曰。君既來此。安得便行。至少須作平原十日留。吳苦辭以有事。遂請遲至飯後。少頃忽見二婦盛妝。手攜一幼子。出向吳展拜。拜畢。卽翻然入。吳愈疑其所爲。郎姓者乃曰。今請告君以釋君之疑。君之來也。我於三日前已知之矣。頃之出拜者。予妻及妾也。妻初入門。卽爲狐據。不得已而置妾。甫生一子。又爲狐據。百計驅之。不能去。數月前。夢一古衣冠者曰。汝欲驅狐。須俟新城吳孝廉來。三日前。又夢曰。驅狐者行。卽至矣。此我所以治具以待也。昨君至。而狐不來。則我夢驗矣。第恐君去。而狐復來。故欲留君多住幾日。今君旣不可留。我欲以幼子繼君膝下。結此一重緣。庶狐或以憚君者。兼憚我乎。吳欣然允諾。因再呼其幼子出見。而并命以名。自是兩家恒如親戚往來。而郎姓家之狐患。竟從此而絕。噫。異矣。

騙術

休甯有江右會館。歙縣某甲。遇江右人。於會館中。自言能以視由科治病。某甲適因風氣發於臂。遂袒臂以示之。曰。此可治乎。曰。可。問所須何物。曰。水一甌。金數兩足矣。某甲曰。我未帶金。奈何。曰。卽君臂上金條脫可也。某甲欣然脫以付之。其人持甌索水。至以

金條脫置其中。封之以紙。戟手畫符其上。口中喃喃誦咒。語畢。告某甲曰。君攜歸供潔淨處。十日後。吾來爲君治之。終身不復發矣。某甲歸而待之。十日不至。始訝其失信。然以金條脫已携歸。尙不疑其有他意。又待數日。而其人杳然。乃令人至會館偵之。則已於數日作黃鶴舉。急啓甌視之。則金條脫亦如銀杯羽化矣。噫。大盜不操戈矛。竟有如此神出鬼沒之技。信乎入世者之不可不防也。

福來雙桂

前明天啓中。魏忠賢殺裕妃。凡裕妃位下。內監宮女。皆密捕送東廠。其死甚慘。有二內監。一曰福來。年二十五。六。一曰雙桂。年二十三。四。亡命逃匿。緣與某生曾相識。時某生方商於京師。夤夜往投。某生納之。引入密室。某生之僕。穴隙私窺。稔知其事。見二人覈觫求計。某生語二人曰。君等聲音笑貌。在可男可女之間。若一出奔。必致見獲。緣與常人稍異耳。若能改作女裝。則物色不及。然兩無夫之婦。寄宿人家。形迹可疑。亦恐敗露。况二君之身已淨。本無異於婦人。如肯屈意爲我妻妾。則萬無一失矣。且我又喪耦。已生有一子一女。君等爲我撫育成人。我亦無事再娶。二人正在進退無計。一聞生言。並皆首肯。翌日生諄囑其僕勿洩。僕亦深知利害。誓不妄言。亟爲二人置辦女飾。遂三把

梳頭兩截衣裙鉗其耳漸可受珥併市軟骨藥陰爲纏足將腳趾攔尖襯墊高底裹以繡烏窄窄弓鞋不盈五寸閱數月改換形容居然娟好兩婦矣於是福來爲妻雙桂爲妾乃車載還家詭言在京所娶二人久在宮禁並白皙溫雅無一毫男子狀且施朱敷粉加意修飾儼宮女之所爲生又寵愛異常二人亦愛惜子女鄉黨戚里交羨生之得此豔妻美妾竟無覺其事者但訝其不事操作不理女紅爲恃寵驕惰耳二人感生再造之恩故裕妃事定後亦願作女妝且甘心與生偕老生亦寵愛不衰至清朝順治年間某生與妻先後卒越三四年其妾亦卒適生家中之傭工人夜行避雨宿東嶽祠廊下似夢非夢見某生荷校立庭前妻妾隨焉有神衣冠類城隍磬折對嶽神語曰某生活二人有罪活二命亦有功合相抵嶽神哂然曰二人畏死忍恥尙可貸某生活二人正爲欲污二人但宜科罪何云功罪相抵也某生聞之悸不敢語妻妾二人匍匐而前崩角稽首曰非生之威逼巧脅實因淨身之故苟全性命自願順從乞寬生罪我二人代之以報生前之恩嶽神見二人哀求不已顏稍霽因語城隍赦生罪並妻妾二人亦宥之乃揮之出天曙傭工人歸告家人皆莫能解有老僕泣曰異哉吾主人幾以此事被錄乎幸兩主母賢主人得寬其罪此事惟我父子知之緣受恩深重誓不敢洩今已

隔兩朝。始敢追述其事。兩主母皆非婦人。實明代宮中之兩內監也。遂將改裝之。故縷晰言之。

再生緣

貴州某孝廉述一奇事云。其鄉民某姓家生一子。甫能言。卽與人云。我前生某氏之女。某氏之妻。夫名某某。吾卒時。夫年若干歲。今年當若干歲。所居之地。距民家四五日程耳。此語傳聞漸徧。其故夫知有是說。徑來尋問。其時鄉人子已十四五歲矣。彼此相見。涕泗洟瀾。細述前生事。一一相符。是夕竟抱被同寢。其母不能禁疑。而竊聽滅燭以後。已妮妮兒女語。竟成燕婉之好矣。母怒。逐其故夫。此子憤悒不食。其故夫亦棲遲旅舍。不肯行。一日防範偶疎。竟相偕遁去。母惡其忤己。且生有多子。亦不跟尋。閱五六年。有知其事者云。其故夫家本小康。偕某氏子遁至中途。於隱僻處。某氏子願作女裝。仍爲夫婦。故夫許之。遂爲之購置衣飾。蓄髮貫耳。併將兩足纏裹。抵家後。自認是女。其故夫亦諱言爲男。與同寢處。儼然夫婦。恩愛之情。較前生尤甚。家中傭媪。亦以主母稱之。前生子女各一。均已長大。愛之仍如己出。並習女紅。凡粉奩脂盒。釵珥裙襖。亦未遺忘。見有未穿繡履。祇四寸餘長。自顧雙足。有六七寸長。不禁潛然泣下。恨不能穿。因將兩脚

狠狠纏裹。故夫廉得其情。急爲之購置高底。勸勿緊纏。然脚趾亦已爛尖。墊以高底。舊時繡履。居然好穿。始破涕爲笑。不三年。雲髮堆鴉。蓮鈎瘦削。雖非眞足。裹以繡烏。毫無痕迹。而且態度輕盈。容止亦不粗俗。鮮有人知其爲男者。惟彼處鄉人。以年歲推測之。斷爲此子無疑。異哉其事。古所未聞也。此謂發乎情。而不止乎禮義。

鬼乾

某鄉婦夫死再醮。不數年忽患重疾。醫藥妄效。急延女巫看治。俗所謂看香頭。又名師娘。師娘觀病人良久。謂是前夫纏擾。恐致不起。無已。俟鬼來時。悄然捉之。蒸熟炙灰。而食。病自霍然。衆皆曰可。師娘乃狙伏於內。頃之。其鬼果來。師娘急命多人手執刀杖。四圍守護。口中念念有詞。兩手向空亂攪曰。此鬼抑何凶頑乎。竟鑽入床下矣。因亦倒身入床下曰。在此矣。但聞鬼聲不絕。師娘曰。爾尙敢罵人乎。遂索一瓶。以鬼置諸瓶中。用符籙封其瓶口。釜中注水。灶下抽薪。將瓶入沸湯中。壓以鐵器。鬼聲啾啾大作。炊半時許。始寂然無聲。揭其瓶而視之。長不盈尺。耳目手足皆備。亦有髮辮。色黝黑。果具人形。遂以鬼乾炙灰研成細末。與病婦沖酒服之。病果霍然而愈。此予家所僱僕婦曾親見之。故述之甚詳。

妒婦

河間縣令趙某。陝西人。妻死。納妾。生有子女。旋又續娶洞庭山席氏。年僅二十餘。性妒甚。趙不能制。乃令其妾率子女。出而寄居於分府談某署中。甲辰正月。趙以賀大憲。年至保陽。席氏乃遣人以甘言誘其妾曰。向吾不汝容。此吾之過也。今細思之。汝子。卽吾子也。汝女。卽吾女也。願及出居他處。微特外觀不雅。抑恐於夫。子官聲有碍。汝何不攜子女。而仍與吾同居乎。妾商之人。咸勸之歸。乃假賀年爲名。乘輿至署。以探其意之誠否。席氏留之飲。而密置毒於酒中。妾見酒有異。一爵之後。堅不肯飲。席氏乃離座。僞爲視其簪珥也者。突取鑷旁鉄條。猛擊之。碎其首。延至晚間而死。河間府知之。委員檢驗。通詳大憲。直督提案至省。其署中人。乃勸席氏曰。太太此去。恐無望生還矣。與其入獄而受諸若惱。何不先尋自盡乎。席氏哂曰。吾讀律有年。妻致妾於死。無抵理。何患焉。盛妝晉省。大憲委保定府鞠之。猶執前說。曉曉不已。府憲曰。汝誤矣。此指誤殺而言。今汝有意致妾於死。尙望幸邀寬典耶。乃褫其盛服。易以布衣。俾令入獄。席氏乃悔其讀律之未精。然已無及矣。趙令以治家不嚴。落職。席氏繫保定獄。後亦照律抵罪。

月下老人

晉時有書生韋固。遇一老人。於月下檢書。固前揖之。問是何書。老人答曰。批主天下婚姻之書也。固問吾妻安在。老人曰。君婦三歲。居某處。賣菜。陳媪女也。明日固尋蹤而往。視女甚陋。使奴刺女。中眉。後十四年。相州刺史王泰。妻以女。眉間當貼花鈿。固問之。女曰。妾郡守之姪女也。父終宋城宰。襁褓時。乳母鬻蔬以給。爲賊所刺。故痕尙在耳。固心知之而不言。竊歎婚姻之自有定數。不能強爲也。

李鬚子

觀城李鬚子者。綠林中之豪客也。膂力過人。出沒青萊間。垂四十年。無人知之也。一日至登州。憩古寺中。聞殿後猜權聲。跡之見偉丈夫八人。席地飲。李識爲同道。與之拱手。八人者起而揖之。坐各述其姓名居址。酒數行。上坐者曰。吾觀公亦行道者。今將何之。李曰。敬步後塵耳。曰。今臨淄某尙書家嫁女。奩資豐腆。而尙書供職都中。第公子偕其妹歸。僕從無多也。公能助我一臂乎。李曰。可。於是與羣盜尅期抵臨淄境。居數日。始悉其門徑。乘夜踰垣入。公子問盜啓戶。出呼羣僕。爲一盜所繫。將加刃焉。李曰。吾利其物耳。何戕其人爲。乃釋之。女公子美姿色。羣盜欲淫之。李呼曰。我李鬚子縱橫四十年。所以得保首領者。惟不採花耳。諸公聽我言。請從此逝。否則血我刃。勿謂我無香火情也。

羣盜畏其猛一闕而散。詰且訴之宰。遣捕出緝。半載無踪。諸捕悉被重責。計無可施。乃給宰曰。某某者。邑之名捕也。今雖老猶矍鑠。請召而遣之。其實二捕并無過人技。且衰朽已甚。退役久矣。宰召之。并與白金五十兩。限一月破案。二捕出。乃交相歎曰。死期至矣。爲之奈何。其一曰。三十六着。走爲上著。不如逃之。遂携銀去。行經觀城。見一白鬚老者。携壺酒。獨酌柳樹下。二捕乞就席少憩。老者諾之。問其行止。二捕縷述尙書家事。今奉命出緝。未獲也。曰。可獲乎。曰。不可。曰。然則二公何往也。曰。逃死耳。老者掀髯笑曰。盜非他。卽我是也。今旣相遇。曷敢以此累公。第我爲此事。雖家中人亦不知也。公等幸勿聲張。驚我鄰里。遂自述其姓名。并延至其家。命子出拜曰。此吾老友。邀我作臨淄游。詰且當束裝也。遂偕二捕行。旣抵臨淄。宰乃大喜。卽報知尙書家。其時女公子已出閣。適歸母家。恍惚憶羣盜入室時。保全其節者。爲李鬚子。亟告知公子。公子亦憶及被執時。遇一長髯者。呵止羣盜。得免於死。急謁邑宰。緬述其事。囑勿加刑。宰亦高其義。第按名捕獲。八人。悉是真盜。駢戮于市。而李鬚子乃得釋。公子感其保全之德。厚贈以歸焉。盜亦有道。李鬚子之得保首領。其以此夫。

見色忘身

湖城塘蒲漾。丁姓有女五人。皆絕色也。其父開代完官銀店。因其女豔名四徹。求婚者皆大姓。惟季女尙未字人。道光某年。本邑城隍誕辰。鄉人迎神賽會。舉國若狂。燈市之盛。爲從來所未有。其女靚妝登樓。倚窗而望。遊人爭目注之。一少年從漾側窺。見其美。幾喪魂魄。不圖失足墮於漾中。拯之不及。遂斃于水。其夜鬼忽附女身。大聲告其父母。曰。爾女冶容誨淫。余以此喪命。頃控于嶽廟。速報司。蒙神將爾女斷歸於我。永諧伉儷。泉下琴瑟之樂。不減人間。茲來偕汝女同歸也。女家大駭。懇情不允。不得已乘夜控於嶽神。須臾嶽神委小神來附女身云。仰本邑城隍審奪。少焉城隍遣判官至。諭以明午赴廟聽勘。伍伯刑具之類。可假之縣中。以備拷問。次早喧傳一郡。廟故與縣鄰。署中差役。以爲不經見之事。皆樂備驅策焉。屆期女至。跪於庭。凡神之讞詞。及女與鬼之供詞。皆出女口中。鬼不服。則批頰。女側面受之。條青條紅。迄無定色。審畢。罰鬼爲城旦。速報司。徇情枉斷。詳嶽神治罪。而女得釋。回歸其家。身已大憊。調養半年。始愈。今適人矣。夫少年與女不過一覩其面。未嘗兩相悅也。癡情所結。至此猶欲強附。婚憤鬼而憤姻。若是宜遭冥譴。至婦女身處閨中。果能深藏不露。詎有意外之虞。此女不知自愛。以致對簿神庭。亦不足惜。獨城隍神爲唐睢陽公生前忠義懷懷。沒千餘年。後猶赫然如生。宜

乎。福庇一方。血食不替也。

鎖喉鬚

世之精於姑布家術。每謂騰蛇紋入口。據法定當餓死。其言未必盡驗。而亦非盡出於無稽也。戊寅孝廉章超。字曰洲滄。嘗自言有相之者。其死當與錢滿天下之鄧通同病。然滄洲之爲人。恂恂儒雅。家亦小康。斷不至於餓死。聞者咸謂此譎語耳。不足信也。後年至六十餘。忽噎隔。粒米不能下喉。枵腹旬餘。遂致不起。探原其故。蓋由喉間生鬚數莖。在喉結之旁。名爲鎖喉鬚。可知鬚之銷喉。無異紋之入口也。相法之驗如此。

吳某

吳某軼其名。休寧人也。隨其叔學貿易於六合布肆中。一日外出。塗遇一女。綽約可愛。絮絮與語。某尙年少。不無心動。至夜歸臥房中。突見此女推扉入。問之。則曰與郎有緣。故來相就。遂相繾綣。積一二年。漸就羸瘠。叔初疑其病。已而聞其房中喃喃私語聲。祇窺之。乃得其情。叔故市井中人。無甚識見。妄意關漢壽爲妖所懾。取三國演義一部。俾某披閱。冀以懼妖。女見之微笑。夜於燈下與某共閱之。遇某有不能句讀處。並爲指示。叔無如之何。又恐其久而致殆。遂議送之回徽。女已知之。是夜謂某曰。緣盡矣。妾視

郎無大福分。第伉儷有年。當授卽一術。以爲他日衣食資。問何術。曰。妾少精拳勇。今以授郎。遂告以如何是少林法。如何是武當張三乎法。習之數夜。頗得梗概。女曰。可矣。郎歸第精熟之。不愁無噉飯處矣。後某回徽。女遂絕迹。而客商之往來於江湖者。知某有過人之技。爭以重金聘之。某果得溫飽畢世云。此女之情。亦可謂摯矣。特不知是何精靈所化耳。

苗大姑

楚之鳳凰廳。萬山中有石亭。顏曰苗姑救夫處。問疑爲跳月人繡帕。涅面吹蘆笙。嗚嗚者。自覓藥砧故事。而不知其非也。明季焦生。彞字梅仲。中州人。任俠放生。讀書學劍。偕友遊汴之上河。時值清明。士女如織。有健兒弄虎演劇者。圍觀若堵牆。虎眇一日。爪牙釣刺。文質斑斕。弄者故以頭觸其吻。手持其鬚。背承其腹。而虎且宛轉如人意。衆擲青蚨。勝撒白雨。市散。驅入大木。函荷之去。生歸而冥想。大息曰。大丈夫不能自全。誤落陷阱。亦猶是夫。友戲曰。然則封使君亦將買而放之乎。曰。有何不可。夜寢。夢老父闖然入。白衣絳冠。向生拱揖曰。封使君謫限已滿。郎君若仗義俠。放歸山林。則得美婦解奇厄。證仙果。功德無量也。生曰。弄虎者。以之攫阿堵。爲衣食券。恐斲而不售也。曰。有機可乘。

生一諾而醒。朝嗽滿窗起呼盥。柳挈友再往。至則鳴鉦開場。虎搖尾瞑目。意甚頹敗。倏叟一老叟科頭袒背。而前騎虎背。斡虎領。更以禿顛抵唇側。忽虎大吼。利喙一合。則頭脆如瓠落矣。觀者盡奔。兩健兒哭曰。殺者我父也。虎向馴。不知何故突變性。將殺斃抵我父乎。操刀欲斫。生急止之曰。子迂矣。虎曠人性也。卽斃之。豈即抵爾父。人財兩空。殊失算計。曰。將奈何。曰。曷賣於我。以資殮爾父。餘可另作生涯。健兒私議久之。以爲善問。其值曰十萬錢。如數交兌。生命僕人放之去。咸不敢曰。索在頸。尙曠人。若解去。不將繼叟俵耶。生怒自策馬。送虎至深山中。曰。荒野窮岩。不少生物。幸勿攪行路。罪株小生。虎頷之。獨目若流淚。生親解鐵瓊璫。急上馬。前返轡。揮之曰。去。遂分道行。甫轉官衢。忽狂飈驟起。砂石橫飛。虎至。急奪路。則已伏馬前。叩數十下。始去。歸告友。咸不甚信。是年秋。闕獲解。往應南宮試。行至燕趙間。僕馬奔馳。日色已下。墮疎林疊巘。倏迷路歧。忽林中轟出。欵石高丈餘。瘦削可愛。炊烟縷縷。知有野人家。趨求止宿。則老屋數椽。門臨曲澗。一眇目老叟。龍鐘逐客。曰。何處貴人。下顧草野。生自陳姓氏。且告所求。叟乃邀入共坐。草堂中。僕馬亦有安置。生見叟衣冠整潔。言語粗豪。自云苗姓。向客中州。遄歸未久。倏一紅妝。屏後窺客。又一老嫗。上堂篝燈。蹀躞頗苦。叟曰。寒家無僕御。此山荆也。生局促。

不安。意在呼僕。曰：累夫人不當。叟止之曰：紀綱勞乏。已安棲止。向屏內呼曰：大姑姍姍。兒出拜。郎君一代母勞。女果盈盈趨前。綵裙生見其媚態萬方。神魂飛越。幾致失禮。揖而問叟曰：女公子耶。曰：然。以郎君貴人。敢以兒女相見。須臾肴陳於案。酒沸於鑪。叟以巨甌自飲。以常樽勸客。酒闌。女出爲生解裝。設榻布枕拂拭。殷勤備至。生遜謝。女一笑去。餐已。叟詣內與媼絮語。遂不出生。醉而隱。兒女搖生醒曰：郎可寢矣。曰：卿尙未去耶。曰：父母遣視安枕。防呼茗飲耳。問芳齡幾何。曰：十六。問有婿家否。女嗔然久之。微曠曰：夜深可寢。絮絮何爲。恐老親聞知。叱辱將及。生倚醉。遽攬紅袖。女掙脫移立。不得近。遂寢。醒則吻嗅。試呼茗。則女已捧磁盞立榻下。生飲已。牽玉臂求歡。女呼曰：魯莽兒。何動欲。喪人廉恥。叟媼在內呼問。生釋手。女急遁。意將詭譎。轉寂然。天明晨光透。女起。出酒掃。生惴惴不敢語。女呼曰：郎起耶。滿天風雲。眞天留客也。生披衣視庭外。果花飛六出。片如掌大。旋進盃具。更瀹苦茶。女笑曰：痴郎子。昨宵幾驚破胆。曰：忍哉。卿也。曰：柔情媚骨。何必爾爾。生益惑。語漸狎褻。女秋波微怒。似又欲呼。生哀之。始已臨去。忽紅漲於面。欲言又止者。再曰：郎娶否。曰：未。曰：眞耶。曰：天日可誓。曰：郎求婚於我父母。當無不諧。萬勿望非禮苟合也。生曰：諾。時僕亦起。問生行否。生癡立猶豫。叟出揮僕夫曰：茫茫風

雪向何處去。霽卽行。豈碍程途耶。少頃。女又陳餐膳。餅餌帶松子香。雉羹鹿脯。其味尤美。生且啖。且問女。卽年齒與夫家姓氏。叟答以擇配甚難。紅鸞猶缺。生曰。僕不才。尙屬清門。忝登桂籍。未知可列雀屏。選否。叟曰。嫋嫋甚。擗強庸歸。與山荆詢明白。免他日怨老朽。孟浪。頃出告生曰。大喜大喜。小妮子竟首肯。但愚夫婦老矣。風燭草霜。一朝殞謝。反累弱息。莞獨山野。無鼓樂宿相。意屈東床。卽於今夕。草成花燭。明卽携去。愧無奩粧。能相諒否。生喜極。再拜一一承命。媪扶女出。韋布新更。雲鬢微掠。愈覺斌媚動人。交拜訖。重設尊罍。一家團聚。僕在斗室。亦小犒賞。痛飲極歡。夜深。二老去。生移燈掩關。卽就客榻成婚禮。繾綣恩愛。盟誓萬言。明晨。雪霽。叟媪并出曰。嫋嫋兒嬌慣。乞郎君百事看老朽。勿加罪責。雙雙登程。不敢以私愛誤功名事也。母流涕悲戀曰。勉事郎君。錦旋時。可一歸寧。何須戚戚。生以馬授女。自則與僕徒步。拜別出門。叟於欵石下。掀臥石起。內皆朱提。曰。倉猝不及備奩。以此爲贈。生曰。客途無玉臺。下聘尙敢領厚貺乎。曰。聊壯行色耳。生勉取三錠。叟以爲太少。盡行代檢入囊。揮之曰。去。出山數十里。入一大城市。爲女購簪珥裙服。嶄然一新。再覓車馬。入都城賃宅居。倡隨樂甚。榜發成進士。授浙之會稽令。挈夫人同之官。多政聲。皆內助也。然生性好客。舊雨新雲。爭來趨附。明年升錢塘。

太守而客益多。女請却之。不聽。客聞之懼。釀千金購妖姬。名窈娘者。奉生爲妾。窈娘色既豔冶。絃索歌唱。無一不工。床第之間。尤多內媚。生惑之。嬖暱忘政事。而客皆陰攘其權矣。女獨宿。絕不爭夕。然生偶抱恙。女輒雞鳴起視湯藥。不啻孝子。窈娘見女髮膚肢體無處不美。卽亂頭粗服。亦饒丰致。退而攬鏡。愈自慙汗。由愛生慙。慙生妒。妒生恨。遂結婢媵。環布腹心。思傾女不得入。暗以鴆毒置酥酪中。布女室。生偶入呼飢。女以酥酪進。窈急奪而棄之。啖貓犬立斃。乃嬌啼求去。曰。夫人妒忌。意毒良人。若妾不去。恐難免也。又女每夜焚香於庭。禮拜北斗。窈告生曰。夫人毒未成。又用詛禳法。妾時心痛。恐中魔巫。由是生怒女。動輒得咎。曰。終非好相識。立逼大歸。女泣曰。自爲君婦。有何失德。生曰。我與爾緣盡。眼中釘刺。喉中骨鯁。不能頃刻留。女大慟。曰。若留。須跪受鞭笞。始已。女卽膝立受辱。婢媼爭伏女旁。願代受杖。邑之仕宦眷屬。聞之咸不平。聲名益狼籍。當道者羅織生之荒怠酒色。侵蝕庫帑。十餘款。欲劾之。生懼。謀於客。出千金購玉鼎。將獻中丞。又出千金購冬貂。獻侍御。同列中堂。鼎無故碎。裘無故焚。至問誰毀。窈堅以夫人對。生大怒。狂呼不可忍。操杖立逐女出。女曰。是真不可留矣。自脫簪珥裙服。擲地下。着嫁衣。忽忽出門。飄瞥不見。當道待生。賄不至。疏劾之。奉旨降官。東魯陰陽丞。婢僕與客一

時星散。生與質玩物得千金。携竊就丞任。策馬悠悠。誤入山谷。見疎林烟裏。欹石猶存。忽至當年止宿處。大驚恐。翁媪出。無顏相見。勒馬不前。遣僕覘視。則空林無屋宇。僅曲澗流泉。荒筓虎跡。急趨而過。丞任清苦異常。竊不能堪。終日悲啼。生惟隱忍。旋抱病呼。竊不至。蓋早已隨僕遁去。至是始悔。勸曰。其負我結髮苗姑報乎。而已無及矣。更以行。賦革職。充雲南軍。赭衣登程。監者呵詈。資斧一空。貨馬徒步。兩足腫潰。踣躄不前。比至鳳凰廳。萬山中人踪斷絕處。有亭翼然。監者引入。曠目叱曰。爾罪應受。我輩何辜。請速自戕。免污我刃。生哀涕不已。監者操刀而至。正皇急問。忽腥風怒號。一白額猛虎。自絕嶺下。爪搏監者三人死路側。生亦迷悶微甦。覺耳畔有婦人哀喚聲。啓眸視之。非他。姍姍苗大姑也。生反痛哭曰。夫妻邂逅。得毋夢中乎。抑冥中乎。曰。竊娘何在。客又何在。生以頭觸地。泣言知悔。問虎究何往。卿究何來。曰。郎至此。量言亦勿懼。妾非人。虎也。郎在中州所放者。妾生身父也。父母感大德。遣侍巾櫛。又以無狀被逐。若非大難當前。實無顏見夫子。然面目已露。郎能勿以非類見疑乎。曰。豈但勿疑。言已。抽刀斷梅指。血泔泔焉。女驚欲奪刀。拇指已斷。急出藥末。糝而接之。裹以殘帛。竟不痛。曰。郎君既悔。又何必爾。曰。非此無以對我賢卿也。問翁媪何往。曰。天謫已滿。重證仙班。不在人間矣。南山之

南。尙有敝廬。能惠臨否。曰。逃軍殺監。出則領斷。茫茫海內。托足無區。願隨卿隱。曰。以郎資負。勘破泡幻。大丹且成。言已。携手同行。穿雲越壩。約十餘里。怪石數轉。有大洞府。門前長鬚赤脚者三四輩。翹首拱候。呼曰。大姑救得郎君歸矣。問此數輩何來。曰。老父遺留婢僕侍郎君耳。入見斧鑪鼎白几案床第。無一非石。曲折數層。若分內外。西偏一洞。爲女臥房。房內陳略古雅。帷帳悉具。床上坐一嬰兒。呀呀索乳。問是誰氏子。曰。此君種也。渠外大父命名曰寅生。生親與摩頂。見其豐麗魁梧。知是國器。夜夕。然石燈出甕中。百花釀飲。生烹茯苓松花餅。啖生。晨起。督婢僕各出採藥。自以野蠶織布。無一廢弛。寅生五歲。頗慧。生拾樹葉爲箋。燃松枝爲筆。抄書教兒讀。十歲。卽通六經。能韻語。生悲曰。吾負罪竄匿。累嬌兒。何時出頭。女問中州有手足否。曰。有。曾受君惠乎。曰。有。從堂弟名盞者。從未貸一錢。女以纖指卜再四。曰。是真可托。翌日早起。呼髮髻。僮駕牛車。抱兒端坐。以生手書置兒懷。自脫金釧束兒腕。并與玉瓶。曰。需果餌。此中索。卽得安置。訖。遽揮曰。去。車如電掣。風馳突入雲際。生失聲哭。女笑曰。君別兒卽苦妾。父母嫁女時亦苦耳。何一入宦途。頓加白眼。生大愧。以指示女。曰。卿忘却耶。相與大笑。焦盞者。中州名士也。四十無子。以爲憂。族人子蓬頭劣齒。不欲繼。夫人爲置妾。又恐分恩愛。不肯受。是日忽

牛車到門。僮抱兒入。投書案上。盃折閱。見的真爲兒。薙筆跡。大喜。閱至托兒爲嗣一節。更覺歡怍。一瞥眼。僮與牛車不見。惟兒束釧捧瓶依膝下。市人闕鬧。曰：焦家門內。豹負猩猩。奔入城去矣。夫妻愛兒逾所生。寢必摟於懷。食必加諸膝。冬日盃病。思櫻桃不得。兒忽捧金丸至。問何來。笑指瓶以母語告。戲呼他物。無不應。由是大富。寅生冠而就試。連科及第。貴爲大中丞。後來征雲南寇時。盃夫婦壽八十。猶健飯。領軍拜別。諭功成速回。順路訪生身父母。寅泣受教。凱旋時。果訪至舊處。則洞口雲迷。樹葉零落而已。痛哭榛莽。視石壁。鐫草書一行。曰：中州焦鼎。遇虎得生。洞居三十載。吐納通神。天降丹顆。服之身輕。水火調御。夫婦道成。某年月日。白晝飛昇。兒讀能貴。勉事聖君。石齧流水。嶺橫白雲。人間天上一樣看承。

畫中燈

京師有人於琉璃廠。見畫一幅。畫惟繪一燈。燦火熒熒。然如豆。以數十青蚨易之。歸不知作何所用。姑懸之室中。是夜滅燭而寢。則一室如晝。審視之光。自畫中出也。舉以語人人。無識者。後有人以重價購去。問其故。不答。或疑此如古人畫馬。能夜出鬻草之類。或曰：其軸中有夜光珠。可寶者不在畫。亦未可知也。

廉令女

乾隆二十年。元利令某廉吏也。卒於官。無子。生有一女。在襁褓中。家隔數千里。貧不能歸。夫人挈女寓吳門。一老僕日負擔經營。以佐主膳。越十餘年。僕死。母女益困。居市闐小室中。針黹度日。卽比鄰亦忘其爲前令尹女也。丙午歲大饑。薪桂米珠。炊烟莫繼。女性孝泣謂母曰。異鄉孤寡。舉目誰憐。兒願鬻身爲婢。得資以膳母餘年。亦稍酬罔極恩也。母瞿然曰。汝父吏也。烏乎可。女曰。兒矢志自愛。決不貽吾父泉下羞。夫人含涕從之。言甫出。媒氏接踵。一日偕一媪至。言某鄉某太太願出重資購女爲婢。夫人疑未許。媒從旁慫恿之。夫人曰。如爾言。我親送上門方信。議既定。夫人乘輿送女往。則高堂廣廈。儼閥閱家。有太太者。巋然上坐。謂夫人曰。我視爾女猶女。爾放心去。微察之。不類大家。且室中聯語新豔。案頭管絃羅列。心疑有異。姑若不知也。者俄聞有啜笑聲。竊窺門隙。間則粉白黛綠者盈焉。仍不言。願謂女曰。善伺太太。我再來看汝。女淚如泉湧。夫人以目示意。登輿疾去。道經臬署。陡躍下闕轅。鳴冤。時廉使爲山右茂園康公。勃然怒。飛傳三令至。卽日拘媒及妓院人。按律重懲。并毀其院。公復指女謂三令曰。此僮僮者。若以匹敵。則亦令君之女也。忍令流落至此。且君等平時養惡容奸。非夫人不幾使縉紳女

入陷阱中耶。茲姑不問。請各捐俸五百金爲作嫁資。以謝過。感唯唯。越日公招考書院。首拔者蔣生名瀛。寒士也。青年未娶。公卽爲作合。又自出五百金爲生完聚。是年登賢書。臬憲康公恤孤之德。有知人之明。入感感歎不置焉。

守錢奴

金陵富翁某積銀數十萬。貯之一樓。而素性愛財如命。不肯輕用一文。家惟一妻一子一媳。每日以一錢市茶一甌。自飲其半。留半飲其妻。其子若媳。雖渴甚。終不破例。而分以餘甘。他可知矣。妻若媳苦之。思欲乘間竊其銀。而翁終日危坐樓中。無從下手。翁之樓隔牆卽鄰家空院。一日翁以事出外。妻卽走告其鄰。謂有銀。暫欲寄頓君處。歸卽與媳啓扉入。見牀頭一橐。貯元寶八十枚。遂共運至窗前。拋入鄰人空院中。未畢十餘枚。而翁歸。倉猝掩扉下。翁見妻媳二人。神情有異。上樓檢視。橐中失銀二千餘兩。大怒。遽以白晝被竊。失銀九千。首之官。官到其家勘驗。見門窗俱無傷損。惟窗外及牆上瓦有破碎痕。并知其家更無餘人。遂帶婆媳二人。還署鞫問。始知竊銀乃伊二人所爲。且數非九千之多。以尙須提鄰人對質。遂將婆媳二人。管押官媒婆家。二人俱女流。見事已敗露。慮有不測。是晚相對縊死。官鄙翁之吝。怒翁之誣。欲翁供明失銀實數。而翁恐受

誣告之罪。熬審數日。堅執不移。因拘在縲絏中。遂致拖斃。吁。以財之故。而既死其妻復死其媳。且自死其身。天下守錢奴。真不可以常情測者矣。多藏厚亡。其斯之謂歟。

老蚌生珠

浙省之甯波府屬某邑。有一老婦。軼其姓氏。年近古稀。雖非綠鬢朱顏。尙未雞皮鶴髮。望之如四十許人。夫故多年。子沒媳存。孫兒孫女均已長大。比鄰有某氏子。年未弱冠。竟與老婦私通。居然結孕。人莫知之。不數月而某氏子竟以夭殂。老婦聞喪若失。所天越三月。老婦誕生雛兒。實告其媳。且願執新婦禮過門。以事其姑。其氏止此一子。且又少孤。母年望五。聞比鄰老婦所生之兒。酷肖其子。因至老婦處探望。甫入門。老婦卽拜認。姑嫜自陳顛末。願爲某氏子守孝撫孤。某氏許之。遂從至其家。不知者莫不以姑爲媳。以媳爲姑也。其事迥出情理之外。予友述之甚詳。天地之大。真無奇不有矣。

聞見述奇卷一終



聞見述奇卷之二

海上醉花生琴珊氏述

保定婦人

直隸保定府。有村居某氏婦者。生一子一女而寡。家饒於資。而素性淫甚。傭工數人。無弗與通。數年後。女嫁。子亦爲之娶媳。媳頗貞靜。不妄言笑。婦惡之。又恐窺見己之陰私。漏言布醜。遂思并污之。以滅其口。一夕。其子他出。密令一傭工人往。而媳已先爲之備。聞撼靡聲。卽起大呼。婦怒。乃自往。與傭工共縊殺之。以暴病猝斃。告其母家。母家故孱弱。兼以貧富不敵。第索身後事。一切皆宜從厚。婦許之。延僧以資冥福。出殯之日。搭臺演劇。觀者如雲。蓋亦北方風俗然也。時鄰近諸村。非不憎婦之淫。哀媳之烈。而母家旣曲爲隱忍。旁人亦徒抱不平。蓮性雖芳。幾疑無從昭雪矣。會直督那公之太夫人。迎養在署。身旁一僕婦。卽其村中人。先數日以事回家。久之始至。太夫人怒其遲延。僕婦曰。吾在吾村觀鬧熱耳。遂備舉以告。蓋僕婦以此爲新聞。可博太夫人歡。且解己遲延之故。初非有他意也。太夫人聞之。怒。召那督入。責之曰。汝總督直隸全省。乃境有烈婦。而令銜窺地下乎。那督詢得其故。出卽令保定府。及清苑縣。馳至其村。縛某氏婦。及傭工。

人偕來。一訊咸伏。由是生者按律定罪。死者乃馳摺請旌。而人心爲之一快。

城隍充軍

各邑但有城隍。而嘉興兼有遊撫城隍。其秩較城隍更尊。某年嘉興城隍誕辰。鄉人昇神出巡。其寢宮陳設諸物。未暇收藏。有某氏兒。見案頭扇。綵繪精工。乘人不備。竊之而出。突一兒見欲奪之。兩相撲。而遂毀其扇。歸其家。父母詰得其故。駭曰。此神之扇。汝不特竊之。而并毀之。獲戾甚矣。次日以重價購一扇。兼具牲牢。入廟謝罪。迨夜兒發狂譫語。言神遣鬼卒繫之去。問昨日事。何以緩至今日。則曰。神老而善忘。於服御諸物。漫不記憶。城隍夫人。又以其性暴。昨秘不以告。今以謝罪。故始知之。其怒遂不可回耳。兒之父年力已衰。又兄弟二人共此一子。遂偕其弟同詣神詞。哀禱猶未畢。而其子已奄然斃。憤甚。遂具控於游撫城隍。翌日廟祝語人曰。嘉興城隍充軍矣。問何以知之。則曰。昨夜廟中喧嚷殊甚。起而竊聽之。聞游撫城隍責嘉興城隍曰。童駭無知。誤竊汝扇。不足深責。况其家又已服罪乎。汝乃任性妄爲。若此。天曹不汝容也。旋見褫其冠帶。令鬼役押之去。以此知之。然人猶未之信也。不數日。張真人府牒至。則嘉興已另除城隍矣。

一錢致富

徽商甲乙二人。合夥挾重資。至蘇臺貿易。各昵一姬。不吝揮霍。兩姬亦奇女子。頗具慧質。嘗於夜半無人時。謂二人曰。從古勾欄中。鴇媼無好相識。有錢則奉爲上客。無錢則標諸門外。比比皆然。日來窺二君囊金漸次蕭索。君等挾重資。背鄉里。爲權子母耳。今爲妾等耗費殆盡。脫不早爲計。其何面目歸見家人。願熟思之。甲乙亦以爲然。以戀戀不忍割愛。苟且安之。鴇媼每有所求。必百計謀劃。以厭其欲。典質罄盡。遽爲鴇媼齒冷。將下逐客之令。兩姬曰。何如君等不聽妾言。早知有今日矣。妾等不幸身墜烟花。實非所願。蒙君等割臂要盟。刻銘心髓。觀二君意氣。不過暫時落薄。必不久困風塵。不如暫歌別鶴。努力以圖恢復。妾等當誓死以待踐昔約。報君有日也。各餽白金五十兩。趣令早去。甲乙無可如何。不得已受金揮淚而別。時將歲暮。二人姑就酒罇。對酌禦寒。並市餽。餽寒具等物充飢。心緒惡劣。飲罷忘携金。歸至寓始覺。急覓不得。逆旅主人促索稅資。勉強典衣以應。行李一空。二人計窮。日則行乞。夜則寄宿古剎。恥過兩姬之門。避道而行。會除日薄暮。二人拾得枯枝。就地燃火。相對歛歔。甲於腰囊摸得一錢。擲地歎曰。重資散盡。留此一錢何益。不如拋却。乙忽心動。急起拾取曰。此碩果也。天幸存此。一脉生機。安知非剝極而復之兆。遽攜錢出曰。君姑待之。我自有計。甲莫喻其意。少頃乙歸。

手持竹片草莖。并敗紙雞鴨毛等物。甲問何爲。乙笑出麪粉。索水調漿。就地火光中。將草纏竹片上。蒙以敗紙。又徧粘雞鴨毛。昇甲視之。宛然各種禽鳥。甲曰。君處此愁城。尙何作此兒戲。乙但笑而不言。竟夕約成二三百具。平明以半付甲。邀同至元妙觀。自有料理。甲姑與俱往。觀爲姑蘇游觀之藪。春日尤甚。比至觀。士女雲集。婦孺見甲乙所攜禽鳥。以爲酷肖。爭來購買。頃刻俱盡。每具售十數文。共計得錢五千有奇。甲至是始歎乙之心思靈巧。樂不可支。因問一錢何用。曰。竹片草莖。敗紙雞鴨毛等物。皆係拾諸市上。以一錢購麪粉。豈不恰敷所用耶。相與大笑。自是購添各色紙張。雜雞鴨毛。以肖人物花草等狀。兩人夜間分製。日則到觀分售。自春徂夏。纔百日。計斂錢三千餘緡。因變計居積貨物。無往不利。不兩年積資數萬。遂於閩門前設布店。大書一文錢三字榜於門。不忘所自也。乃各具千金。爲兩姬脫籍。兩姬又各出私蓄。相助經營。不數年財雄一方。爰至徽省。迎取眷屬。兩家相約。世爲婚媾。迄今三百餘年。閩門外秦伯廟前。一文錢三金字。大如栲栳。猶煌煌照人耳目云。

金瓦

南潯鄉間有一小兒。摸蚌於溪中。忽得一瓦。其色黝黑。叩之有聲。以爲銅也。攜之歸。閱

數日。以布拭之。微露黃色。異而告其父。其父攜至質庫中。求人識別之。質庫中人驚曰。此金瓦也。何爲乎來哉。鄉人告以故。乃欣欣然懷之去。權之得八十兩有奇。是真貧兒暴富矣。抑南潯與七里崑連。明末若溫若金。皆鉅族。金瓦或此兩姓之物。鼎革時遺失於此。至今始出也歟。

當人頭

常州西門內原泰典。徽州洪某所開質庫也。戊戌四月間。一鄉人提一囊擲其庭中。而以首飾數事。欲錢數千文。曰少則不敷我用。典中人曰欲敷爾用。須添爾物。是區區者值不能半。顧乃操約望奢乎。鄉人曰欲添乎。有有卽取其庭中之囊置櫃上。解之。則人頭二。一男一女。血模糊猶未乾也。合典大駭。急召地保至。予以所索之半而遣之去。後知女頭乃其妻。男頭乃其妻之奸夫。鄉人偵之已稔。是日掩而殺之。而將首之於官。故質錢爲衙門用耳。然質錢而至脅以人頭。則鄉人亦可謂狡極矣。宜乎奸夫之爲其所殺也。

少年大力

杭人蕭春臺。於道光五年春。有事袁江。道出徒陽運河。時漕艘攔淺。候潮乃行。民船俱

爲所阻。遂借一小舟共泊岸傍。而漕船水手橫甚。一篙工持篙。誤破其鄰船之扉。篙之入者尺許。拔不能出。聚數人拔之。亦不能出。呼其舵工下視之。見此小舟內一老僕坐船頭。瞢騰欲睡。一少年在艙中。一手執書。一手以數指持其篙。篙之不出。職此之故。舵工大駭。力戒其水手弗生事。已乃登小舟。告之曰。水手無知。誤有傷犯。乞恕之。弗與校。少年未及答。突其舟人自後出曰。吾扉爲所破。須要償也。舵工與之青蚨千文。少年乃一笑釋手。夫數指耳。而力之大。乃至此。則少年殆非常人也。惜未詳其姓氏耳。

行脚僧

某甲略知拳勇。而無師傅。一日小立門前。有行脚僧肩荷鉅石。挨戶硬索銀錢。不滿所欲。輒以巨石置人家戶檻上。人畏其凶橫。祇得給予銀錢。滿其所欲始去。甲見而惡之。僧乃荷石至其門。甲舉手推之。僧應手而倒。跌去數十步外。甲乃大笑。僧慙甚。急起趨前。詳詢甲之姓氏。舉手合十曰。請俟三年再來領教。遂匆匆別去。甲不以為意。後年餘。偶與友人談及此事。其友曰。子殆矣。三年後僧來報復。子將何以禦之。甲曰。然則奈何。友躊躇良久曰。今爲子計。屆時詭云已死。置空棺於堂。張幕於外。俟僧來時。看其如何。作爲。甲曰。謹受教。及期甲先匿迹友人家中。僧果踵門來訪。家人告以三月前已經作

古僧歎曰。惜遲遲吾行。不及會面。一領教益矣。因請至靈前一奠。家人引僧至幕外。僧拈香畢。但見其舉手作深深禮拜狀。及僧去後。幕中空棺已劈分兩半。甲幸先機遠避。否則難乎免於僧之手矣。

測字者

江西景德鎮。有一測字者。方規地作場。安排筆硯等物。突有無賴數十輩。鬪之曰。汝不先輸吾錢。此地豈容白佔。其人曰。囊楚人也。昨暮來此。我無一錢。將何給汝。且此係官地。亦不容汝輩橫索錢。無賴憤其言不遜。羣起洶洶。爭欲揮以老拳。其人曰。欲用武耶。徒手無趣味。有小器械昇汝。適道旁有半石磨。舉而碰諸膝。磨分爲兩。自執其半。而以其半授諸無賴。無賴輩駭其神力。各鼠竄去。測字者真非常人也。

新豐令

新豐一田家婦。年七十餘。終日偕其子田間作苦。頭蓬不裹。短髮鬢髮披其肩。塵垢滿面。五官模糊不可辨。且又雨淋日炙。或黑或頰。不一其色。一日摘其園中蔬。往鎮上賣。行過一村。道旁一牧牛兒。見而訝曰。秋胡老媽復至矣。秋胡老媽者。四月間民間訛言。有魅幻作老婦形。入人家竊食其小兒。起自揚州。轉入丹徒。至丹陽而滅跡者也。婦憤

其詈已也。即曰：毋多言。吾回且食汝兒。駭奔告其村中人。鄉愚無知，誤以爲真。鳴鉦聚衆，各持器械，追及婦而亂毆之。徧體皆傷，乃縛而送之官縣。自新豐至丹陽三十里，道路喧傳，觀者雲集。比至縣，不下數千人。逼令坐堂皇，謂此魅食民間小兒無算。今幸被擒，請令以印印之，俾復現本來面目。令由崇明丞來署此篆。平素不學無術，時又大醉，乃出印印之三，而婦如故。衆又謂此魅修煉已深，現以傷故不能遁。少痊卽將變化去，非穿其琵琶骨不可。令猶豫未決。司閹者乃密止之，而大衆喧呶不已。謂吾輩辛苦縛之來，令乃欲放之，以殃民耶？問其何以知爲魅？則以下體女身，而上體男身告。令偕醉眼視之，見其婦上脣毫毛茂茂，有似乎鬚，且兩乳又以年老而平，頗以衆言爲信。遂命穿琵琶骨，穿甫畢，而婦斃矣。始知其誤。亟退而商之幕友。幕友曰：此鑄大錯也。爲今之計，惟有僞召民領賞，令其自供何人毆擊，何人縛送，各得其主名。庶罪有所歸，令從之。遂下數人於獄，而請金壇驗不至。請溧陽驗又不至。聞其子已上控，後大吏將邑令革職，而以縛送毆擊之人，分別首從定罪。然而鄉民或一時鹵莽，令何若此糊塗也。青天白日，竟至以人爲妖，仕途中有如此之官，豈非咄咄怪事。

熊生奇遇

熊生瑞縹。字凡菴。姑蘇太湖聽人。性情倜儻。容止甚都。讀書鄧尉山中。值冬夜漏二下。霜月滿天。清輝皎潔。顧而樂之。徘徊忘寐。忽聞管絃聲。抑揚盈耳。若遠若近。信步跡之。數武。見深林中樓臺。窅然。氣象莊嚴。石獸當門。雙扇未闔。堂皇燈燭。輝映人影。幢幢往來。蹀躞潛躡。足次。且入內。伏窗竊窺。一美人宮妝上坐。年可三十許。右側坐一美人。齒亦相等。着淡黃衫。手彈箏篋。聯肩坐。一萬人。年二十以來。着葱綠水雲之裙。兩腕約金玉條脫。手攜玉笛。對坐一美人。衣絳綃。年可十七八。髻邊貼翠鈿。輕拍牙板。疾徐中節。其餘滿堂姝麗。年皆二十上下。列坐傾聽。所衣各色不同。類皆輕綃軟靚。更無一人着狐裘者。竊怪時方苦寒。何不畏冷。少選曲終。上坐美人贊曰。南昌天人古調獨彈。一洗箏琶俗響。我輩何幸。聞所未聞。黃衫美人謙曰。三日不彈。手生荆棘。蒙賢妃謬贊。更覺可羞。東坐一美人。着藕色五銖之衣者。笑曰。夫人曲終奏雅。毫髮無遺憾。惟羅夫人。笛聲入破。稍滯半板。賴貴主心靈腕妙。巧爲偷聲。不然幾難合拍。意者心念羊生。神移手澀耶。上坐者笑曰。欲加之罪。何患無辭。似此吹毛索瘢。得弗令夫人齒冷。着葱綠衣者歎曰。妾常日不過念羊生。尙有仙骨。不惜以一粒金丹。度其出世。固無他事。一經慧業文人。曉曉饒舌。遂不覺輕薄殆盡矣。西坐一衣青綃。絳者笑曰。姊姊與羊生一段因。

緣尙屬形迹可疑。尤可笑者。趙師維小子。偶然醉寐。夢中便妄生幻想。若非翠羽喚醒。又要造出幾許黑白矣。東坐一衣紫羅襦者。笑曰。師維僅托於夢。猶不敢公然唐突。惟有老逋無賴。判將一種清寒玉骨。志氣橫秋。硬呼我輩作妻。不尤令人噴飯耶。滿堂大笑。上坐者曰。卿等亦不必過於惡謔。我輩伏處山林。亦全賴好事才人品題渲染。聊爲林下生色。况神仙眷屬。自古儘多。固無足怪。但今夕快聆妙緒。閨閣情形。未免畢露。尙屬垣有耳。不又傳爲談柄耶。乃命侍兒速出闔戶。卽有麗婢三五輩。持燭聯袂出。瞥見生驚呼有賊。內問何在。羣婢前推後挽。將生擁蹠堂下。上坐者叱問何處狂生。夤夜偷窺人家內。禍罪該萬死。復有何說。生幸近羣美。自賀死得其所。因從容自陳邦族。叩稱實係誤犯。自罪在不赦。但求賜死。着淡黃衫者叱曰。旣係秀才。定知守禮。論汝之罪。本在不赦。姑念書生無知。幸賢妃愛才。汝如能擬庾子山詠畫屏風詩第一首。稱妃旨。我輩當爲緩頰。生不假思索。卽次元韻。口占以應曰。仙境四時春。梅花堪結鄰。顧影祇自賞。索笑豈無人。綠萼鏡中髮。紅英醉後脣。碧天霜月淨。輝映增精神。羣美同聲讚其敏捷。且謂子山此詩。卽唐人五律之祖。和詩雅近初唐。足以贖罪。上坐者笑曰。始以君爲風狂兒。不謂竟是風雅士。休怪孟浪。乃命生起。賜坐。生三讓然後就位。上坐者曰。旣遇

嘉客不可無酒。乃命設三席。獨坐生於東席。中西兩席。羣美環坐。生爲之默數。共十有五人。遍燃畫燭。照耀如晝。頃刻水陸雜陳。凡龍肝麟脯。冰桃火棗之屬。畢具。行酒侍兒。靡不佳妙。惟餽酒皆冷。酒入口。寒沁齒牙。而甘芳異常。下咽頓覺肺腑清爽。肢體舒泰。生量素宏。連飛數十觥。衆賞其豪。上坐者命各拈經史中梅字流觴。禁川唐以後詩詞。生屢犯令受罰。又問古以梅爲氏者誰先。或曰梅宛陵。或曰梅福。或曰梅鎬。生謂殷大夫梅柏諫紂炮烙死。當以此爲最先。衆謂稗官不足信。應倍罰。生爭謂曾見路史。衆謂杜撰。因滿引一大斗。促立飲。生不得已。一飲而罄。衆益豪之。約輪流把盞。接坐一女。郎着淡白綃衫。年可十五六。齒最穉。時已微醺。笑鬢雙渦。目波翦水。色尤嬌豔。最後把盞。生故辭讓。久之接盞。陰指其掌。女郎一笑。盞乃墜地。砰然有聲。四座大譁。謂應罰十爵。生避席曰。鰥生幸叨寵遇。得預盛筵。不覺飲已逾量。倘再貪杯。必致失儀。敢辭。衆不許。上坐者命再盡三爵。而後罷席。生如命飲訖。上坐者謂生曰。妾自膺寶籙。管領花魁。伏處山林。久與塵世疎隔。不虞君忽陟玉趾。良非偶然。因指白衣女郎。謂是兒與君固有夙緣。今夕良辰。合當遣奉裳衣。君其無辭。生喜出非望。倉猝莫知所對。唯唯而已。尋命侍兒撤燭。送兩人歸寢。羣美亦告退。侍兒導生至東院一月洞門。門內白石嵌地。其平

如掌歷階而升。循廊左轉。有屋十餘椽。楣上榜暖香精舍四字。複室曲廊。連絲回。巨室內圖書滿架。鼎彝羅列。絕無俗玩。而青廬中牀奩。衾枕盡是新製。一似咄嗟猝辦。几上燒蓮炬如臂。壁懸吳道子所畫嫦娥竊藥圖。兩旁懸楊少師行楷。一聯云綠水鴛鴦芙蓉池。沼青春鸚鵡楊柳樓臺。旁設揚妃榻。有圍屏十二幅。前十幅係邊鸞所畫梅花。末兩幅係花蕊夫人楷書宋廣平梅花賦。時雖嚴冬。滿室盎然有春氣。侍兒拽扉。既去。生叩女郎姓名。自言林氏妃。雪小字。嚶。嘗問上坐美人爲誰。答爲江妃采蘋。彈箜篌者乃神仙尉之夫人。卽嚴陵外姑也。倚笛者綠萼華。拍板者壽陽公主。其他尙未盡述。生聽村鷄已唱。因趣入幃。相將就寢。倍極燕婉。覺一種奇香。出自女郎肌膚。汗氣微帶酒醺。異常撲鼻。因問頃所飲酒。是何麴蘖。如此甘芳。妃雪笑曰。君真俗物。此酒乃采百花之精。以甘露醞釀而成。上者爲沆精。次者爲濯髓。頃所飲者尙是次等。君若飲沆精。更不知顛倒何若也。生不禁稱羨。歎曰。安得一嘗沆精。願斯足矣。妃雪笑曰。君休妄想。沆精惟真仙可飲。俗人飲之。反傷臟腑。爲害不淺。生聞而大驚。因疑妃雪非人。爲愛其美。又以其語言和婉。似非禍己者。遂亦不畏。因問卿所言江妃諸人。去今千百餘年。何得尙在。曰。江妃本黃姑之妹。上帝念其平日無過。且素性愛梅。謫滿後。乃命司掌梅花。若妾

等則各有所司。要皆歸其管領。以與君前世有緣。故蒙賜以好逑。生笑曰。信如卿言。是亦仙子無疑。小生幸近薌澤。樂而忘死。倘不及時。細意領略。恐有日分離。悔之何及。遂捧其頰而逐。逐嗅之。妃雪低笑曰。狂生何囉囉也。晨起同往朝江妃。妃謂生曰。林妹妙齡慧質。妾所珍愛。今既遣事君子。可在此小住。俟梅花盛開。當召客爲賀。生頓首謝。生嘗閱室內藏書各帙。皆有牙籤編誌甲乙。書名多目所未睹。內有百函小篆。署天地心三字。偶披覽之。皆備載古今梅花故實。並歷代詩詞歌賦。卷末以高青邱詩終。方循玩間。妃雪適至。問古人言梅。如鹽梅標梅。皆只言實而不言花。以梅花入詩。始自何人。生曰。卿忘也耶。前小生所擬庾子山詩。卽咏梅花之始。妃雪笑曰。君休矣。子山以前。不已有陸凱鮑照耶。生辨曰。不然。詠梅花要以葩經山有嘉卉。俟栗侯梅爲始。所謂卉者。卽花是也。妃雪笑曰。君如遇飭政。又當受罰。如以卉爲花。則栗花固未見嘉也。相與拊掌。生暇從妃雪遊。見屋之四圍。縱橫數里。盡是梅樹。不下數萬株。蓓蕾繁密。每低徊其下。盼其速放。瞬近上元。開者漸多。各色繽紛。迷離炫目。直如萬頃晴霞。詰且傳江妃命召客。妃雪晨起濃妝。戒生勿出。日晡喧言客至。妃雪携生登一小樓。窗皆嵌以五色頗黎。生倚窗遙窺。則見美人數輩。從天而降。有騎龍者。有騎虎者。有騎鸞鳳鸞鶴者。所乘奇

禽異獸類多不識。末一人騎五色蝴蝶。翅如車輪。栩栩可愛。其衣裳釵烏迴與世別。妃雪密告生以羣仙之名。騎龍者上元夫人。騎虎者吳彩鸞。騎蝴蝶者羅浮君。其餘如董雙成。范成君。許飛瓊。紀離容。李慶孫。郭密香。凌婉華。段安香。王子登。杜蘭香。麻姑。毛女。嫦娥。織女。弄玉。碧霞君。雲和夫人等。不可勝紀。江妃率衆相迎。上元夫人問林婢何匿。不出見客。豈貪戀新郎。頃刻不捨耶。生聞之。急推妃雪出。羅浮君見之。携手先言曰。林妹出落風流。天然可愛。腹中已有俗種。猶覩靚喬妝處。子何爲。妃雪面發赤。一一稽首問訊。上元夫人謂今夕元夜。我輩當趁良宵嘉會。爲林婢添粧上鬢。僉應曰諾。江妃肅客升堂。肆筵設席。八音迭奏。主客盡歡。薄暮江妃命樹間懸燈燭。作卜夜之遊。俄而皓月漸升。羣仙屢庸游戲。花間月影燈輝。花光人面。互相照映。愈覺精神。未幾蟾魄西斜。羣仙始各興辭。翩躚花杪。緩緩凌空而去。妃雪招生下樓。生視羣仙已爲上鬢。較前更增媚。妃雪羅列羣仙所賜。木鷄火齊琅玕珊瑚等物。皆世罕有。落英蓋地。密葉成陰。生撫時感物。淒然有故鄉之思。妃雪已知之。謂君欲歸乎。生曰誠如卿言。故土可懷。新人難捨。奈何。妃雪歎曰。人生悲歡離合。自有定數。如不令秋扇見捐。又何愁破鏡不合。正無須瑣瑣作兒女子態也。越日卽白江妃爲生祖饞。羣美畢集。江妃自倚玉笛。命

雪歌。落花。落曲。以送生行。妃雪低鬟斂容。曼音歌曰。昨日梅花開。今日梅花落。明知花落時。何不早行樂。早行樂。送君頻勸白玉杓。初闋畢。舉座相視。皆有離別可憐之色。又命再歌。後闋。妃雪以綃帕拭目。檢衽再歌曰。今日梅花落。後日梅花開。花開厭孤賞。盼君早歸來。早歸來。待君滿引黃金杯。歌畢。衆皆稱妙。謂後會有期。此歌定徵佳讖。足以破涕爲笑。生起作別。江妃賜明珠四雙。南昌夫人以次。各有所餽。妃雪又取前羣仙所賜。並自脫金釵珠珥等物。以錦帕裹好。納生懷內。招元鶴一隻。與生並坐。自送生行。囑閉目勿視。但聞鶴起空際。耳畔風聲習習。約一炊許。妃雪呼曰。止。生啓目視之。人鶴俱杳。身立郊外。距家門不數武。急趨至家。妻見之。悲喜交集。先是生夜出。逾日不歸。館主人疑其歸家。旣而妻使人招生。始共詫異。妻鍾氏美而賢。檢生衣物俱在。又以生好爲狹邪游。疑有所昵。姑置之。至是生具述所遇。屈指流連。將及兩月。共猜遇仙。因繡江妃及羣仙像祀之。生乃出所贖各物。揀鬻數事。已得資巨萬。營田宅。蓄婢僕。居然大家。惟念妃雪不置。託故仍如舊館。潛訪其處。青山白雲。茫無所有。惟老梅萬本。接葉交柯。無數野鳥。迴翔嘲哢於其間而已。歎息零涕而返。越歲生方家居。忽有道士款關來訪。自稱覓陸山人。懷中綉一嬰兒。解以授生。附書一緘。生拆讀之。云。自阻光塵。隕輪寒燠。

計故人之無恙。思君子兮弗諼。非無歸地之方。尅期可至。惜少回天之力。奪命爲難。誠以聚散靡常。悲歡難一。遲速固有定數。急不可強求。果其白首有心。彼此靜以待之。未必無合并時也。茲以正月初吉。一索得男。敬挽上仙。寄還嗣體。是兒福相遠過乃父。懸知夫人賢淑。腓宇覆翼。實嘉賴之。嗟乎。碧雲千里。皎日一心。倚竹有懷。飛蓬莫沐。誰能遣此花濃蝶聚之天。無可奈何。月落烏啼之夜。伏惟保護。動履斂攝。閒情偷蒙念舊。殷拳玩兒股掌。見子卽如見其母可也。林氏妃雪箋上。並頌夫人奩祉。生閱書大慟。款留道士。自抱子入房付妻。妻方苦不育。得子大喜。名曰毓仙。生出謝道士。並求偕訪。妃雪所在。道士不肯。堅求不已。生階前故有紅梅一株。道士袖出一玉杯授生。囑日挹杯水澆之。俟紅梅變白。自可與意中人相見。生再拜受杯。酬以黃金。不受而去。生果如言。日澆杯水。祝其速變。至七八年。紅色漸殺。十年花開全成白色。粉搓玉琢。一片晶瑩。生顧而狂喜。時對花千子。以盼好音。一夜明月方中。獨立花陰。正有所思。忽有人拊其背。曰。故人別來無恙。良夜迢迢。得毋岑寂否。生大驚。視之乃妃雪。大喜。携手至齋中。備訴相思之苦。妃雪笑曰。君子不言妾已知之。江妃感繡像之祀。喜君志誠。又恐始終不能如一。故命道人授玉杯以試之。果蒙用情之專。歷久不懈。不似尋常輕薄兒。始命妾來。

從此可常聚首矣。翌日。生挈妃雪朝妻。妻疑爲仙。齒序姊妹。時子已十歲。聰慧絕倫。自塾中喚歸拜母。妃雪笑撫其頂曰。兒有母覆育。忘所自出矣。妃雪爲人和婉嫻靜。生妻亦愛好之。不與爭夕。妃雪則每勸生就妻寢。其平居與人無異。惟偶食瓜果。絕不嘗烟火物。臨下謙而且惠。每遇失物。輒知盜自何人。藏於何處。即使其人自行獻出。並戒生勿苛責人。以此奉如神明。敬且畏之。生嘗問荅陸山人。知爲羊真人。權因問真人至今尙與羅夫人相聚否。曰。仙人眷屬。與人世伉儷不同。大抵仙人相交。以神不以迹。相接以氣不以形。交以神者。千里不啻一室。卽或有時相聚。則以氣相接。而兩情融洽。真極醞醞化醇之樂。不比人世。必琴瑟而後謂靜好。牀第而後謂恩愛也。生聞之。恍然頓悟。因求授神交氣接之方。妃雪笑曰。君根基淺薄。何遽欲作神仙功課耶。生問神仙功課。當從何做起。曰。當從善事做起。凡人能行百善者。可登上壽。能行千善者。可作鬼仙。能行萬善者。可作地仙。能行十萬善者。則可身超三界。而爲大羅天仙矣。君其勉之。生極爲首肯。自是力行善事。時毓仙十七歲。已入翰林。弱冠卽興學楚南。奉勅迎養。生方求學道。不樂遠行。遂與妃雪留家。惟鍾夫人一人前往。妃雪寄金刀兩柄。付毓仙藏之。以備不虞。後果遇盜。見空中有金甲神擁護。盜不敢犯。又嘗過洞庭。大風掀天。覆舟甚多。

金刀忽躍出匣。化二金龍。夾舟泊岸。刀仍自還匣中。毓仙知母是神仙。焚香遙拜而珍藏之。生幼好學。著作甚富。垂老不倦。彙集全稿。將謀付梓。妃雪取而火之。笑謂生日。君一生徒務虛名。不知名爲造物所最忌。古今享大名。境多蹇塞。不如藏拙爲子孫造福。生以畢生心血。一旦焚棄。殊甚懊惜。而已無可如何。只得付之一笑。從此專心致志。與妃雪講求玄理。初教以按摩吐納之術。久之漸能避穀。年逾八十。面貌宛如少年。妃雪亦將七十。望之猶如處子。生妻鍾夫人先逝。時毓仙之長子鼎。年十八。已入詞館。次子彛。年十七。亦登賢書。毓仙皆遣回事親。妃雪大喜。自爲擇婦。皆稱嘉耦。踰年各舉一子。祖父母出與孫兒婦齒相若。不知者多誤以爲昆季焉。妃雪笑謂生日。古云人老成精。若我久溷世間。雖不成精。亦難免人竊議。不如撒手爲高。生亦以爲然。乃作遺訓付二孫。遂與妃雪更衣含笑。端坐並蛻。毓仙已晉卿貳。京邸聞訃。星夜奔喪。歸葬昇棺時。輕若無物。人多以爲尸解去矣。齋前白梅。自後花開並蒂。家中每有喜慶事。結實愈多。子孫至今。猶以之占休咎云。

淘井得官

蘭陵莊氏。巨族也。其先人某貧甚。爲人淘井以生。一日淘富家井。忽見其下纍纍者。皆

不動尊。遽縋而出。詭辭告主人曰。此中多蛇蝎。我幾爲所螫。飲其水必至殺人。不如其已。富室信之。遂廢其井。不數年。蘭陵大饑。官出示募富民輸金爲平糶計。莊某有戚。伏役於陽湖。乃走告之曰。我有金子。曷爲我白之官。其戚曰。汝固啼飢於年豐者。今遇荒年。得免爲溝中瘠幸矣。顧安所得金耶。強之。乃以其名報令。召之入。則一窶人也。問金安在。莊曰。民無金。焉敢誑官。第獨力不能運來。但遣役隨民往。不必問也。令如其言。乃往叩富家門曰。我來捕蛇蝎矣。卽自入井。運金以出。窮日之力。乃盡。至公堂。權之得三十萬兩有奇。全活人命無算。令義之以聞於大吏。大吏以其名入奏。奉旨卽以知縣用。謁選得福建某縣之官。不數年。循聲大起。適邑中獲海盜。莊視其魁。美秀而文。心憐之。訊畢。召而謂之曰。若文弱如是。何能爲盜。得非爲仇者所誣乎。吾今釋汝。卽破械縱之。去久之。莊棄官告歸。將葬其先人。忽一僧造門求見。莊訝其無因而至。僧笑曰。公不識我乎。我卽公所釋之盜也。自釋出後。欲操舊業。懼孤公恩。不爲。卽無以爲生。因削髮入空門。兼習堪輿。近聞公欲葬先人。而我適得一牛眠吉地。可藉手以報往日之恩。是以來也。莊喜。偕僧往視地。地良吉。遂諏吉營窆。迄今幾二百年。而子孫繁衍。科第綿延。蓋食報正未有艾云。

巧對

吳縣繆嘉穀於乙未春游庠。題爲夫人自稱曰小童。秋間卽登賢書。是歲恩科。題爲君子不以言舉人。好事者贈以一聯云。上已以前猶是夫人自稱曰重陽之後居然君子不以言。真所謂文章本天成。妙手偶得之。

大寶

武進胡姓質庫中。有名大寶者。徽人也。傳者忘其姓。前數年在故鄉。曾因私忿用鳥槍擊傷一人。不半月其人以傷重而亡。幸無人爲之伸雪。遂得免於償。後轉徙至蘭陵。司夜於質庫中。凡質庫中每夜必放槍以示有備。而大寶實司其役。乙未冬夜。大寶持槍欲放。忽回顧見此人立於其側。駭極而仆。而鎗反擊其手。遂至十指糜爛。同事者聞聲而起。扶之歸寢。方欲爲之醫治。突大寶在帳中喃喃作鬼語。歷叙其事之始末。以告人。且曰。吾今可以復吾仇矣。人始知爲鬼之索命也。不數日遂死。嗚呼。殺人償命。王法也。大寶雖暫時漏網。而鬼終能索其命於千里之外。網果可漏乎哉。所尤異者。以鳥鎗殺人。卽以鳥鎗自斃。天道好還。曾不另假兵器也。是尤可爲好勇鬪狠者戒也。

興邑狡婦

明末興邑有某太太者。孀婦也。時有部郎某銜。暫家居。一日晨起假寐于聽事。忽夢一白蟒蜿蜒過。驚起至門外瞻之。則見此蟒滿身縞素。自其夫之墓祭掃歸。過猶未久。部郎適喪偶。既異其夢。復豔其姿。遣人謀合之。妾歸其家。尊之爲太太。太太既入門。持家井井。又善伺部郎意。甚嬖寵之。無何部郎農園赴部。選知蜀中某府。挈之赴任。署中事皆委之經理。明察如神。內外咸憚之。不敢欺。不數年積鑽累千萬。已而部郎死。太太扶櫬歸里。擁厚資居僻壤。所爲多不法事。少年俊好者。留與之亂。里中人稍忤其意。縛之以歸。禁閉一室。絕其飲食。死卽投之水火。前後爲其殺害者無算。先是部郎前妻有二子。遇之虐。次第死。太太亦有二子。長子稍壯。心非其母所爲。太太怒。酖殺之。次子懼。逃匿外家不敢回。由是益肆行無忌。久之爲大吏所訪。擒置太原獄。將治其罪。適是時闖賊旣破寧武。由宣大直薄都門。太原雖不被兵。而鶴唳風聲。警報疊至。太太乃以重金賂獄吏。自繪其貌。寓書於闖賊。大約謂己之財可以佐軍資。己之貌可以充下陳。乞還兵太原。出之獄中。俾得侍巾幗。闖賊得書大悅。自率輕騎疾馳至太原。築長城圍而攻之。太太知李闖已至。先置布腹心數人於獄外。城破前夕。自獄中破械出。遁歸興邑。比城破。闖求之獄中不得。將移師興邑。而太原至興邑四百里。崇山疊嶺。道窄僅一線。

大兵不能至乃已。太太自獄中歸。益橫於里中。適會興朝定鼎之初。亦無過而問者。竟得老死於家。此事距今幾三百年。興邑人猶無不知有某太太者。惜不能舉其姓氏矣。

郡守女

有某命婦者。其夫由縣令而仕至州牧者也。命婦故宦家女。幼隨其父在郡守任。讀書識字外。自刑名錢穀及書劄之往來。財賄之出入。無勿習。亦無勿精。父委任之深。以其不饋爲憾。父沒。其兄爲直隸某縣令。復隨之至任。兄倚之如左右手。不能一日離。以故標梅久賦。猶然待字閨中也。無何女年已三十有九。欲博其歡。先期遣人至江南市女所須諸物。屆期召名班演劇。爲女稱觴。遠近祝嘏者。麇至而雲集。而女自是忽忽不樂。其乳媪疑而問之。女長歎曰。汝試思之。吾至今日尙慶生辰於此署中。汝謂我樂耶否耶。此言出。兄乃悵然。知妹之不可留。遂議爲之擇配。適有某者以資得縣令。需次保陽。慕女之才。而委禽焉。女旣于歸。益展其才。出而與同寅之眷屬往還。久之大吏之眷屬亦與往還。女又於閒時習岐黃書。閨閣中有病。延之診治。無不應手而愈。由是爭重之。而其夫亦緣是得美缺。女之任。謂其夫曰。堂上事我勿能代。好自爲之。其餘君不必與聞。先是夫有四妾。女至卽與夫約。每月己當十夕。四妾分當二十夕。至是設立內簽押。

房晨妝既竟。卽出治官書。四妾左右侍。惟謹。命之退。乃退。內宅門司以二媪送稿者白事者。媪導之入。女可否訖。卽發案。無留牘。邑無廢事。夫之循聲大起。後數年升某州直隸州知州。一日忽於酒後謂其夫曰。州有表率之責。非如縣之易爲。我能佐君理一縣。不能佐君治一州。今吾家雖不豐。饘粥尙能自給。與其戀戀於此。或至蹉跌。不如歸而閉門噉飯之爲樂也。其夫乃商量歸計。女曰。無須。我已爲君移疾矣。大吏處又遣人關說。計必得請。君但靜以俟之可耳。數日代者至。而幕友家丁輩俱不知也。女乃從容料理畢。卽與其夫做裝去。優游林下。其樂可知。惜未詳其女之籍貫姓氏云。

賢主嘉賓

某甲精於刑名之學。無家無室。隻客保陽有年矣。性情孤峭。避俗如仇。其寓內無長物。一木榻可眠一人。一枕鉅若隱囊。有延之者。携此二物往。不數月輒託故去。雖欲強留之不可得。有某縣令者。慕其名。託友人羅致之。友人以其性情告。令曰。無妨也。吾自有籠絡之術。乃延之往。比至潔一室。俾獨處其中。而每晨必有一婢排闥入。手一盒陳案上。云。老太太命送以點朝饑者。久之漸稔。頻以眉目送情。某甲心動。入以游語亦不拒。遂成苟合。一日令至商量公務畢。忽正色曰。人言君品學兼優。自我觀之。學則優矣。品

則未也。某甲知事洩。面赤不作一語。已而悟曰：是矣。是矣。我墮君術中矣。君無多談。自今以往。君作一日官。我佐一日幕。可也。令喜。具妝奩。卽以此婢贈之。而每歲之脩。僅送其半。同列咸莫測其意。卽某甲亦心怪之。然仍感令待之厚。無事不爲之盡力。令由此得能聲。屢遷善地。而某自納婢後。連舉數子。亦漸識有生人之樂矣。後數年。令以親老乞歸。乃核算其前所贏之修。造其室而告之曰：我已淡於宦情。此去不復爲出山計。君不能與時俯仰。他就必不合宜。幸爲君積此金。在歸置薄田。亦足自給。更無俟橐筆遠遊。我兩人從此分袂矣。某甲始知令待己之周摯。俟令歸後。卽挈眷南回。亦不再出。此事凡慕游保定者。無不傳爲佳話。然而令非某甲。不能循聲大起。某甲非令。必至落魄。終身賢嘉相遇。洵非偶然。

九江公子

有九江公子者。自其父長沙太守任歸。夫婦二人。年俱二十餘。一子尙在襁褓中。啓行之日。服御鮮華。輿從赫奕。有盜十餘輩。見而心動。駕一小舟隨其後。將至中途行劫。而公子老成特甚。天明始開。未晚卽泊。泊於人烟稠密之區。離九江僅數日程。盜探知前途無可下手處。議欲回。一盜曰：公子長途辛苦。歸必倦。伺其倦而劫之。是我失之於塗。

而取償於家也。且數千里相隨。顧乃徒手返乎。羣盜以爲然。乃復隨之。公子旣歸數日。盜見其門庭寂靜。意謂防範已疏。乃於人靜時。各懷器械。踰垣進。歷屋數重。直抵公子臥室。見左邊屋內一燈熒然。光透戶外。俯聽之。則公子夫婦方弄其兒以爲樂。凡盜入人家。必先探主人之勇怯以爲進退。一盜乃振其手中叉作聲。以觀室中張皇與否。而室中聞之。卽吹滅其燈。寂無聲息。一似未嘗聞者然。盜心疑不敢下。少頃忽見中室扉豁然開。公子與其妻先後出。公子黑布裹頭。身被一短襖。襖與褲相屬之際。束以黑綾。左手執炬。右手操兩斧。其妻妝束略同。惟裙則曳起。兩前幅拴腰際。以紅綾束之。左手執炬。右手持雙劍。旣出。公子置其炬於左。分執兩斧。面東立。妻置其炬於右。分執雙劍。面西立。背與背相抵。立旣定。公子乃以斧指屋上曰。下。盜大駭。然計無可避。乃推一能者先下。妻聞其墮地聲。回顧公子曰。離耳。君一人足了之。無俟我爲矣。卽收其手中劍。携炬入。公子正立。俟羣盜次第下。乃哂曰。汝輩技倆如此。誠不足膏我斧。今且問來此奚爲。盜魁黻棘前對曰。公子之能如此。更何奢望。惟念數千里從公子來。欲歸無資。倘賜以小資斧。俾不至流落他鄉幸矣。公子曰。此細事。吾嘗給汝。然須靜候庭中。無稍動。動則吾不汝宥也。乃亦收其雙斧携炬入。少間。手千金自室內遙擲庭中曰。汝輩得此。

可歸矣。雖然出宜小心。毋驚吾下人也。言已闔扉進。初羣盜空手來。故能踰垣。今手携千金。勢不得不由扉出。猶幸臧獲輩俱酣睡。無有覺者。迤邐而達最外一重門。突聞旁屋內有人詰問爲誰。盜念出此。卽天空地闊。可以任飛矣。復何懼。且聽其聲年亦甚少。乃不之顧。而爭前拔關。其人已手一梃。啓戶出見羣盜。洶洶卽持挺奮擊。須臾連撲數盜於地。呻吟不絕。餘盜震懾。羅拜乞哀。兼述公子言。其人笑曰。此門吾所司。旣公子意若此。姑不留汝。雖然。爾翁連日缺杖頭資。手中物可留下。勿將去也。盜唯唯從命。乃俟其啓門。扶起撲地者。鼠竄而去。

舟人

無錫人某甲。學貿易於質庫中。丁酉五月間。假質庫名。向錢肆中借番銀百枚。卽喚船往蘇州。尋其兄。一熟船索價昂。僱未定。旁一舟遽謂之曰。客就吾船。吾減半足矣。某甲喜而從之。比下船。開包取番銀一枚上岸。而以其餘置艙中。迨回船則已少其十之三。知爲舟人所竊。念一詰問。必至事發。爲質庫所知。乃隱忍不言。然知舟人非善類。卽藏其番銀於懷。并以值予舟人曰。吾不往蘇矣。舟人曰。客不往蘇。雇吾舟奚爲。無多言。吾請送客至蘇州。卽疾呼其篙工開船。某甲欲止之。則已在中流矣。不得已聽之行。十餘

里至僻處。天已晚。舟人竟劫其資。殺而投其屍於水。捩舵而回。未曉仍泊無錫。鄰舟訝其回之疾。不能無疑。詰之語。又支吾。前一舟因奪其主顧。尤銜之。乃潛往告知質庫。適質庫已知其竊資而逃。覓之其家不得。將遣人至蘇問其兄。至此並知中途有變。遂訟其所雇之舟人於縣。然其殺人與否。尙無左證也。次曉忽有一物逆流而上。至其舟邊而止。審視之。卽某甲之屍也。縣令乃取舟人嚴鞫之。而猶堅不肯承。已而鞫其篙師。篙師嘆曰。是不可逃矣。屍在某處。離此十餘里。乃能逆流而至。謂非冤魂不散乎。遂歷歷言之不諱。且言吾佐舟人操舟久。其殺人行劫已非一次。今茲敗露。是殆惡貫滿盈也。舟人乃無可狡展。論抵而案遂定。

盜改行

懷慶郭某。自遠處貿易回。行李不多。腰纏頗富。僱小車一乘。至第二日。囑俟黎明行。而未五更。卽促之起。旣就道。荒僻特甚。數十里無人烟。天又昏黑。不可辨。且疑且懼。輿夫似已覺之者。笑而慰之曰。客何必爾耶。客囊中所有。吾一望而知。設將行不利於客。則青天白日。豈無僻靜去處。何必昏夜。特吾輩近來。已不爲此。幸勿以夜行爲疑也。聽其言。知舊爲綠林之豪。益懼。然無如之何。姑聽之行。數日。非特無惡意。且甚殷勤。乃沽酒

勞之。從容即其改行之故。則笑曰。吾兩人向者自恃勇力。匹馬縱橫燕趙之郊。非一日矣。某年間結伴七人。將至某處行劫。行至一處。天色已晚。見山前茅屋數椽。四無居鄰。屋旁一女年可二十餘。偕其夫轉轆轤汲井以灌地。姿首甚媚。同伴中一人揚鞭言曰。今夜宿此何如。衆會其意。雜然應曰。諾。前有大林。遂共赴之。解鞍憩息。以待日落。凡吾輩見色而起淫心。謂之採花。犯此未有不敗者。以故人定後。五人者往。而吾兩人留林中。以待已。而念以一纖弱女子。驟遭此強暴。不知其作何狀。乃潛登其屋後之山。靜聽之。則五人者。早已排闥入。而室內略無聲息。方疑訝間。忽聞女子語云。汝竟高臥不起。亦太貪懶矣。男答之曰。汝一人有何不了事。尚煩吾起耶。少間男又問共得幾人。女以五人對。男曰。明明七人。何乃五也。是必尙匿其二於林中。吾當起與汝往共了之。遂見聯袂去。吾兩人大駭。俟其去遠。潛至室中。偵之。則血流滿地。五人者俱身首異處矣。乃知此夫婦近古劍俠者流。吾兩人之得保首領者幸也。於是棄行李馬匹。趁其未回。越山而遁。從此洗心向善。不敢復萌往念云。

人圈

有某甲者。挈其母與妻。商於衛之道口鎮。癸酉之秋。子身歸鄉省墓。至武涉。聞縣逆滑。

匪滋事。掠及道口。亟反奔。已阻於戎馬。不能前。迨蕩平。後至鎮。故居已成瓦礫場。母妻遍覓無影響。以爲死矣。或勸之曰。聞滑縣被難婦女。官爲安置。盍往探之。如未死。可圖復聚。否則宜爲嗣續計。某甲然之。乃如滑縣。至則母妻仍無耗。而其時婦女之從難中出。而無所歸者。官分老少二冊。名曰人圈。出示招人領其法。領者自呈籍貫年貌。以一從征兵爲保。領一少者。必從一老者。少者從圈外遙指而出之。不能更易。老者可卽就所須少者詢之。如有親人許指名以索。某念母妻死。家無人。遂從勸者言。具呈往得姑媳二人。載歸里。議母其姑。而妻其媳。將擇日行合卺禮。媳雪涕而前曰。君待吾姑如此。妾亦何辭。然尙有苦衷。敢以告。妾夫本道口鎮人。去年隨翁商於外。未及難。計聞亂必歸。歸必相覓。請以半年爲期。幸而藥砧重聚。當別圖所以報君。否則爲君室耳。某有觸於心許之。并曰。吾將至道口。招母妻魂以歸葬。兼理舊業。順當爲汝一訪。因問其夫之姓名居址。束裝行。旣至。招魂哭奠畢。依所言訪之。見其家尙完好。未遭兵燹。叩門入。一少年出坐而告以故。其人泣拜曰。君真長者。此卽吾之母與妻也。已而其父出。延某入內室。隱隱聞哭泣聲。問之。則曰。向者聞亂。歸覓母妻不得。亦疑爲死。適塗遇二婦人。爲亂兵所掠。詢知爲姑媳。憫而贖之。初無他意。昨父以宗祧爲重。議以媳妻我。此婦守貞

未允故泣。今得母妻耗。無事玷其貞矣。然安頓亦殊不易。婦自言懷慶人。君與同鄉。亦知其家否。言已呼之出。一見大駭。乃卽某之母與妻也。於是始而抱頭泣。繼而色然喜。終乃泥首望空謝。以爲天之報施善人。如其不爽也。翌日載其母與妻歸懷慶。并邀其人迎其母與妻回道口。後來某甲復商於道口。兩家往還密於親串云。

糊塗廟

萬全縣往北十里許。有名糊塗廟者。不知所始。或云縣與山右接壤。廟祀晉大夫狐突。晉之訛而爲此。理或然也。今之廟額則曰胡神。其貌鬚鬚卷而狀獐。惡絕類波斯。相傳七月朔爲神誕辰。土人演劇酬神。遠近畢至。男女焚香膜拜。三四日乃已。其廟踞山坳。前三楹以供神。後則廟祝居之。雜樹毳毳然。茂草茸茸然。聞之士人云。神司雹於此。土稍慢之。則硬雨爲災。秋稼必受其害。故奉之不敢不虔。其說荒唐殊不足信。因憶袁才子隨園詩云。消受香烟管何事。人間土偶福原多。今土偶而加以糊塗之名。宜其蒸嘗此土。永永無極也。

小脚會

遊宣化者。競言宣化有小脚會。其會於五月十三日舉于城隍廟。廟前長街數里。兩旁

民居稠密。先會數日。其親串之靚妝炫服而至者。絡繹不絕。屆期廟中酬神演劇。百戲競集。游人雜沓。與士女之進香者。肩相摩。踵相接也。其不往游及既游而回者。大率排坐門前。多或十餘人。少亦五六人。紛白黛綠。彌望皆是。視其裙底蓮鈞。纖小者居多。遂至此稱著於遠近。卽彼中人亦沿其訛而不知。嘗詢之一老者。則曰。烏有是哉。君曷不思。是日乃俗所謂漢壽亭侯誕日耶。蓋會本在漢壽侯。祠故有甲。是日出而暎之。故名暎甲會。其年廟欲圯。廟祝鳩工庀材。葺而新之。未落成而遇是日。不得已借城隍廟以舉斯會。而城隍廟祝豔其利。百計籠絡。至明年復爲斯會。紛紛者已不復爲故步之循矣。然暎甲之名。猶在人口。久之遂誤而爲此。非其故也。乃嘆郢書燕說。訛以傳訛。天下事之類此者。豈獨暎甲之誤爲小脚哉。

木蘭祠

直隸保定府屬之完縣。在漢時爲曲逆。陳丞相平所封也。其地有孝烈將軍木蘭廟。取縣志查之。則云將軍魏姓。亳州人。漢文帝時曾備扈從。來曲逆。故於此立祠。其言與本詩異。爲人之附會無疑。然廟甚修整。山門外白楊十餘樹。森然成株。廟內鐘樓鼓樓。分列左右。蒼松翠柏。俱百餘年物。將軍戎服坐帳中。狀極雄武。而仍含娟媚之態。旁一侍

者執刀一侍者控馬。皆凜凜有生氣。四月八日爲將軍誕辰。釀錢作會。傾動一邑。俞綱花先生有詩記之。今附錄於此。云。昔我就傅初。曾讀木蘭詩。今我曲逆游。更謁木蘭祠。古柏森成行。枯楊高無枝。繚垣藤蔓繞。玉座苔紋滋。惟神孝且勇。大義君親知。胡騎突犯塞。漢將遠出師。暮見軍帖下。且與爺娘辭。荷戈十二年。撲朔迷雄雌。卽今崇廟貌。猶似從征時。刀光陣雲結。馬鬣邊風吹。我來別斷碣。弔古生遐思。明妃環佩魂。蔡女胡笳詞。和親已足恥。失節尤堪嗤。不圖閨閣中。得此英雄姿。居人緬舊烈。廟食良非私。擬俟浴佛日。來奠神前卮。

韓女

花木蘭事甚奇。流傳至今。猶藉藉人口。及觀平蜀錄。乃知閨閣中自有此等奇女子也。平蜀錄載保寧城中有韓氏女。年十七。遭明玉珍兵亂。慮爲所掠。改作男裝。混處民間。旣而果被虜。居兵伍中七年。人莫知其爲女。後從玉珍兵掠雲南回。遇其叔父。贖歸成都。以適尹氏。人皆稱爲韓貞女云。

靈光

臨平鄉間某氏女。未嫁而夫亡。立志不適人。父母憐之。爲構一小樓。俾長齋奉佛其中。

足跡不下樓者數十年。後聞其夜分跌坐蒲團。有時忽大放光明。照見室中一切諸物。人皆以爲事佛之效。僕謂此乃其女自有之靈光耳。大凡人之生也。皆有此靈光。汨於聲色貨利而失之。此女乃能看破萬緣。堅持一念。由靜得定。由定得慧。此一點靈光。遂時時逗露。若虛室之生白。然奉佛如是。卽不奉佛亦如是。而人乃歸功於佛。則吾見手菩提珠。口伊蒲饌者。衆矣。何盡昏昏然。若墮五濁界中。不聞有一線之明也。

借尸還魂

嘉興有張君者。名孝廉也。死將斷七矣。離嘉興數十里。王店一賈人子。死而復蘇。張目視其父曰。汝誰耶。其家以其新蘇。故語言瞽亂耳。已而復言曰。吾城中張孝廉也。偶抱微疾。誤飲醫者之藥而死。今奚爲而至汝家。因歷數其家中人。并生前事甚悉。一時喧傳。以爲某孝廉復生。後聞未踰月。賈人子仍死。是豈孝廉不樂生。賈人家耶。抑游魂所之偶然湊合。本有不可常者耶。



聞見述奇卷之三

海上醉花生琴珊氏述

野人頭

光緒紀元初夏。滬城小東門外。有某西人賃屋張幕。懸招云。內有外國人頭一顆。能言語。能吸烟。進內觀者。須先納洋蚨一角。後漸減價至數十文。一日予偕友人偶經其處。納資進觀。見門以內張有綠色布帷。室中黑暗如漆。四壁懸兩洋燈。中間設一小圓板。桌上安放似一圓盤。盤中卽外國人頭。目光灼灼。口銜雪茄煙。觀者如堵。好事者問之曰。爾之身在何處。見外國人頭操中國口音答曰。吾爲虧空了東家的銀子。故身體寄在外国。觀之良久。亦無甚破綻。惟不解其下截之退藏於密。閱數日。無賴輩數人。身藏枇杷核進內。雜投人頭之桌底下。戲法遂破。蓋四面以迴光鏡照護。而其身乃得蔽而不見云。

三脚女

金陵城外有一中年婦人。携一女郎。碧玉年華。貌頗娟好。云是胎生三足者。於空闊鬧市處。日設圍場。引人觀看。藉炫其奇。獲利頗夥。旋有蘇屬某觀察因公晉省。偶過圍場。

見之亦深爲詫異。不免疑信參半。爰使從者立喚官媒至。辨其真僞。乃洞燭其奸。其法用一木梢。外裹豬皮。繞以腳帶。穿以花鞋。與真足大小相等。拴縛腿際。官媒稟明觀察。遂究問中年婦人。猶冒認母女。觀察大怒。送縣訊出真情。實係拐騙。飭將拐婦重懲。並召女之父母到案。具領回家管束云。

方俊官

伶人方俊官。幼以色藝擅場。爲士大夫所賞識。至老而販鬻古器。時來往京師。嘗覽鏡自嘆曰。方俊官乃作此狀。誰信曾舞衫歌扇。傾倒一時耶。俊官本儒家子。年十三四歲時。在鄉塾讀書。一夕忽夢爲笙歌花燭。擁入閨闈。自顧則繡裙錦帔。珠翠滿頭。俯視雙足。亦纖纖作弓彎樣。儼然一新婦矣。驚疑錯愕。莫知所爲。然爲衆手扶持。不能自主。竟被扶入幃中。與一男子並肩坐。且駭且愧。悸汗而寤。後爲狂旦所誘。竟失身歌舞之場。乃悟事皆前定也。

佟阿寶

浙人佟阿寶。年七歲。出就外傅。一日自塾中歸。塗遇拐匪張乙。將手在阿寶頭上一拍。阿寶遂覺心中迷罔。後有猛虎。兩旁皆水。惟見張乙在前。祇得急急隨之而走。至一荒

僻去處。見有草屋數椽。張乙攜之入。中有婦人。約四十許。聽似揚州口音。卽張乙之妻鍾氏也。夫妻問訊畢。鍾氏便問此子何處得來。張乙一一告之。鍾氏曰。如此美秀童子。絕似女郎。曷勿飾之爲女。以冀發注大財。張乙鼓掌稱善。婦遂爲之穿耳裹足。阿寶聲喚呼痛。反受撻楚。祇得忍痛飲恨而已。不半年。張乙挈鍾氏阿寶回揚。僞稱爲女兒。人亦莫知其爲維者。張乙鍾氏頗鍾愛阿寶。市軟骨藥。日夕爲之纏裹雙足。不三年。尖如春笋。約之祇三寸餘長。並教以吹彈歌唱。書畫雜技。阿寶性甚聰明。貌又娟秀。年十四。諸技均已嫻熟。忽張乙病癡身死。鍾氏遂徧托媒媼。願將己女售作小星。逾年。阿寶已芳齡十五矣。適有山西富商薛椿。年已近艾。腰纏十萬。買棹來揚。欲娶一妾。遍相不中。及見阿寶。丰姿美麗。裙下雙鈎。尤纖細可愛。並善諸藝。覺西子南威。亦不是過也。詢以聘金幾何。則曰非三千金不可。薛椿允諾。遂成議。約人銀兩交。當卽回舟。兌銀。傍晚肩輿抵舟。鍾氏親送阿寶至。母女依依話別。遂攜銀而去。薛椿攜阿寶手入艙。命僕設筵宴飲。遂喚阿寶彈箏度曲。鬢影衣香。與燈光相掩映。更覺嬌媚動人。薛椿大悅。飲興豪邁。醉態橫生。至月色沉西。方始歸寢。春風一度。莫辨雌雄。緣鍾氏先已教導阿寶。以帛縫一夾袋。將陽物收入。曳起。網縛肚腹上面。外罩抹胸。甚是熨貼。然後以後庭就之。且

將雞子鑿通後庭烏道。就淫時亦不覺柄鑿之苦。阿寶初本不肯。經鍾氏再三哀懇。謂爾父已喪。老娘教養一場。亦自不易。况老娘年邁。吾兒嫁去。倘當晚破露。老娘不及逃避。性命難保。言訖。潸然泣下。初鍾氏除與阿寶纏足外。異常愛惜。阿寶感其情。且張乙已死。亦不忍讎焉。因問鍾氏如此作用。母何爲而知之。鍾氏謂我父亦伶人。因得深知其故。且交合時與女子愛情無異。兒試爲之。方信娘之不欺兒也。阿寶從其言。與薛椿交歡時。對面相偎。以後庭急就之。果與女子愛情無異。因亦安之。連宵歡洽。寵愛非常。薛椿遂返舟歸里。乃別築香巢。阿寶所欲金珠衣飾釵釧等物。無不惟命是聽。相處閱四五月。薛椿猶以阿寶爲女。時當盛夏。天氣炎熱。一夕阿寶浴罷。未將陽具藏過。不意薛椿醉而早歸。遽把阿寶抱置膝上。以手撫摩下體。忽觸陽物。覺垂纒盈掬。亦偉器也。訝之。因詰問其故。阿寶實告隱情。細述顛末。薛椿非惟不怒。且愛憐之。謂卿如不遇張乙。我亦安得遇卿。阿寶哀懇勿洩其事。妾願常抱衾綢。以報厚遇。薛椿曰。卿如此可人。勝真個女子十倍。何忍洩卿隱情。卿母過慮。嗣後卿自慎之。勿露痕迹於婢僕耳目可也。遂喚僕婦。命再置酒與寶姑娘夜飲。阿寶殷勤侍坐。對月開樽。至漏下二鼓。方撤席歸寢。阿寶便將房門閉上。小坐納涼。薛椿遂並坐窗前。與阿寶偎倚。但覺粉香撲鼻。旖

旋動人。因將阿寶所穿紗衫鬆却金鈕。露出銀紅紗抹胸。與雪白肌膚相襯。且映着月光。十分嬌豔。提抱於懷。解其裙帶。褪去小衣。阿寶已將陽物曳起。收入夾袋。捆於小腹之上。外罩紗肚。妙處空空。宛如好女。更喜兩鬢如雲。雙鈎如筍。嬾娜輕盈。覺女子無此媚態。不禁神魂飛越。遂攜手登湘妃榻。相與纏綿。阿寶以小足鈎薛椿腰。曲盡其媚。正如西廂曲本所云。賸見你鞋底尖兒瘦。薛椿謂阿寶曰。卿肯從我終老。於願足矣。阿寶曰。妾自蒙君寵眷。此心已化作女子。今醜形已露。幸君仍不見棄。妾非草木。豈敢負此愛情。恐他日色衰愛弛。棄妾而別置新人耳。薛椿曰。卿慎也耶。卿色衰時。我將就木矣。復何慮哉。阿寶曰。君雖愛妾。府中姊妹輩知之。必恨妾之惑君。還宜雨露均施。妾亦免招尤怨矣。薛椿聽之。自此乃不時回家。家中大婦已五旬。向外持齋奉佛。久不爭夕。置有兩妾。寵眷不逮阿寶。薛椿每經商外出。必攜阿寶偕行。人視之。均羨其爲艷妾。而莫知其爲變童也。後薛椿恐阿寶髭出於腮。雖日事薙削。終多不便。因購得潘安散藥末。使阿寶塗之兩三次。腮邊唇上。可終身不毛矣。阿寶尤工女紅。製作絕精巧。婉戀依人。無一毫男子狀。薛椿故深喜之。光陰彈指。相屬十有餘年。薛椿已花甲羸二。阿寶亦三十九年華。薛椿忽構喘急之症。自知荒於酒色。不久人世。一日謂阿寶曰。卿從我十餘年。

徒無忤我之意。家中妻妾弗如卿也。卿所儲蓄金珠釵釧珍物。不下二萬金。卿攜之回鄉。亦足以度日。篋中尙有二千餘金。并付卿携去。卿善自爲謀可也。况卿又假女。義不必守節。卿可速去。我病不能起矣。阿寶泣不忍去。薛椿囑後。越數日命輿歸家。日漸羸弱。不三月。薛椿竟歸道山。阿寶聞耗。急更渾身素縞。遙祭哭奠。守孝三年。服闋後。方買棹擁贊歸鄉。身旁隨有一老僕。一粗婢。水陸兼程。閱兩月餘始抵浙之平湖故鄉。細細訪問踪跡。方知老母尙在。適家中有餘屋出租。因思驟然認母。必招物議。先租其屋居焉。將衣裝輜重安頓停妥。後遣去老僕。留婢秋菊。隨身伺應。秋菊雖粗婢。然貌頗白皙。惟裙下雙趺。不耐迫抹。故六寸膚圓。絕類男子。阿寶越三宿。晚餐畢後。俟至人靜時。逕至老母處。母姓胡氏。年逾六旬。人頗清健。胡氏見阿寶至。便起身讓坐。謂大娘娘何不早些來。顧我談談。阿寶答以無暇。胡氏烹茶相款。阿寶詳詢父親諱號。及幼時所記家中情事。無不一一吻合。忙抽身趨前。屈膝塵埃。拜認胡氏曰。真吾之親娘也。胡氏急扶住阿寶曰。大娘娘休錯認了。老身從未生過女兒。所生一子。已於七歲上被匪拐失。至今存亡未卜。大娘娘切莫錯認。阿寶謂胡氏曰。兒卽當年母所生之阿寶也。母請勿疑。胡氏曰。既是吾兒。豈有年逾三旬。腮邊無鬚鬣根抵。且裙下金蓮纖細。不盈一握。大娘

娘幸勿戲弄老身。阿寶曰。髭不出腮之故。實因抹了潘安散藥。至纏小兩足。爲拐匪張乙之妻所害。遂將被拐時如何情形。鍾氏設策爲之蓄髮貫耳。并方軟骨藥。日夕燻洗。緊裹雙足。並使學習歌曲絃索等諸藝。張乙病死後。兒於十五歲時。鍾氏賣兒與山西富商薛姓爲小星。再三懇兒勿露形骸。俾免破獲。經官懲辦。以保性命。兒感鍾氏平時恩養。且哀其老。因從其教。胡氏訝曰。兒雖女粧。旣作小星。必共寢處。安有不露形骸之理。阿寶面紅耳赤。赧然良久。默不作聲。胡氏逼問再四。阿寶不得已。將鍾氏所教。先以鷄子把後庭鑿通。烏道袋起陽具。能對面以後庭就淫。且受淫時亦甚得樂趣。已自忘爲男身矣。胡氏又問阿寶曰。兒旣嫁與薛氏。如何今得回鄉。阿寶又將薛椿如何寵愛。露形之後。亦並不根究。鍾氏且寵幸不衰。兒雖虧體辱身。亦無所怨恨矣。薛君遺贈金珠釵釧珍異之物。約值二萬餘金。至患病時。囑兒先回鄉井。兒不忍負恩。俟薛君歸天後。守孝三年。以酬厚遇。今始得回故里。見我娘親。實夢想所不到也。胡氏聽畢。阿寶所言。不禁悲喜交集。因謂阿寶曰。如今兒已回家。何不速換男裝。阿寶泣曰。兒之兩足經軟骨藥燻洗後。已骨軟如絲。九歲時已纏成如此瘦削。前日抵家後。試去腳帶。竟至寸步難移。祇得仍以縑素束縛纏裹。卽連鞋套入靴中。亦行動不來。况自穿耳裹足以後。

便習慣女子舉止。一時亦不易改變。且兒身已久經玷辱。亦羞復本來面目矣。胡氏曰。據兒之說。將終身雖伏。寧甘不娶乎。嗣續奈何。阿寶沉思良久。顧謂其婢秋菊曰。汝肯爲我之夫乎。秋菊曰。寶姑娘如何吩咐。婢子敢不如命。阿寶曰。汝類天足。去了腳纏。可穿靴襪。並將覆額之髮薙去。改作男裝。擇吉成親。爾爲丈夫。我爲妻子可也。勿再稱我爲寶姑娘。今卽改口稱我作妻。我亦認汝爲夫。慎勿露情。媿親亦切勿洩兒隱事。有人問時。說是認義女兒。以遮兒之羞顏。胡氏顛首從之。翌日婢卽改裝爲男。更其名曰菊秋。胡氏僞云。薛氏之婦。孀居無依。因認爲義女。坐產招夫。成婚之日。遍請親鄰。莫不嘖嘖稱新娘之美麗。新郎之豔福。雖神仙亦不知其男女之顛倒也。阿寶雖年逾而立。祇知獻媚男子。從未御過婦人。成婚之夕。滅燭後。菊秋戲探阿寶隱處。仍未解束縛。阿寶反羞澀如新婦。默不作聲。因爲之解帶探囊。出玉杵俯而就之。遂成燕好。阿寶始知有男子之樂。嗣是夫婦和諧。不離形影。阿寶出金珠珍貴之物。先鬻其半。得萬餘金。購置良田美產。廣造堂廈。並開南北雜貨鋪。兼售糧食。使菊秋經理其事。僱用夥計。日漸發達。利市三倍。生涯之盛。甲於一鄉。不止十年。鄉里稱素封焉。阿寶自與菊秋結褵後。踰年生一子。臨產時。秋菊托疾不出。胡氏與阿寶洗兒。亦不僱用收生婆。恐人覬其隱事。

也。子僱乳媪撫育。越三年又生一女。仍僱乳媪。子女亦另室而居。阿寶菊秋深自蓋藏。生女一年後。胡氏死。菊秋執孝子禮。阿寶麻衣孝髻。如新婦然。喪葬盡哀。三年始釋服。夫妻掌理家業。井井有條。菊秋呼奴使婢。居然作富家翁。每逢薛椿忌日。阿寶親設酒果。遙爲祭奠。盛粧叩拜。人皆知其享祀前夫。不忘恩義。阿寶之女名翠娟。梳頭纏足。教習女紅等事。均是阿寶任之。及長配與任姓秀士爲婦。子名振家。讀書未成。納粟爲上舍生。娶張姓女爲婦。頗稱賢孝。振家席豐履厚。及壯。爲父母輸捐請封典。婢僕輩都稱菊秋爲太爺。阿寶爲太太。阿寶自嫁薛椿。露形一次。後時刻留心。不肯露一毫圭角。性喜修飾。雖年近花甲。仍是施朱敷粉。翠繞珠圍。纖足挪移。如臨風弱柳。彷彿半老佳人。子婦弗如其豔冶也。親戚有喜慶事。阿寶必盛粧而往。袴下來以經布。僞作紅潮汛。至狀。雖與婦女同寢。亦泯然無迹。卽子女亦以父爲母。以母爲父。不辨雌雄。阿寶至老。仍堅囑菊秋秘密形迹。勿洩隱情。妾死後仍作女粧。萬勿使人識我底蘊。以蔽羞顏。菊秋亦深韙其言。一夕阿寶卸粧歸寢。枕上私謂菊秋曰。妾與君情緣將滿矣。菊秋低聲曰。寶姑娘何忽言此。阿寶忸怩曰。妾自薛君去世後。每月必夢一二次。與薛君交歡狎暱。疊股而眠。蝶襲殊甚。前夕又夢薛君謂妾曰。再隔三年。可常聚首矣。菊秋曰。此是寶姑

娘思念所致。夢寐無憑。後閱三年。阿寶果卒。享壽七十有五。菊秋遵阿寶所囑。殮時具鳳冠霞帔。蟒服朝裙。裙下雙鉤。仍纖細如筍。菊秋見之。傷心慟哭。哀毀過甚。踰年亦卒。菊秋抱病昏瞶時。始洩其隱事於人。迨稍稍清醒。覺而悔之。已無及矣。因囑子婦。須以男子冠服殮我。以順汝姑之情。子婦亦遵其教焉。此事僕人趙茂言之甚詳。云是雍正乾隆時軼事。予因其奇而述之。

朱大圭

有營兵某甲。娶鎮江婦人朱氏。年二十餘。貌亦中人姿。裙下雙鉤。約六寸許。略略攔尖入門之夕。卽向某甲伸說曰。妾現當走陰差使令。不能同床共枕。設或違忤。必遭神譴。夫妻亦難久。請俟半年卸差。後再行與君燕好。某甲曰。偷神不准。汝卸差。遂終年不共枕席乎。朱氏曰。若一年後。仍要當差。妾爲君另娶一妻。與君共成連理。何如。某甲許之。遂異室而處。朱氏善修飾。雖釵荆裙布。然梳裹清潔。亦楚楚可人。待某甲甚厚。伉儷頗篤。某甲畏神憎怒。故不敢與亂。朱氏每出爲人看香頭治病。所獲銀錢。不吝與甲費用。甲甚喜之。自是恩愛逾恒。閱數月。突有某乙。僞爲有病。使人邀朱氏至家看治。遽將臥房掩閉。欲肆強暴。朱氏猝不及防。被某乙抽解裙帶。腿下小衣。頓露陽物。竟破其隱。某

乙將朱氏扭交警局。局長飭差送縣。邑令訊問。朱氏供稱名喚大圭。因母曾習走陰差。母死之後。轉傳其業。官怒其男改女裝。妖妄惑衆。治以應得之罪。擬站籠示衆。某甲知之。若喪魂魄。跟踪至縣。官勸諭再三。甲終難釋然焉。

妖異

光緒丙子夏六月。訛言四起。夜有黑氣壓人。如患夢魘。更闌人靜時。入此室處。紛出擾人。初見時其形大如貓。漸大如牛。口噤不能言。蘇常兩屬鄉間。被擾尤甚。至有被魔壓死者。人以刀劍砍之。反傷家人。惟懼以鑼鼓闐闐聲始止。因是民間每夜伐鼓鳴鈺。或擊木板作聲驅之。達旦不息。又有人之髮辮。不知不覺。忽然截去。謠傳百日之內。其人必死。又人身手臂間。倏現印記。如蓋圖章。洗濯不去。謂印記移至心坎者。其人亦死。此數異者。予皆目覩其事。後卒不驗。所謂妖由人興。人苟不爲所懼。妖氛不久自息。按蚓菴瑣語。載順治季年。有妖人從空呼人姓名。其人應之。百日內卽不救。一時市人貿易者。皆以筆代口。未幾哄傳妖來。晚間先有怪風作腥膻氣。屋瓦皆鳴。初數斗瓮。一轉瞬間。倏爾變爲黑鬼。或作禽獸犬馬之類。奇形怪狀。幻化不一。後來亦卽消滅。亦不類而類者也。

童子索命

有時醫陳曲江者。或謂甬籍。或謂蘇籍。不知其詳。有欲延其診治者。請封極昂。且有定價。某處至某處。需洋若干。其時有長洲婦人。軼其姓氏。已喪所天。家道赤貧。生一子二女。子年十二齡。四房祇此一子。適子患重疾。鄰人僉謂須延陳曲江診治方好。奈乏請封。無可貸借。不得已將二女孩出售於人。得價英洋十一元。亟延陳曲江治之。不料請其四次。非但不能奏效。竟致不起。其母痛子。幾不欲生。閱數日。陳醫出診甫畢。乘輿將回寓。忽在轎中大呼曰。爾非某姓之十二齡童乎。後竟寂不聞聲。僵死輿中。其爲童子之索命也無疑。或謂被陳醫誤投藥劑所殺者。豈止一人。維彼童子。何以獨來索命乎。予謂不然。童子一死。宗嗣因之而斬。兩妹并不留存。憤無由洩。想亦告諸閻摩而來索耳。世之庸醫。視人命如草菅者。可不戒哉。

許阿妹

歇浦之東。有許阿妹者。鄉人也。業唱花鼓戲。嘗男扮女裝。演唱淫詞豔曲。恒夜間在茶肆中斂錢度日。鄉人之觀聽者。趨之若狂。邑令聞之。以其有傷風化。不數月。即嚴行禁絕。許阿妹年二十。忽蓄髮穿耳。纏足。頓改女裝。母亦聽之。並習女工針黹。不知如何。妍

識一待詔。卽俗謂剃頭司務者。儼然夫婦。阿妹有烟霞癖。日需二三角鷹蚨。待詔無力供應。不得已阿妹又嫁一成衣匠。初時僞稱有疾。患心腹作痛。繼又假託行經。不與縫工共枕。如是者將及個月。一夕縫工俟阿妹睡熟。思就而淫之。及腿去小衣。見是男身。遂扭交巡防局。局員畧訊一過。遂移送上海縣署。時邑侯爲李紫璠大令。許阿妹已二十八歲矣。邑侯怒其男女混淆。斥責二百大板。並令荷校遊城示衆。予曾親見之。觀者途爲之塞。阿妹猶作時世妝。前髮覆額。抹粉塗脂。身穿女襖女袴。裙下雙鉤。雖非纖細。亦畧畧裹尖。宛然一鄉間婦人。及示衆三日後。發交普育善堂羈押。閱半載。患怯症而死。上憲聞之。行文提省。擬從重懲辦。已魂遊墟墓間矣。

燒火三相公

浙人某業儒。頗有文名。後成歲貢生。有三子。長子某甲。食邑餼庠。次子某乙。亦補博士弟子員。均有聲譽。序。父亦鍾愛之。三子某丙。性愚拙。屢應小試。不得一矜。父因不喜。罰令灶下執爨。故人稱之爲燒火三相公。每逢歲科考試。並鄉闈省試。父命隨二兄偕行送考。兄弟三人均已娶婦。三相公之妻。心懷不平。某年適又逢大比。急典質釵珥。爲夫捐納監生。促三相公與兄共應鄉試。某丙從之。至省考錄遺才。場中幸遇同窗促刀。得

以完卷。居然錄取入闈。及至進場。出題。首題爲子曰譬如爲山一章。三相公專恣飲啖。並不動筆作文。鄰號生訝而問之。則以不知作法對。鄰號生戲之曰。不難不難。祇須就典林上山字出典。及地字故實。搬衍成文。便可完篇。三相公便向鄰號生借取典林。拉雜抄之。草草完卷而出。三場考畢。弟兄旋里。長次兩子。錄出考作。呈父評閱。父甚色喜。以長子爲必中。以次子爲亦可望中。三相公見父贊二兒之文。不覺技癢。亦將文字送與父閱。其父閱未及半。擲之於地曰。此亦可算文字耶。汝還是去燒火去。三相公慚沮而退。是科主試。性甚古僻。同考各房官。請示主試意見。主試曰。此間有真山真水之勝。文亦取其真而已。某房官得三相公卷。見滿紙山字地字故實。殊屬不成爲文。因笑置案頭。不意爲隔房同考官見之曰。此卷大可戲弄主試。某房考曰。恐觸其怒。隔房考曰。咱們十六房公具薦條云。此卷的係真山真水。看渠如何。某房考竟糾衆薦上。主試見之。明知戲已。拍案稱妙。副主試異而索觀其文。不覺駭然曰。此文恐嫌山水太真了。主試怒曰。吾爲政吾自主之。竟拔置解元。及揭曉。三相公之父喟然曰。真所謂窗下休言命。場中不論文。今而後吾不敢矜眸子之明矣。

老夫女妻

涪州周大司馬煌。其祖出身係峨眉山樵夫。年九十九歲。猶未娶妻。一日忽於溪中得金銀若干。與所善貧人吳翁謀。遷居城中。且囑爲媒。願以萬金爲聘。但非處子不可。吳笑諾之。歸而告嫗。謂九十九老翁。誰肯與爲婚者。時吳女年僅十九齡。忽跪而請曰。父母貧且老。生女不生男。何恃。今周叟高年。驟獲多金。天將福之。未必遽終於此。女願嫁之。父母得萬金之聘。可以娛老矣。人各有命。女如薄相。嫁年少者。未必不孀也。吳夫婦奇其言。以告叟。叟喜甚。卽日委禽成婚。後年餘生一子。時叟年已百歲矣。及見其子遊庠抱孫。後乃卒。壽至一百四十歲。女先一歲卒。已五十九歲矣。信人瑞也。此係乾隆年間事。

錢相國

仁和錢相國人琦。應丁巳科會試。公車將發。友人吳某治酒饌行。至則不見酒肴。而主人有愧色。怪而問之。吳曰。寒家素有狐仙。今日早已治具。忽被攝去。奈何。錢戲曰。主人惜費而托故於狐耶。吳窘甚。邀客往厨下驗之。爨火未熄。毛血之屬尙存。而餽核全失。錢大呼曰。我有一言奉問。此去若能登第。狐仙還我酒肴。否則竟全請啖之。我亦無顏相擾矣。言畢出。未久。吳笑而至曰。恭喜。今科必中。酒肴已還在案矣。歡飲而散。是科錢

果成進士。後仕至相國。

藏魂罈

費雲軒元龍。乾隆丙辰進士。知四川綿州。時有惡棍爲地方害。費廉得其罪狀。杖斃之。閱三日復活。後毆其母。母持一罈來控。曰：此逆子藏魂罈也。先將生魂煉藏此罈內。官用刑。乃血肉之軀。以久煉魂。治新傷體。三日卽平復如故。求先毀其罈。散其魂。庶逆子可除。官如其言。果斃杖下。傳言晉殺秦謀。七日而蘇。此種事自古有之。然邪不勝正。况又逆倫。天壤間豈容梟獍漏網哉。

張大美

山東秀士張大美。素奉關帝甚虔。乾隆乙亥。張患病甚劇。恍惚間至關帝廟。見帝方陞殿理事。著清朝衣冠。威儀嚴肅。張怵息不敢仰視。有頃。問呼張名。張匍匐至階下。帝在殿上語之曰：吾廟中楹柱對聯。泛而不切。俚俗不堪。甚不愜意。爾與吾有香火緣。其爲我改之。張跪誦一聯云：數定三分扶漢室。削吳吞魏。辛苦備嘗。未了生平事業。志存一統。佐熙朝。伏寇降魔。威靈丕振。只完當日精忠。帝深加歎賞。曰：此四十二字。爾來歲當知好處也。張叩謝而出。遂寤。不解來歲何云。次年鄉試。張坐矮屋中。搆思未就。倦而假

寐夢帝肘之曰。起起爾。忘對聯字數乎。張驚醒。文思沛然。援筆立成。三藝如宿構然。是科中式第四十二名舉人。

恒山學博

客城張進士南川。父某以歲貢銓恒山學博。食俸十二年。僅積八十金。孺人以公年屆六旬。已年亦五十有七。子嗣無望。力勸歸田。公從之。乞休返。行裝蕭索。不一及肩。次保陽旅邸。聞鄰婦老少相泣。異而詢之。知老婦有子。爲催科役。虧官糧三十餘金。限甚迫。其妻計無所出。將自鬻以償。是以悲耳。公惻然欲解囊以濟。慮孺人中阻。太息不已。孺人先亦詢知始末。亦以力薄斂容不敢請。公會其意。以告孺人。慨然如數代償。全其骨肉焉。次早車過西城舊石坊下。聞空中似有人云。該死者至矣。又有人云。昨以積善免。且有一子登第。語甫畢。石坊崩下。去車尾僅尺許耳。旣歸。孺人以車中所聞語告公曰。一念感彼蒼。或者其有後乎。勸之置妾。不可未幾。孺人信水復來。居然生子。卽南川也。遠近聞而異之。南川自幼聰穎非常。年十七成進士。得榜下知縣。出宰百里。頗有政聲。二老人就養任所。俱享大年。積善之報。真捷於影響矣。此亦乾隆年間事。

拾金不昧

江北張某軼其名。爲人經紀。收債於江寧。歲暮將歸。黎明肩行李出城。門未啓。立市櫓以待。倦甚。以置金之布搭。坐身下方。閉目。城遽啓。忘携身下布搭。僅肩行李出城。行里許。始覺。急返覓舊所。已各肆俱張。人如雲集。而布搭不知去向矣。於此愁眉觀望。徘徊不已。一老者詢故。以實告。邀張入曰。今早啓門。得有遺物。未識相符否。張曰。爲東人歸者。兩大封。其小封則已物也。錠數分兩。各若干。老者驗係原物。卽還之。張感泣。愿以己金奉老者。笑曰。吾果愛財。頃亦不言矣。君何不諒也。張不敢強。因拜謝之。各道姓名而別。張抵江待渡。而風大作。渡舟多覆。溺人無算。張惻然曰。吾所携之金。失而復得。吾命亦屬再生矣。悉出己金。買救生者。操舟往救。立拯數十人。皆感謝。彼此通姓名。中有一少年江寧人。往江北貿易。回家度歲。卽還金老者之子也。張異之。告以故。聞者莫不歎天道之報施不爽。後二氏往來交好。結爲婚姻。可見濟人卽自濟也。

林秀

林生名秀。蜀之瀘州人也。貌奇醜。面黑而多麻。縮腮短項。圓目凹鼻。兩耳翼翼如葵扇。招風。惡狀不可殫述。年十七。無肯與論婚者。然秉性甚慧。文理已楚楚可觀矣。至省垣就學於某師館中。同館生十餘輩。怪林貌惡劣。呼之爲林醜醜。林亦自以爲憾。而無如

何時屆清明節。館師放假歸。諸生出游於浣花溪上。見婦女往來絡繹。燦如雲荼。遇美丈夫。則以秋波流盼。目挑心興。極諸冶艷態。獨見林卽趨避。且惟恐不速。諸生皆厭之。相戒詰朝勿與偕。旣歸。皆曰。今日敗興。游得不暢。意林默然而媿。次早衆生悄然出。林猶未知。問館僮云。各位相公安在。僮曰。游浣花溪。看婦人去矣。恐相公偕往。則諸美驚避。故不相謀耳。林悻悻以慙。因歛歔良久。假寐而臥。愁怨之氣。直冲霄漢。適玉帝出巡。問人間有何冤抑。而怨通於天。值日功曹以林對。帝召諭之曰。形貌好醜。各有定數。何遽怨尤。林卽首哀求。改易陋容。雖死不恨。玉帝憐之。命侍者引至地府。爲之易容。侍者携之御風而行。一炊時至森羅殿。十王聞有玉敕至。各端冕出迎。使者傳帝旨。十王唯唯。召掌生判官查其相貌。祿壽判持簿白曰。林某貌雖寢。頗有福澤。若強易之。恐有所不利焉。林哀之曰。但乞別賦姣姿。得婦人憐。於願足矣。富貴永壽。所不敢望。王曰。違數干咎。後雖悔之。曠躋何及。林曰。匹夫不可奪志。何悔爲。王乃命判官引往。成形司爲之易容。飄忽間至一室。遇司形小鬼。夜叉於門。判述其故。司形令其入室。自擇。林入見。四壁掛人面。億萬美惡不一。紛紜雜陳。林刻意求佳。自西壁至於東壁。又進而南。獲一面具。端好俊麗。雖美婦人弗及也。指曰。請易此。小鬼從壁間取下。夜叉以七首批其面。迎

刃而落。卽以新面貼之。使之對鏡自照。林喜不自勝。又引至後院池傍。見池水澄清。渾如綠玉。鬼令人浴。浴竟。覺遍體光膩。皜皜白皙。非復向時粗黑矣。林此時心花怒開。雖南面王不易此樂也。遂緩步循途而歸。將以媚懷春之女。俄覺所經非舊路。奔走數十里。遙望雉堞高聳。近之見城上顏曰南薰國。旣入門。則街衢壯麗。人物齊楚。肩摩轂擊。儼然一大都會。乃問路人。此是何郡縣。何蕃昌若是。一老者答曰。聽爾口音。當是異鄉人。故不知也。此間名南薰國。今日國王在彩樓上選后。拋毬。故較往常尤鬧耳。林意選后。則衆美咸集。自恃其貌俊美也。將廁身入裙屐叢中。作穿花蛺蝶。宜不復如往時取憎於人矣。遂隨衆以前。果見午門外綵樓一座。五色炫耀。粲如雲霞。國王坐銀交椅。臨檻畔。年約四旬餘。目彊鼻凸。面色深紫。兩額亂髻如蝟。狀甚猙獰。官監數十人。側侍一小豎。捧綉毬。近立御前。樓下則半皆年少美男。絕無一女子來聽選。疑其爲時尚早。方翹首仰矚間。王忽舉毬下擲。正着林額。衆少年譁曰。選有人矣。乃垂首喪氣。咨嗟扼腕。紛然各鳥獸散。宛如不第舉子之觀榜歸也。林念我男子身。那得選作后。或王爲公主擇婿。而傳者訛耳。俄數十內侍。擁香輿至。叩首曰。請娘娘升輦。林力白並非女子。不堪爲后。衆曰。行也。君王選中。安問牝牡。羣攙扶入輿。昇之而行。經殿閣數十重。至一朱閣。

下。衆監出。卽有宮娥數十。跪近階前。呼娘娘者三。相將入閣內。爲之解帶。腿衣。以金盆貯。葶香湯侍浴。林視諸娥。亦各韶秀。乃裸坐浴盆中。以指撚陽具。示之曰。若等識此爲何物。豈作后者耶。衆皆匿笑曰。奴婢等莫不有此。娘娘何獨自炫。林不信。徧摸其襠。皆垂垂袴下。較已加巨。視其裙下。雙蚌。皆纖細不盈三寸。駭問其故。衆曰。我南薰國本無女子。媼者爲雄。妍者爲雌。兩足不用纏裹。係木蹠也。凡民皆然。况君王哉。林大戚。潛然出涕曰。我乞得麗質。將以弄婦人。而今乃爲人弄乎。衆宮娥款曲勸解。且爭以香胰遍擦其體。而於臀股間。尤加意洗滌。復以牙管裹香綿。探入穀道中。細細澡除穢污。林寸心如刀刺。如火燃。恨不能傅翼奮飛。旋聞閣外傳語云。王在宜男殿待多時矣。請娘娘速粧。衆宮人懼獲譴。急以紅巾拭其軀。衣以文繡。飾以金珠。點脂傅粉。裙下雙蚌。墊以木蹠。圍裏繡鳥。纖細不盈一握。頃刻粧成。眞覺閉月羞花。一時無兩。左右挽扶。攙入八寶鑾輿。抬至宜男殿中。與王並立。紅氍毹上。展拜天地宗祖。入寢宮。飲合卺卮。王目不轉瞬。諦視良久。歎曰。似此俊麗面龐。得未曾有。朕可謂邀天之幸矣。諸宮女斟玉盃。頻頻勸醕。王漸醺。以手捻其股。命滿斟。瑪瑙巨觥。自飲其半。以所餘。賜林曰。卿飲此同心杯。少間卽諧魚水。林慚甚。兩頰俱赤。宮人又滿斟黃金斗。送林白。娘娘亦飲半卮。餘

以奉上。林覲然強起以勸王。一吸而盡。酣然大醉。抱林置膝上。接其櫻唇。俛其桃鬢。狎褻殊甚。衆皆避出。時尙未哺。王興大發。不及待昏。携登御床。親爲卸粧解衣。遍撫其體。自肩背及於尾閭。贊曰。香溫玉軟。古所稱彌子龍陽。卿當鼎足。漢帝溫柔鄉。何足道哉。遂潤以津涎。乘堅而入。直抵黃龍。王具旣修且偉。進退之間。大爲鑿柄。不覺流丹浹裊。席林含淚哀免。王曰。卿忍之。朕當範我馳驅。不汝蹂躪也。歷一時許。雲雨纔息。林以纖手捫下體而呻吟焉。王愛憐。臻擊取銷金鵝黃。鮫綃輕輕拭抹。猩紅點點。不啻處子破瓜時也。旣乃狎抱而臥。王鼾鼾熟睡。林負創不能成夢。須臾王醒。挑燈熟視。嬌媚之態。畫筆難描。頓覺淫情大熾。附其耳曰。前次圖南。今當逐北。因以兩臂撲其腿。使雙翹上向。如紅娘所云。鞋底尖而瘦。又以小珊瑚枕襯尻。下重提玉杵。再搗元霜。雨驟風狂。殆不可忍。林嚶嚶啜泣。王以舌抵其吻。以面搵其腮。慰之曰。卿且少耐。醍醐將灌矣。俄而溫泉內注。洋溢充腸。笑睨之曰。此西廂曲所云。露滴牡丹開也。林閉目羞縮。幾無容身地。王曰。勿羞。吾爲卿拭之。拭罷。摩玩再三。不忍釋手。又以鼻承其竅。嗅之曰。氣佳哉。暖香馥馥。是從錦繡臟中出者。承其下風。洵足解慍。方繾綣間。則景陽鐘動。絳幘傳呼。瑣窗紅日上矣。同起盥櫛。諸宮娥爲后梳粧。扶至御前。再拜謝恩。王掖起微笑曰。宵來鹵

莽。卿勿介意。林低鬟掠鬢。不能出一語。旋見羣臣賀表。香進。王出御正殿受賀。賀畢。百官又至宮門外叩賀。后喜。然後退出。林坐朝陽宮碧玉胡床上。自思屈節爲異邦后。以陽當陰。受侮不少。方慚恨間。忽宮人報廢后来朝。林不解。只得輕移蓮步出迎。則見廢后乃四十許麗人也。綠鬢朱顏。瘦腰纖足。對林而拜。林答拜畢。林曰。姊以何事見廢。答曰。無事。妾年十六入宮。册爲正后。向例后既立。卽以其父或兄爲相。今年近四秩。例當退居冷殿。別選后。而相其父兄。幸妹是異土人。無父與兄。乞緩頰。王前勿黜吾父。語畢。再拜。林曰。易耳。后退。王入。林告以故。王方眷林。惟命是聽。遂不易相。踰四五月。林覺腹中震動。食飲少進。且胸懣欲嘔。召太醫診之。醫賀曰。又得一儲君矣。王喜。林大窘曰。我無產門。何從生育。王笑曰。有進處。便有出處。何患焉。林終以爲憂。時王暱林甚。夜無虛度。雖白晝亦常探其後庭。林曰。妾沾雨露。幸而徵蘭。今腹隆然如阜。不堪屢擾。幸少賜寬假。產後惟命。王頷之。始稍稍就別宮宿。近十月既足。腹中陣陣作痛。老宮人抱置七寶金鑲坐桶上。痛愈劇。忽砉然一聲。穀道開裂。達於前腹。居然生子。呱呱以啼。嬪娥等扶坐床上。血液淋漓。無異產母。彌月後漸次收結如初。惟舉丸陷入腹內。陽具細縮如春蠶。時林方充後宮。無所用此。遂不措意。王見而喜曰。向者仰面交歡時。每嫌此物格

碍。今當無慮。乃掀其股而撫摩其繡履。置纖足於其肩。蹲踞就之。笑曰。月餘問關。柔潤猶是也。而門戶加宏矣。乘堅而入。進退自如。林亦不覺其苦。而得有樂趣矣。春風一度。歷兩時許。王精始洩。乃狎抱而臥。林就枕畔問曰。君王已立前后之子爲嗣。如此襁褓者何。王曰。諾。吾將廢故儲而立爾子也。翌日詔下。前后怒。密謀於父。乘王早朝。懷刃弑王。遂率甲入宮。將并殺后。闔宮鼎沸。林急將木屐解縛。易來時所衣儒冠儒服。懷金玉珠寶二裹。從後宰門竊出。經行街市。譁稱宰相造反。林疾趨出城。行十餘里。適前村劇盜。聞變率黨數十。將入城肆掠。途遇林。環視呼曰。此王后也。前於綵樓前識之。今自宮竄出。必有所挾。乃視其上下衣。搜獲所有。又豔其色。佈衣於地。伏而淫之。一人畢則一人繼至。又畢又繼。凡五六十人。此往彼來。恣情狼藉。淫迄。攫所懷寶以去。林憊仆不能起。忿火中焚。聲嘶氣結。道中又值玉皇駕過。見林狼狽狀。召問所苦。林具以訴。且告之悔。帝遣從者仍送至闔王所。王曰。爾今何求。林叩頭慟曰。乞還我本來面目。免致疊遭污辱。王問判官曰。渠本相猶在否。判官曰。在。緣其醜甚。無有受者。王命率往復之。既至前室。見己面懸壁上。捧而戴之。豁然頓醒。則身猶隱於几上。攬鏡自視。劣態如故。惟博得一身好膚革。旋覺肛門間習習然痛楚。引手探之。寬綽倍于曩時。餘瀝尙津津外溢。

急視前陽。則纖不盈寸。而一囊二子杳然矣。終身遂成癡人。

非非子

某公子者。軼其姓氏。年二十餘。風流瀟灑。博通典籍。祖遺田宅饒。奴僕婢媪盈百。娶妻邢氏。亦世家女。美而多才。置妾八人。皆有殊色。其最少妾名珠娘。色藝更勝諸媵。性復靈慧解事。公子尤鍾愛之。適有游方道士。善風鑑。決休咎無不奇中。公子招之至家。令相之。且令徧相妻妾。道士一一斷其年壽福命。既而驚曰。公子骨相宜富且壽。但額間有麻紋。恐數日內有飛災橫侵。僕有小術。可以禳解。珠娘以目視公子。公子會意。答曰。吉凶自係定數。禳禳何益。道士微笑而去。及夕。公子忽患心痛。號呼踰兩時而卒。邢夫人急遣幹僕追尋道士。遇諸巷口。邀以歸。請爲禳。道士曰。晚矣。拂袖欲出。衆羅跪哀懇。道士曰。無已。請以身代。令引入後室。指曰。此房清淨。請置床帳衾蓆。予代公子死。十餘年終當復活。務須嚴密。扇鎖勿損吾尸也。衆疑信參半。姑從其說。道士命取一磁罈。置公子屍傍。戟指作訣。口誦咒語。凡數遍。以黃紙封罈口。鎮以硃符。捧入靜室。安放床下。卽登床引衾而臥。瞑然遂逝。衆駭甚。扇其扉。出視公子。則已起坐談笑。見夫人至。卽狎抱欲與交歡。邢曰。君纔得甦醒。神氣未定。何可遽事床第。公子不聽。卒與合。堅久倍於

曩時。繼又遍交其衆妾。徹夜追歡。目未嘗交睫。晨興出坐廳事前。羣僕悉來叩賀。公子細問家資田產。及奴僕姓名。儼若隔世之事。不復記憶者然。查詢既畢。卽入與妻妾調笑。恣情淫慾。日以繼夜。漸而婢女僕婦。無不沾染。公子性素溫利而慷慨。至是極慳吝。且復暴戾。下人稍忤犯。輒鞭之見血。越數旬。珠娘私謂夫人曰。郎自死而復生。一切舉動。迥殊疇昔。儂甚疑之。夫人曰。我亦終夜躊躇。而不知所爲計耳。珠娘曰。聞法華寺中新到一異人。號非非子者。能知過去未來。盍往叩其故。夫人以爲然。翌日密遣蒼頭訪之。非非子箕踞殿階上。見蒼頭至。不待啓口。笑曰。爾家假家主安在。歸語爾主母。明日給使外出。我當來一雪此曖昧事。蒼頭返命。珠娘黎明而起。謂公子曰。昨夢至北郭外。周將軍將軍謂予曰。爾夫復生之後。窮享奢淫。竟不來我廟中一伸奠醑。予必有以懲之。語次。顏色甚厲。妾故恭備牲牢。耶其速往。母干神怒。公子信之。乃乘花驄。隨俊僕數十人。逕赴神廟。珠娘正與夫人謀。請非非子。而閹人報非非子踵門求見。夫人率衆妾迎入後堂。泣拜於地。非非子曰。爾夫未死。現在罈中。令引至靜室。啓關而入。以手揭其符。俄有黑氣蓬蓬然。自罈內出。直冲珠娘口中。珠娘卽仆地。須臾起曰。我爲妖道閉置罈中。如在黑獄。今當訟於有司。伸此冤抑。察其聲音舉止。宛然公子平生時也。遂毅然

出門而去。珠娘素不逾閨闔。今則直趨縣堂。如經熟路。已而擊鼓鳴冤。縣尹詢得其故。大爲駭愕。籤差呼夫人及公子質對。邢夫人肩輿而往。備陳顛末。公子亦繼至。執不肯服。尹乃收公子於獄。釋夫人。珠娘暫歸。次日覆訊。經三日訟未決。忽家中靜室內扣門而呼。衆妾率婢媪往視。聞內云。我珠娘也。速開門出我。不則餓欲死。衆大駭。脫鍵啓扉。則道士盈盈款步而出。羣乃奔避。呼僕人逐之。道士曰。公子魂無所歸。暫假我體。赴愬於官。相約不過一二日。卽返。今已歷三晝夜。腹中奇餒。故借道士身屍以起。須速爲我備餐。僕乃設饌外舍。令就食。道士作羞態曰。爾諸人環列集視。那能下咽。可速避去。衆乃散。僅一老僕遙立以覘。俟其食畢。邀令同赴縣署聽審。道士曰。我纖足艱於步履。請以輿往。旣至署。則正在訊鞫。道士所供與珠娘符合。尹曰。妖術移魂。已無疑竇。令生據實供招。生呼冤。尹曰。爾若果原魂返體。試將祖父名號官秩生歿年月及現葬何地。并家中瑣事一一細述。如有舛錯。卽係僞托。生不能答。強口支吾。尹怒甚。欲加嚴刑。慮殘生體。不得已白于上臺。提問數次。皆曰。案情已確。但難於用刑。欲誅其魂。則生以無辜受戮。欲誅其身。則珠娘之魂無所依。沉吟反覆。雖老吏亦爲束手。道士忽嬌聲稟曰。此無難。發其覆者非非子也。往求之。宜必有術。衆官悟。命吏胥持名柬往請非非子。不一

時非非子褻裘而來。各長官咸起立與語。非非子曰。無勞緬述。予悉知之。此左道幻術。不難更正。生瞪目呼曰。師兄忝附同牕。何遂無香火情也。非非子曰。咄。師固謂爾心術不端。故靳其術不全授。今果背師而行不義。予遵師命來此。不能復顧友誼矣。遽披其髮。禹步持咒叱曰。倒倒倒。生及道士珠娘皆仆而僵。又以清水一碗。吸噴其面。三人皆起。生伏地而哭。珠娘含羞求釋。道士則坐地不語。官乃令邢氏與珠娘先歸。勒令道士畫招。道士仰天大笑。官怒加以三木。反晏然而臥。聲如雷鳴。官命以利刃割其耳。堅硬如鐵。刃不能入。非非子勃然曰。恃術橫行。一至於此。出腰間佩刀。長只數寸。吹之長幾尺。又吹之長一尺有半。授隸人以此刺之。當迎刃解。道士怒顧曰。沈大爾苟殘殺。余必爲厲鬼以索命。非非子曰。牛八爾戕人性命。占其財產。又淫其妻妾。橫死游魂。將收入阿鼻獄中。尙何鬼之能厲。道士知不免。直認不復諱。綁赴市曹。以刀截其首。血作紺碧色。戮畢。刀頓縮短如故。隸知爲寶物。思匿以歸。刀忽飛起。仍入非非子鞘內。拱手別去。生歸妻妾皆抱慚求仰藥死。生百端勸慰。始得安然。乃具厚儀往謝非非子。至則先期引避。不知所之矣。

盜婦留情

餘姚許孝廉。入都應試。家貧不能獨自買舟。有進京綢緞客船。前中後三艙。皆客自據。惟後稍小房艙尙空。許以數金附載。舟人婦貌甚美。年僅二十餘。見許翩翩少好。詢知爲新科及第者。頗有眷戀之意。一切飲食。加意關照。許亦感之。行抵揚州鈔關前。客與舟子皆登岸報稅。及市土物。惟女與許生在舟。女笑問曰。君已娶婦否。生曰。去年新娶。問新婦貌何如。生調之曰。不及君遠甚。女又笑問君曾私偷過婦女否。生曰。見美婦如卿者。甚欲私之。奈不我允。又不敢相強。是以並無佳遇。婦含笑以秋波斜睨之曰。書歎子無用。何必待允。生附其耳曰。今夕肯來惠顧否。婦頷之。旣晚衆皆睡靜。婦悄然至。掀生衾而入。生喜出望外。極盡綢繆。將明卽去。自此每夕輒來。婦肌膚白潤。纖足不盈一握。興酣之際。嬌聲細顫。柔媚之態。令人心醉。生頗悅之。及道入山東界。泊舟無人烟處。夜交二更。衆舟人謂婦曰。可行事矣。婦結束衣袴。手執短挺入艙中。客皆驚起。持械相鬪。女猛甚。無不辟易。旣而一一就縛。咸棄諸河。生裸跪乞命。婦曰。勿懼。本擬帶君至家中。盤桓數月。恐誤君試期。薄具程儀百金。君另附便舟上京可也。命舟子移舟傍岸。送生行李置岸上。珍重數聲。開船徑去。生是年遂捷南宮。授職部曹。

封仙

晏大夫名平。燕之析津人也。仕明天啓朝爲諫議。骨鯁峭直。屢抗疏擊大璫。留中不發。宵小爲之測目。至懷宗時。見國勢日蹙。卽引疾解綬。卜築於京城西偏。家本雄於財。性復慷慨。揮霍尙氣節。愛交游。以故燕趙豪俠之士爭歸之。樽酒不空。座客常滿。門前車馬雜沓。填溢街巷。一日方宴客。有道士踵門求見。門者却之。道士怒曰。爾不稟達。我遂不得入耶。倏忽不見。闔人大驚。急趨入白。則道士已立筵前。舉手謂晏曰。聞君能下士。故遠來請謁。而司閤辭焉。是慢客也。晏見其儀度不凡。乃長揖聲謝。延請上坐。道士居然居客右。略不謙遜。連盡數十觥。初無醉意。晏叩其姓氏。里居。曰。貧道封姓。無名字。無里居。任意浪游。視千百里猶庭戶耳。晏又問客何能何好。答曰。概無所能。惟耽盃中物。亦間樂馳馬試劍耳。晏素喜談劍術。每以不得遇虬髯聶隱輩爲憾。聞其語不覺投所好。因出所藏古劍請試其技。封曰。此頑鐵所鑄。不足用也。入口嚼之。脆如梨栗。須臾嚙盡。笑曰。氣味殊穢。甬中不能受。引頸哇之。着地鎔成一若餅。新出於冶者。晏驚曰。寒舍所藏。以此爲最。其下者更不足道。未識仙師可携得寶劍來否。道士掀髯微笑。隨口吐一匕首。長不盈尺。霜鏗稜稜。耀目不可正視。擲向空中。往來盤旋如白燕飛翔。因指庭樹曰。此樹太繁。宜稍芟削。刀卽飛入深叢中。柯葉紛然散落。颯颯有聲。封曰。可矣。劍輒

止。視其樹疎密得宜。儼然有畫意。又曰。歸乎。劍翔集昏間。蜿蜒而入。絕似秋蛇。赴壑。晏喜。跪請受教。封曰。君嫉惡過嚴。無容人量。不宜爛此。非僕恠也。于是洗盞更酌。雄談豪飲。燭跋乃起。將辭去。晏摻袂款留。遂止。館諸書室。供奉優隆。審其一切起居飲食。猶之常人。但事事能前知。爲稍異耳。晏家中向多蓄姬妾。又多變童。有一妾私與僮通。懼事發。羅譴。乃置毒。將乘機鳩主人。封知之以告晏。晏密搜妾奩中。果得藥砒一裹。持以示封。並問所私何僕。將并執殺之。封曰。殺之固當。然恐爲君家帷薄羞。請爲君變形而後加戮。可泯其迹。越夕。僮又入姬室。正綢繆間。忽覺兩體合而爲一。輾轉化爲巨豕。突門欲出。小婢駭甚。急奔告晏。晏飭勿張揚。明日。嚮諸屠門。宰而貨其肉。俄主計老僕入白某。僮昨宵無故自逸。不知所往。晏曰。聽之。無須根究也。居有頃。時屆嚴冬。朔風如吼。彤雲冪冪。釀雪。晏邀封及數友。圍坐煖閣內。重簾爐火。斟羊羔酒。以飲客。皆着重裘。猶有寒色。封單衿洒然。笑謂衆曰。諸公得毋怯冷乎。卽命撤去圍爐。四豁牕扉。以掌拍案。歌陽春之曲。陡覺滿室生溫。和風習習。庭畔桃花。豔如錦簇。繼又彈指。歌南風之薰。則赤日杲杲。炎蒸不可耐。迴視桃花盡落。而茗菡開矣。客皆脫帽暖裘。甚至有裸裎者。封曰。過熱亦不佳。卽變調作清商之音。涼颼瑟瑟。然自西南來。桂香襲人衣袂。衆樂甚。歡呼淫。

白飲盡百壺辭欲起。封曰：少坐。乃再咳而廢穆王黃竹之謠。不覺溘寒驟逼。凜冽如初。六出紛飛。積階幾及盈尺。衆乃披裘束帶。聲謝而出。主人留封送客。及門而返。見封俟於堂前。執手謂曰：游將別矣。此間非安樂窩。明年三月鼎祚將革。君忠諫士義不可生。亦無所逃避。不如早自裁。毋撓賊刃。晏漫應曰：死非僕所畏。但未得死法。封探袖出小瓷瓶一枚曰：此中貯有中山千日酒。記取明歲甲申上元發臧飲之。飲後卽死。死則葬於白浮山麓龍潭左側。諸眷屬卽廬墓以居。其餘冗人概行遣散。無俾居此危城中也。又舉手指堂東隅曰：倘多金不利。携帶審此可耳。晏拜而受其酒以入。凌晨遂殷勤作別。晏殊戀戀。封曰：無須俟三年後。當圖再面。晏怡然曰：僕已獲死所。越三年。則墓木已拱。奚後會之可訂。封笑而不答。拱手徑別。追送之。忽迷所在。迨明春。晏囑家人一一悉如其教。營葬築室方畢。果有逆闖之變。凡貞士蓋臣。咸及於難。並有闔門殉節者。晏舉家幸得免。嗣經三載餘。封忽飄然至。告晏妻若子曰：醉客一臥。今恰千日。可速開視。勿令闕損。衆咸驚疑。姑從其說。發壙啓棺。晏猶挺然僵臥。封拍棺呼曰：宿醒尙未醒耶。晏應聲起坐。相視而笑。携手入室。歡飲如平生。時酒酣。封離席曰：天下從此可平矣。君縱不求仕進。大可優游晚歲矣。頃爲方壺之游。同侶敦促。不再留。因亟呼童子來。有白鶴

自空而降。封跨之鼓翼直昇雲際。望之渺然。晏自此精神日強。壽至百有三歲。一夕無疾。跌坐而逝。

義牛塚

呂生姑蘇人。資財累鉅萬。娶妻顏氏。美而艷。家中食指以百計。夫婦皆仁厚好施。御下寬恕。生偶適市上。有屠人宰牛。方奏刀。而牛遽脫縛起。狂奔于途。遇生伏地俯首作乞援狀。生憐之。償屠以值。飭僕牽歸。飼以草具。越數日。又一牛亦臨宰而逸。逕奔生家。生驅之不去。目中汪然流淚。門者入白。生亦以值購之。與前牛同芻牧。養並不役。使耕作。經年漸肥健。忽一夕夫婦方共寢。有盜二十餘人。明火持械入。繫生於床柱。見婦姝麗。且肌理瑩膩。反接其手。將就淫之。婦哀之曰。房中盈箱累笥。皆阿堵物。任爾攜取。幸勿辱我。卽不敢鳴官。追捕盜不聽。夫婦齊聲大號。童僕媼婢皆逃匿。無一至者。盜卽自卸其下衣。捺婦於牀。方在危急。俄一牛奔入。以角觸其穀道流血而仆。繼觸其腰。羣盜鎗棍交加。牛負創奮觸。連斃十餘人。始倒地而殞。又一牛踵至。奮觸如前。盜盡仆。牛亦死。夫婦號囂既久。氣噎不能復出聲。踰時一老嫗伏隔房牀下。聞生舍寂靜。疑盜已去。始至牕外潛窺。見伏屍縱橫滿地。牛亦與焉。乃敢入房解縛。出呼諸僕婢。漸紛紛羣集。生

嘆曰。蓄若等多年。臨難盡散。惟二牛銳身殉主。諺云。人不如畜。諒哉。衆慚。跪不敢作一語。翌日。鳴官驗屍。內有二盜。漸蘇。訊供不諱。盡抉其首。梟示通途。生以紅氍毹裹牛體。卜地築壙厚葬之。夫婦皆素服。哭臨其穴。建碑表之。曰。雙義牛塚。



聞見述奇卷之四

海上醉花生琴珊氏述

王廉使

陝西長安縣王生。述者忘其名。世居城南鄉村中。嬌婉柔媚。恂恂如處子。因其行六人。戲呼之爲六姑娘。無父母兄弟。亦未婚娶。慧而勤學。年十五。游邑庠。西俗凡初入泮者。各乘駿馬。鼓樂彩旗爲導。徧行城市村落。名爲小遊街。是日王生與同案諸生聯轡而出。經前街。適有虞姓行二者。亦舊家子。中落而貧。鬻瓦缶爲業。娶妻藍氏。頗有姿容。妹三姑。年方三五。綽約嫵媚。光豔異常。鄉隣有虞美人之稱。居屋止臨街兩樓。妹居前樓。已與妻居後樓。時姑嫂聞鼓樂聲。知爲新進游街。卽同至牕前倚檻以眺。嫂忽舉手指王生曰。此後巷王六姑娘也。在同儕中翩翩皎皎。不啻雞羣之鶴。異日小姑適人。得似此君。足稱一雙佳耦矣。女含羞不答。然偷目屢顧。頗形眷戀。王生攬轡經過。並無聞知。其對宇武二者。鼓刀而屠。素性凶悖。又強有力。混名殺嫂武松。久涎羨虞女。女故終日掩窓。不敢輕啓。其時諸生游街。武竚立宇下。耽耽視窗內。備聞其嫂語姑之辭。知女已屬意王郎。乘夜深人寂。梯登樓檐。脫扁而入女室。無燈火。聞窗開聲。急呼問。武止之曰。

我王六姑娘也。承卿見愛。特來相就。女曰。君果有意。倩媒說合。計無不諧。若夤夜苟合。則死不能從。武強與狎抱。女疾聲呼嫂。嫂與兄皆起。武懼。仍緣梯而下。入室閉門。絕無踪影。兄問妹何故聲喊。女曰。樓窗無故自開。恐有賊盜耳。兄驗視窻扇。笑曰。門久朽壞。被風吹開。無足慮也。旋即安寢。翌日。兄起往。叩肆。女責其嫂曰。閨閣中不宜有戲語。日昨因嫂一辭之失。致王郎乘夜而至。雖經驚竄。萬一今宵再來。奈何。嫂亦自悔。既暮。兄歸。謂夫曰。昨晚窓開。小姑心怯。請今夕易房而臥。夫允諾。移妹於內室。自與妻同宿。妹牀。妻乃乘間。憇其夫爲姑締婚。王郎兄意亦適合。喁喁小語。移時方睡。武屠淫念。既萌。情不忍捨。因思一弱女子。不能以情求。當以威劫。遂攜刀復往。及牕畔。聞二人絮語。怒曰。此必眞王相公也。捷足先得。殊可痛恨。潛俟其熟寢。仍啓牕而入。虞二於睡夢中。聞步履聲。探頭帳外。喝問何人。武以刀截其頸。應手頭落。即提其髮。越檐而歸。婦懼甚。恐并罹害。不敢聲張。奔入女室。閉門相持而泣。武在暗隙中。究不知是否王六。迨天將黎明。懷其首。負鋤往村盡處。菜畦中辨之。始知其爲虞二。乃坎地將瘞之。適有賣湯餅之沈大家。家中兄弟二人。貧無所資。乃日逐荷擔鬻餅以餬口食。惟時天色尙早。路無行人。忽腹脹。即弛擔道側。就菜畦中登廁。見武二手提人首。洶洶而來。驚呼曰。武二哥何故

殺人。武出不意。驟被窺見。未免惶懼。隨舉鋤擊其首。腦裂而死。因深塹一穴。並掩埋之。又恐事發被拘。卽時逃竄。及天明日上。虞婦始敢大聲號呼。隣衆集視。同保甲鳴縣。縣令雷姓湖北人。賦性粗率。用刑極嚴。升堂察訊。婦及女皆確指爲王生所殺。備述顛末。令乃拘生至。初不肯承。加以三木。不勝其楚。遂誣服。問首存何處。則茫然不能指。令曰。凶手已確。而故匿其首者。欲遷延作疑案也。因勒限五日。一比不得。首不止。越兩月。榜掠無算。臀股皆無完膚。王有老僕。姓顧名忠。性極謹厚。入獄探視。王生方委頓於地。見僕泣告曰。宿世冤愆。萬無生理。但得首亦死。不得首亦死。與其零星受刑而斃。杖下不如入秋一決。反省無限煩苦。但安所得生人首級。而誣指之。語畢。伏地叩頭。求僕方略。僕不得已。允其轉覓。行泣而歸。語其婦曰。我與若受王氏參養三世矣。今幼主遭誣。已甘一死。但求呈有首級。以免目前敲扑。適懇我代覓。情詞酸楚。我無奈應允。第念非殺人。那得有首級。老夫耄矣。力所不能。計惟自刎。以首交爾呈報。庶可塞責。妻聞大慟曰。報答主恩。死固其分。然憶自結襦以來。歷今四十稔。實不忍於垂暮之年。見此慘事。無已。請殺子以報可乎。僕沉吟良久。答曰。可哉。因而妻持燈。已操刀。往叩子舍。其子年纔二十。聞叩門啓關而出。僕揮刀砍之。頭落於地。急埋諸後院墻陰。然後往購材木。親抱

入殮。佯作哭泣。以暴疾告諸鄰。鄰知此子素勤孝。爲父母所鍾愛。初不疑其有他故也。天明僕入獄。見生。生日。今日又屆比期。首竟何如矣。僕曰。但云現瘞後院西墻下。求之即得。少選。見官一如僕語。官命吏啓驗。吏白曰。非虞二首也。老少不類。官疑。又以訊生。生諉諸僕。僕知不可終混。具以情告。令始驚訝。暫寬刑比。仍繫諸獄。先是沈大既死。擔停道左。其傍舍有尤老者。少時游手好閑。且又無賴。近已望五。娶室蔣氏。少且艾。每有外交。尤利其滋潤。雖覺之不甚較也。里中輕薄子。因各贈以佳名。稱其妻曰。油漿水。稱其夫曰。油葫蘆。時已薄暮。尤見擔中餘火尙溫。無人收管。肩負以歸。先將担中粉醃與妻分食。存担家中。俟有覓主。可冀索償。沈大之弟沈二。見兄早出不歸。徧村尋訪。忽見担存尤宅。因向查究。彼此口角。互相扭毆。蔣氏見沈二力大。度夫必不能勝。隨手以瓦盆助夫擲擊。悞中其夫太陽穴。血流如湧。頃刻殞命。蔣氏驚而欲號。沈二急搖手禁之。曰。妻毆夫死。律當凌遲。因我啓釁。亦難免罪。不如滅迹偕逃。乃可倖免。蔣氏倉皇無措。祇得聽計於沈二。即將夫屍埋於墻畔。掃除血跡。遂入房結爲夫婦。沈二曰。我有母舅。現居鄰邑。往依之。可以避害。因星夜往投舅家。詐稱新娶甥婦。特來謁見。且云。故鄉生計淡薄。欲在此間開肆。舅氏聞之甚喜。代爲僦居于城之西市。仍服粉醃糗餌之業。其

婦油頭粉面。日坐闌闌間。里中惡少。爭以市餅爲名。相與調笑。以故生計頗不落窠。亦無人知其竊負而逃也。越數月。雷令膺上遊保荐。晉秩司馬。瓜代者爲浙省高君名明。由甲榜出宰。剔歷繁劇。綽有能名。故調任首邑。蒞事之初。省視監獄。見王生驚曰。焉有文弱如是。而逞凶殺人者乎。索閱凶器。曰。此屠刀也。王生儒士。安得有此。及察視卷宗。有老僕殺子獻頭一節。嘆曰。冤哉。爲民父母。奈何濫刑若此乎。卽呼生至案前。笑謂曰。六姑娘郎當極矣。吾稔知爾冤。但正兇未獲。不能遽釋。令提牢吏蘇其械。軟禁獄中。授以經書時藝。使之溫理。且倍其囚糧。俾資調攝。嚴飭禁卒。毋許凌虐。卽晚禱于城隍神。曰。惟神血食茲土。具有民社之任。今如某案疑獄未雪。縣官之責。亦神之憂也。幸有以示兆。祝畢。就神座下隱几而臥。夢中聞有人大聲誦曰。新豐市上新豐驛。放下屠刀便成佛。又誦云。五柞宮西餅餌香。權作鴛鴦不久長。令豁然醒。不得其解。次早。召王生鄰保至。問此案大有疑竇。爾等旁觀。豈無公論。衆曰。有疑。輿論藉藉。但無確證。不敢妄陳。計自當日虞二被害後。村中棄家而逃者。凡五人。其一屠戶武某。又賣餅之沈大。沈二。又尤老夫婦二人。俱不謀親友。無故遠颺。不知去向。令點頭不語。卽俱釋歸。退衙沉吟半响曰。今臨潼縣卽漢之新豐。現尙有新豐驛。放下屠刀。必武屠也。至成佛之語。疑已

披剃爲僧矣。密喚幹役數人。諭之曰。速往臨潼新豐驛左近。查有去年新祝髮者。卽拘以來。不數日。役稟覆云。驛之後街彌陀菴內。兩僧人。一老且病。住持多年矣。一係剃度未久。自稱文姓。語音似我邑人。現帶到案。令急召鄰保。證認果武屠也。一鞫具服。並供明瘞首處。往啓之。則首級宛然。旁添一屍。又訊又吐其實。虞案已明。其餘在逃三人。尙無下落。午夜推詳。迄無端緒。適盤屋縣周令因公至省。前來謁晤。高公留共飲饌。席次談及五柞宮遺址。不知今尙可考否。周曰。現在做治宮基。雖夷爲民居。而柞樹猶存。高默會其意。因又密飭數役往捕。果於宮址之西。見有新開湯餅舖。遂拘其夫婦至省。訊得實。發屍驗殮。將各犯依律擬詳。惟顧忠因救主情切。不以故殺子孫論。又爲王生申請開復衣頂。旣畢。立傳虞氏姑嫂至。並釋王生出獄。三人並跪案前。高公笑指生曰。王六姑娘讀書守分。今狼藉至此。是誰之過。試問虞美人何以自謝。虞姑嫂皆投地痛哭。高謂其嫂曰。謔語駭舛。爾藍氏不得辭其責。今我爲爾等玉成初志。郎才女貌。洵屬天緣。願否。嫂極口稱願甚。女低頭不語。王曰。彼二人者。我讐也。何可以成姻眷。不敢從命。高躊躇未決。女哭訴曰。我以女子身。不遵閨範。臨街窺視。以致兇徒起意。兄死非命。又冒昧妄指。使孱怯書生。幾瀕于死。且牽累多命。案滯經年。今孤苦餘生。燹無依倚。蒙案

下明察覆盆。感同父母。所論姻事。雖王郎懷憤。不願我自誓終身不字。隨嫂守志。卽所以自謝也。語畢。聲淚俱咽。令爲惻然。目視生曰。六姑娘真忍心哉。其誣也可恨。其謝也可憐。百年琴瑟。切勿固執。致生後悔。生囁嚅不能答。高命內署。急取男女新衣各一襲。促令易服。并賜白金百兩。作奩資。當堂鼓樂交拜。以輿送歸王宅。又諭生曰。詰朝可卽迎藍氏至家。以嫂事之。無俾獨處向隅。至老僕願忠。亦須另眼相看。爾經此患難。尤須奮發自強。勿負我拳拳屬望也。生含涕唯唯。率妻再拜。聲謝而去。旣至家。親族聞已息訟得釋。羣來慰問。生嘆曰。沉淪獄底。朝不保夕時。曾無一人顧卹。今作此無謂應酬。何益。概行謝却。不與往還。語其妻曰。使王某不成名。何以對高公。女曰。使我不能佐夫成名。何以對高公。乃以高所賚白金。交顧僕營運。權什一之利。以供薪水。已讀書。妻刺繡。未明而起。五鼓乃息。處嫂同顧媪。爲之經紀家務。夜分讀倦。則烹茗作餌。以飼之。一家五口。戮力辛勤。生每三日作詩文一首。呈送高署。高身任繁劇。又樂親民事。常聽訟至三四鼓。然公餘稍暇。卽爲生批改詩文。絕不憚煩。一日召生謂之曰。覽爾近作。頗已純熟。但作文非原本經術。則根抵不厚。非揣摩韓柳諸大家。則氣味不醇。非沉浸子史百家之集。則波瀾不壯。至于詩賦雜作。固在書多。亦必逐句雕琢。逐字烹鍊。則自然新穎。

工秀不似陳羹吐飯無餘味也。余自憾作風塵俗吏。不能以文章報國。子其勉之。生歸以其語書座壁。晨夕究心。歲科兩考皆第一。文名藉甚。次年鄉試。高令充同考官。闈中得王生卷。詫曰。此作疎古醇茂。兼蓬蓬有生氣。疑卽王生卷也。懇荐之。主試拍案嘆賞。定爲榜首。加批云。根抵盤深。枝葉蔥懋。非十年讀書。湛精經籍者。不克臻此。及揭曉。果王某也。高喜曰。六姑娘公然及第。虞美人穩穩做夫人矣。主試異其語。問其故。高覲述之。主試曰。亂仙不我欺也。爨膺命出都時。有同寅某君。素奉呂祖。常常降乩。歷有奇驗。予往辭行。適在扶鸞。因虔叩此番典試。能得佳士否。乩示詩曰。藥珠榜首姓名香。曾是當年公冶長。桂苑杏林聯步入。秦中才子屬紅粧。初甚不解。以今觀之。此生明春當聯捷也。榜發後。高令回署。生卽率妻子赴縣署。自大堂跪拜而入。高趨出挽扶。歡然道賀。又見其懷中抱子。清秀豐滿。啞啞略解笑語。不勝欣慰。踰月。高內陞禮部主政。贈生三百金。爲入都會試資斧。明春。生捷南宮。殿試一甲第三名。授職編修。尋荷簡畀。視學山左。殷勤作別以去。旣而高公因暮年無子。宦興索然。陳乞致仕歸里。甫出直隸界。卽有夫役轎馬沿途迎候。云是王學臺所遣。務祈繞道至省一晤。高亦念生綦切。乃率眷同往。未及城三十里。王夫婦並出跪迎于道。旣至院。卽懇請留居署中。以申孝養。高不可。

夫婦長跪不起。哭甚哀。其子已能行走。亦跪肘後。嗚嗚而泣。高未決。忽處嫂抱子趨出。同跪哀祈。既而顧僕夫婦俱出。叩頭不已。後一少婦亦携子叩求。高問之。始知生又得一子。繼嫂膝下。承處氏之祧。又爲顧忠娶妾。七十餘老人。居然生子。其貌酷類所殺之長子。高喜。生能報人之德。且鑒其款留誠摯。乃命繼子南歸。掌理家中財產。自與其妻依生以居。夫婦晨昏問視。無異親生子女。偶閩邸抄。知前令雷司馬晉秩太守。因酷刑斃命。問擬遣發。乃謂生曰。刑之不可不慎也。如是子其勉之。生書之於紳。後歷任至廉使。有神明之號。高夫婦亦登上壽。論者以爲卹刑之報。

魚怪

大江之濱。有儒釋道三人。同舟共濟。方欲解維。隨有素服少婦。亦來呼渡。三人皆曰。江波險惡。與婦女同載。不利。不如却之。婦固請。榜人乃刺舟近涯。婦一躍以登。北面而坐。舟旣發。婦裸裎出其陰。笑撫之曰。此物大佳。何云不利。衆益厭之。因問有何佳處。婦曰。嗅其濁穢之氣。似是腐儒。觀其短髮鬚鬚。又似道士。而其實則和尚之窠巢也。僧怒。免其冠。以頭搶之。婦挺腹相迎。膩然而入。僧懼而退。則頭面濡濕。漿汁淋漓。婦大笑。踴身入水中。化爲巨魚。圍圍洋洋。攸然竟遊。須臾風浪大作。檣傾楫摧。舟子曰。此魚怪也。犯

之不祥。宜有是阨。正悚惶間。忽有龍爪翼舟而行。始得安渡。將登岸。龍作人語曰。予不忍三教盡填魚腹。故聊一引手來救耳。衆皆羅拜稱謝。龍乃天矯升空而去。

兵差奪船

宸濠之叛。武宗御駕親征。舟泊清河。帝登岸微行。入茶肆啜茗。聞人言下江因兵差截奪客船。橫行索詐。稍不如願。卽毀客貨。嗟怨不絕。帝買小舟。變服似商人。以一衛士一小監。沂流直下。至揚關。有官舫甚巨。巡船數十。虎役百輩。攔截客舟。帝亦在內。逐舟搜索。云供兵差之需。客皆哀祈。獻繒。至帝舟。帝偃臥艙中。不之理。虎役擁帝登官舫。見一官憑几危坐。從役森列。叱帝曰。汝何人。敢抗皇差。不畏官刑耶。帝微哂之。官怒叱役。摔帝行杖。幸衛士勇猛。揮拳擋護。衆不能近。官益怒曰。是必江洋盜魁。命拿舟子至。褫衣鞭撻。喝令指帝爲盜。帝怒。探懷出玉牌。命內監立召大員至。值蘇揚巡按接奉帝命。倉皇奔赴。官見巡撫來。至船頭跪迎。正欲訴盤獲大盜緣由。巡按見帝立艙中。俯伏請罪。帝無言。惟指揮衛士奪此官紗帽。予舟子戴之。曰。以酬汝痛。方命巡按提此官去。追贓問罪。論大辟。失察之上。亦均獲嚴譴。而客舟自此安行。兵差不敢索詐矣。

信石活人

榜李郡有吳某者。業醫。兼設藥肆。其邑宰有愛女。膺感冒之疾。延之診視。用防風散服之。卒。宰怒。命縛治之。幸素識吏。漏風而遁。越境乃免。依妻父家。逾歲。宰遷他邑。遂携眷歸。妻弟送之。復整舊業。其鄰里鄉黨。集金賀之。開讌招飲。時已昏暮。客皆據席。闕飲。興正豪。有叩門求痧子藥者。主人不得開。囑其妻弟曰。笥內幾隔幾瓶。紅色者是。汝往給之。其妻弟酒已醺。隨手撒一瓶開視。皆紅麪包。與其人而入。讌畢。客散。吳醫檢點器具。見一瓶在外。所盛者信石末也。問何人動此。其妻弟駭曰。我以為痧子藥。給來人矣。醫愕然曰。來者何人。與藥幾許。曰。其人似營伍中者。得錢十餘文。與藥二三錢也。醫曰。殆矣。我之不得業是者。命矣夫。明日必興大獄。身家其能保乎。其妻弟曰。無已。姑乘夜潛逃。以觀其變。乃囑其姊居守。偕醫仍遁。當是時。有都督某大將軍駐是邑。得眩疾。發卽暈絕。惟以痧藥灌之。周時始醒。忽疾作將斃。其夫人急命卒求藥。卒因吳醫是新設藥鋪。必認真。故買之而歸。夫人莫辨。急以水調藥末灌之。大將軍腹中如雷鳴。須臾起坐。大呼妙藥妙藥。夫人告以故。呼卒入詢。得其處。曰。良醫也。差弁往聘之。以除吾疾。翌日。命中軍參將率其卒伍。奉袍服冠履白金五十。往延先生。中軍至。則藥肆已閉。叩門不應。喚兩鄰問之。僉曰。昨甫開張。今日又閉。必遠鄉之人。延去治療也。然其妻在。我等往

後戶間明以應台命。中軍領之。鄰人疾呼吳嫂。其妻因弟誤其夫。惴惴憂懼。初聞門外傳呼聲。潛窺之。見馬上長官。同健卒十餘人。盤詰鄰人。知夜來之事。發惶恐。飲泣不敢應門。鄰老不得已。越牆而語之曰。官奉有禮儀。必無惡意。嫂姑納之。無禍及婦人者。其妻不得已。啓門。中軍入室。陳其聘物。笑問先生何往。吾奉軍門令。其速赴召也。妻心始安。以下鄉對。中軍呼里長入。使往尋之。鄰老作函招吳醫回。往見大將軍。開闔延入。怡然請教醫診之。實不知其疾之由來。謬以虛寒對云。以茯苓桂附爲丸。厥疾可瘳。大將軍諾諾。遽以百金與之曰。聊爲藥資。有不敷者。痊日重酬。醫唯唯而退。謂其妻曰。愈疾以信。旣重且多。天下之大奇事也。然不可再。其將何藥以應命耶。妻曰。曷不延其親隨之人。而探其病源。醫大悟。以酒食交歡於隨官。始悉大將軍以卒伍起家。方其戍守邊徼時。冬不衣裘。朝夕以酒禦寒。酒家用信石入釀。飲之遍體遽暖。故卒伍多從之。及大將軍貴。開府南方。無此等惡劣酒。遂成眩疾。醫會其意。以滋補之味。參以信石作引。爲丸以進。終一料而體竟矍然。疾不復發。大將軍深感之。凡所轄四營八哨九十餘汛。屬下將弁。無論男女。有疾必使延吳先生。愈則使之重酬。若不瘳。則曰。吳先生尙不能治。其命盡矣。於是造請者盈門。不數年成巨業。起大宅。自爲門聯曰。運退防風殺命。時來

信石活入。

鍾俊

浙人鍾俊幼業儒。父母早故。子然一身。教讀。口親戚故舊。皆遠之。年二十餘。獲一芹。戚友稍敬禮之。然無與爲婚者。繆居下帷。刻志勤學。未幾登賢書。捷南宮。入庶常。鄉黨中爭欲聯姻。俊謝曰。予貧猶昔。宦亦未成。何以家爲。時有山右富室官侍衛者。白姓。有女及笄。因乏嗣。欲贅清華之士爲壻。其鄉人因其武職。慮女有趑趄風。無願締婚者。俊於同年席間遇白。談相洽。詢及未婚故。白卽囑同年爲媒。俊知其豐於財。欣然許諾。遂贅焉。女貌婉麗。夫婦相得甚歡。旋散館。俊銓得南都宰。將至任。白因愛女遠離。盛備餼具。媵以婢僕百餘。雇羣艘。由水路行。運匱之日。自京至通。四十餘里。絡繹不絕於道者兩日。始畢。白送壻女至阿干。珍重而別。於是宵小覬覦。羣謀肆劫。但知其多侍衛家丁。恐有能者。不敢遽發。以小舟追隨而下。及官舫晚泊處。俱在通都大邑。無可下手。然一路知風羽黨日夥矣。夏初舟抵維揚。是夜月朗風清。江波恬靜。鍾俊與白氏舟中對奕。思乘月色啓行。飭僕叱舟子連檣而進。盜聞之大喜。投其魁僞鎮江王者。揮百餘艇。胡哨而來。舟子聞哨聲。咸號呼曰。巨寇至矣。奈何。諸僕駭告主人。俊不勝戰慄。泣曰。舉家

休矣。白氏微哂曰：小醜何敢跳梁？婢子足以退之，耶何懼爲？遂命僕令舟子停帆，將羣艘一貫鎖。官舫在中，燈火俱息，男子均伏匿不動。夫人呼婢十餘人來前，皆已易短裝，黑衣黑褲，望之如墨。各與棋子一握，密囑數語曰：速退小偷，毋俾登舟。若驚官人，惟汝等罪。婢領命而去。夫人遂自起，易烏緞襖袴，以青綾蒙首，掛鐵丸囊。俊視之，目立眉揚，英武之概，另具風流，非復平時嬌弱矣。俊曰：夫人將何之？夫人曰：禦盜耳。耶如不畏，偕往觀之。俊見指揮自如，胆稍壯，遂携手伏艙門內，靜無喘息。未幾，嘈聲逼近，盜舟合圍矣。盜見巨艘聯絡，若索戰，然而無一人在外，懷疑未決，相持既久，覺無他異，乃命酋長挖鉤持刀躍上，未及登船，皆被飛子中要害，墮江而斃。已數十人，賊帥怒，自携大盾，挾白刃飛登中舟，覺盾上砲子如雨，始知擊者在上。於是蒙首俯身，纔欲入艙，夫人手發鐵丸，中盜頂，撲跌入江。衆呼曰：大王殆矣！皆臭水搶護而遁。羣婢咸集，夫人命舉火厚賞之。叱舟子放舟前進，俊大悅，揖而請曰：夫人是何神術，治大盜若小兒然？誠乃將門之豪傑也。夫人曰：無他，妾父好馬射，家有閒圃一頃，翼以長垣，中具馬道箭廳，恒以妾置廳事觀藝。妾時尙幼，戲以石子擊射鵠，父笑曰：兒欲爲此，吾以銀爲的，能下者予之。妾樂此不疲，與羣婢日擊，至二三年，百發百中。父又以紙作人，畫周身穴道，擊其穴

亦無不中。繼又以牛革爲人畫穴於背。命以鐵丸穿之。習四五年。則所發皆洞。父笑曰。女將軍天下可無敵矣。故侍婢皆知欺。如是而已。無他長也。俊曰。棋子微物。何能殺人。夫人曰。熟是法者。粒米可以殺人。况棋子乎。被所擊者。非穿太陽穴。則取二目。子已入腦。能不立斃乎。俊曰。既聞命矣。然婢伏何所而賊不覺。夫人曰。婢揉踞桅巔。俯視明而用力遠。故無不中其要害。且黑衣與木色等。夜色朦朧。故盜不覺也。俊曰。夫人伏櫓內。何以預知賊首之必登中舟也。夫人曰。中舟較羣舟大而有儀仗。羣盜四面受虧。必料中舟爲主。賊首必欲破之。既登。卽知擊者在上。不意妾在下也。故幸中之。俊不勝歎服曰。夫人真娘子軍之巨帥也。智勇無雙。僕何福而遇此。及抵官六載。任滿調首邑。時有軍功參戎許傑來鎮南都。與俊投合約爲昆季。時相過從。盛夏解衣而不釋便帽。俊竊疑之。及俊得保荐。將入覲。傑具席餞。行飲已酣。俊問曰。大兄當暑不去冠。何也。傑曰。旣爲昆季。事可無諱。予大江巨盜也。因劫官舫。被鐵丸擊頂。去片骨幾殆。幸寇有兒骨丹治痊。然不可以風。故不釋冠。俊曰。以兄勇略冠三軍。何見傷於官舫。傑笑曰。此予之恩人也。曾訪舫中能者。係少婦。予喟然自失。去盜不爲。投邊營入行伍。屢上戰功。五六載。進膺是職。皆由一擊玉成之。此婦非予之恩人耶。俊曰。知恩人何在。傑曰。閨閣中人。

何從物色。俊笑曰。兄勿罪。是弟婦也。傑駭然。起具衣冠請謁。俊遂命僕請夫人出。傑見其弱質盈盈。不禁再拜稽首曰。此天人也。天命誨予矣。凜然而退。

標女客

山左大饑。盜賊蜂起。膠爲甚。小康之家。俱不自保。昌邑有標客孫良。技勇絕倫。有女莊姑。悉傳其術。時因道路梗阻。閒居授徒。大姓之虞暴客者。爭以重金爲聘。良悉納之。乃分其徒爲十餘部。各遣一隊。以護大姓。而良周巡不息。盜賊不得肆志。咸憾之。昌邑錢尹。吳人也。捕得巨盜。誣指孫良爲魁。械之。良極口呼冤曰。小人禦盜。非爲盜者。尹曰。盜何仇而指汝。良曰。邑中之巨室。盜窺伺已久。得小人捍衛。至今不得逞志。彼欲冤死小人。以遂其吞噬也。尹察之信。竟誅盜而釋良。良感甚。願獻女爲妾。尹笑曰。解釋誣妄。令尹之職。何足言恩。且法不得娶部民女。汝休矣。良涕泣而去。未幾錢尹因公被劾。將回吳下。宦囊甚充。宵小私議竊發。良知之。謂尹曰。兇年之後。道路難行。小人老矣。不能隨護。民女雖陋。智勇具足。請侍左右。以備非常。尹鑒其誠。納之。其女年未二十。而貌甚英武。遂與南行。車仗數十。僕從如雲。小夥不敢舉事。盜法探有充實者可劫。或衆寡不敵。則知風下程。并夥而謀。獲財均分。故發益遲。則盜益衆。是時錢已去五六百里。至魯界。

之朗月鎮寃宿。得旅店後屋三楹。牆垣高峻。周匝僅容一門出入。尹喜其完固。必欲居之。莊姑知非善地。然已卸裝矣。勉從之。謂錢尹夫婦曰。妾觀此宅。似爲謀禁客商之所。夜或有異。主君與夫人請臥觀之。幸毋高聲。妾有以處。若輩尹雖唯唯。然未知其能甚戰慄也。於是安尹夫婦於東室。呼二婢伏西室。曰。喚汝則出。取洋燈之臍。凸碧琉璃者。置窗隙。院中明似月光。乃易短襖皮褲。鞋尖置鐵腰。掖利刃。滅燭躍登中門之巔。踞匡以俟。漏三下。內外俱寂。旅主馬鐵頭。盜中之巨擘也。秘集羣寇。擇其能者。皆操白刃。自後垣登屋。餘盜伏於四隅。以防逸出。先命一人下探之。久而不回。馬曰。內多婦女。諒入安樂窩矣。繼命二三人下。亦如是。馬曰。真不了事。弱息數輩。尙煩乃公自往。若遇大敵。行見爾曹雌伏矣。遂躍入院。四無人聲。月光中視屋門已閉。甫撥關欲入。額顛中傷甚重。如泰山壓頂。然仰跌丈餘。旋飛一人坐胸前。馬舉刀欲砍。被掣兩肩窩。而兩臂酥軟。刀自擲去。又被掣兩袴。而兩腿麻木。身不能轉動。始聞嬌聲喚婢。兩女舉燭至。視之一幼婦耳。哀祈之。莊姑乃微哂曰。我見來勢甚猛。知是能手。果惡奴也。汝爲寓主。諒害行旅不少。本欲殺却。如此庸奴。徒污我刀耳。今且留汝。爲作惡者戒。遂命一婢取藥來。莊姑以刀割鐵頭臉上肉。縷縷成條。以藥揉之。血立止。時天已曙矣。僕從叩門請莊姑。以

足踢馬臀。拔關而叱曰。速去領而徙。屍在東墻下積薪內也。從容啓尹夫婦登車而行。馬被踢則手足已復舊。抱慚而竄。自此臉上皮條終不復合。絲絲懸掛。若世俗所畫獅子然。

陳制軍

兩江陳制軍。在金陵甄別書院。親臨督課。與院長叙談之際。忽聞人聲嘈雜。兼鼓樂花炮之音。遣官察問。回言生童不由攔阻。爭拔關出外觀迎娶者。制軍有愠色。負手而出。歷閱各齋房。考具咸在。而虛無人也。惟後所有一人。若垂首搆思者。制軍甚異之。意爲沉靜好學之徒。欲與之言。至其前。係輕年後生。其人昂首見制軍來。起立默侍。乃問之曰。諸生皆出。汝獨靜坐作文耶。抑別有故耶。其人失聲大哭。急叩其故。對曰。童生吳某。亡父爲詞林。今日所娶之女。係童原聘之妻。制軍笑曰。家教何其嚴也。旣係完姻。何必就試。汝去畢。乃姻事。若母與師責問。以奉予命。放假爲詞。諒無不可。生益悲咽。而對曰。非也。此女今爲人攘娶矣。制軍詳詢之。對曰。婦翁係已致仕之豫省河工觀察使許姓。由卑官起家。值亡父爲是省學政。攀援聯姻。爲之游揚。荐升大員。前歲父歿於都中。一無所有。殯殮之具。皆戚友所助。生隨母扶柩歸葬。聞婦翁素不恰人心。又失憲司歡。今

失所依倚。知必不免。亦致仕歸。聞生貧甚。萌悔婚意。召生予百金。索庚帖。生不允。婦翁怒曰。我女安富尊榮。豈能食貧居賤哉。汝縱不還庚帖。我另擇嫁。汝奈我何。生歸與母謀。母曰。以勢交者。勢盡則交絕。明欺我死學士。不能敵生觀察耳。然天道昭彰。聽之而已。婦翁竟改婚與楊兵部家。聞今日迎娶。互鬪奢華。故諸生出觀之。諒此時往迎新婦耳。制軍曰。汝能騎乎。對曰。能。乃命備兩馬。召武弁隨生歸。迅取庚帖。俄頃而回。制軍驗收之。傳諭中軍。廣帶兵役往楊第稱賀。其時兵部在京供職。僅有一子。與乃兄共之。乃兄係納粟職員。聞制軍來。大爲榮幸。遠迓乘輿。及門。賓客中之顯者。共迎制軍入坐。制軍僉與爲禮。詢知媒妁爲鍾徐二進士。茶三獻畢。制軍曰。我聞天下風俗不同。吉禮爲甚。素知此鄉與我省竟有大異者。主人猶未答。忽聞爆竹震耳。則粧奩先至。媒妁相隨。制軍喝令立拿媒妁。諭兵役護運粧奩。命中軍持令箭。邀截新娘彩輿。俱送入書院。卽其堂中設公案。提徐鍾二進士入跪。詰之曰。爾等身列儒林。何竟敗壞風俗。與有夫之婦爲媒。二進士駭曰。某等係兩家親友。從不知許姓別婚之事。是何凶徒。竟敢妄告。制軍袖出庚帖。擲令觀之。二進士識許某親筆。因怒訴曰。許某忝膺爵祿。而竟非人類。然彼在豫聯姻。遠隔數千里。渠居心瞞昧。某等何由知之。是陷人於罪也。請必究之。楊亦

跪告曰。許某心若豺狼。行同鬼蜮。某若早知。決不與爲婚媾。今此事惟某是主。弟在都中。未之知也。某頗與許賊較。請嚴究之。制軍察衆詞色。悚懼。諒不知情。飭發廉訪質訊。遂借楊氏喜筵。及新郎之冠服。回書院。適諸生繳卷之際。諭令毋散。同陪筵席。遷院長於外。而以內宅作新房。命與請生母公服而來。以觀花燭。生乃衣楊媾之衣。與女合拜成禮。內外數十席。官衿吏役。共飲盡歡而散。次日。催廉訪速究。以報制軍濡筆侍奏。許大怖。急奔書院。見媾叩首無算。自稱死罪。曰。媾如能救我。所有家財。願與媾共之。生遲疑未決。母訓之曰。其父雖狂。其女甚謹。汝不見其聞言醒悟時。則曰。非制軍力。幾爲父母誑矣。痛哭不已。情可憐也。曷爲之援解。生敬諾。往見制軍。以情告。制軍曰。果爾。命其開報田宅。我爲分割。以贖其辜。以爲汝誦讀之資。若稍縱之。我去後。老獠必變。汝非其敵。遂命廉訪提許至。依制軍斷。以立案。吳生於是乎驟富。奮勉讀書。是年入泮。旋登賢書。嗣制軍因剛愎。故被讐家陷害。奉旨拿問。生追隨入都。因乃父之門生故舊。爲之營救。竟得開釋。復用。而生亦銓得縣令出仕矣。

妾爲妻

燕人胡某。軼其名士而兼農。且耕且讀。雖不得科第。而溫飽自如。亦里閭中安樂人也。

年逾四十。猶無子。妻牛氏悍而妒。家無婢女。胡曾買妾爲牛氏苦撻。逃去。胡不敢追。有好友錢生聞其事。深抱不平。欲覓悍過於牛氏者。納諸胡以樹之敵。適有河間周女。隨父賣械至其地。能於首豎一百旛杆。以足躐一百二十觔大甕者。值其父老病死。弟幼弱。貧不能殮。願賣身爲父置櫬。錢生以百貫爲之治喪。俾其弟扶柩回籍。告以牛氏之悍。欲仗其力懲治之。爲胡友延後。送與爲姬之意。周女首肯而去。以小星禮謁見胡夫婦。胡感錢生之情。夜使值宿。然心甚惴惴。次日早起出門。牛氏已操杖伏於寢門之外。夫出突入。姬猶未起。牛撻其衾。以杖指之曰。汝何大胆。敢入我家。知我家法乎。凡爲新婦者。須試杖一百。姬不答。牛氏之杖亂下。自背至股。撻百餘。姬曰。杖數盈矣。妾應起身。勿傷貴手。牛氏無言而退。姬乃爲之洒掃執爨。暇則爲之浣衣綉履。凡婦工之所應爲。皆代牛氏殷勤爲之。牛猶不悅。恒以橫逆相加。姬裸衣伏地受撻。不知凡幾矣。偶與胡寢。胡憐其無辜。愛其婉婉。涕泣撫之。姬笑曰。郎無以妾爲念也。夫人之力。能有幾何。妾所順受。亦同兒戲。郎視妾身有微傷乎。妾所憂者。未知何時有妊。倘得有妊。庶不負錢先生之恩耳。半載後果懷孕。牛氏覺之。俟夫出。閉姬於房。操大杖臨之曰。我欲審汝。姬以舊規自去衣裳。伏地聽命。牛氏微哂曰。我知汝有孕。眞乎僞乎。姬曰。有之。纔月餘耳。

牛曰。聞汝以賤妓出身。所得何人之種。敢亂我胡氏宗乎。汝須以腹受杖。我爲撻而去之。再得者我始放心。汝尙敢以臀塞責乎。姬大笑而起。捧牛氏於地。以一足按其背。手接其杖。先撻數十。訓之曰。嫡庶之禮。代操井臼。以伺應郎與夫人。若有過受杖。是我分也。今我來汝家。半載餘矣。腹中宜乎有孕。猶以外心疑之。不過借詞欲毀我胎耳。是甘絕胡氏之宗嗣。斬祖先之血食。大罪人也。人人得而誅之。我今日爲胡氏之前人代伸家法。汝能革面洗心。尙可原恕。否則裂膚折骨。勿悔也。牛氏始猶叫罵。繼而不勝其楚。哀鳴求恕。姬姑釋之。牛氏披髮狂奔。訴其母家。其兄弟叔姪。皆鄉里之蠢人耳。聞其言。糾合三十餘人。各持械器。至胡宅尋鬪。姬聞人聲。糟雜理髮。整衣以布束腹。拔關而出。問曰。汝等皆夫人之黨乎。有明理者請論曲直。若不言理。欲以力勝。亦請施展技藝。衆怒甚。蜂湧而前。姬躍出門。奪白梃。旋舞以鬪。當之者莫不中傷。撲跌皆棄械。抱頭竄去。姬大笑而入。夫亦歸矣。知其事曰。目前稱快。後將奈何。姬曰。郎其勿懼。請約諸生以備訟耳。乘此一舉。未必非長治久安之道也。牛氏之衆敗歸。果投訟師。以逞兇奪嫡。鳴官官爲喚訊。姬乃投案陳情。諸生爲證。官直其言。判曰。牛氏無子而妒。七出已犯其二。憑恃愚蠢之黨。滅妾欺夫。罪無可逭。照律出之。其助惡之人。各杖八十。以昭炯戒。遍撻諸

牛之黨。命謂生黜牛氏。而以周姬爲繼妻。諸牛歸。因官私受責。亦不直牛氏。衆棄之。牛氏無所依倚。行乞自活。次年值周姬生子彌月。賀客盈門。牛氏操杖持筐以索食。見周姬長跪叩首。姬掖之登堂。當衆問其情。牛氏大哭痛悔。姬曰。妾爲夫人權攝正位者。料有今日耳。夫人旣誠心悔過。請以禮讓。牛氏固不敢允。而胡生亦大不悅。姬已爲之易衣。衆皆賢之。錢生曰。請全周姬之志。牽生與牛氏入室。歡飲而散。然牛氏自怨自恨。竟不自居正室。亦不干預家政。別潔一室。長齋奉佛以終。

陸都閫

陸都閫充卒伍時。出境迎上官。至中途。聞上官遇雨而退。陸回。雨益大。衣履濡濕。道路泥淖。見旁有小樓一楹。趨避檐下。天將暮而雨不止。叩門借宿。少婦拔關出曰。夫男入城未回。不便留客。陸示之佩刀號衣曰。我行伍中人。正直自矢。今進退無從。只求樓下一席地耳。婦哀其窮而納之。且贍以粥。給之燈與薪。婦登樓闔戶而紡。陸以薪爲褥。跌坐啜粥。然火烘衣。約三鼓許。有老婦由門隙入。陸駭然禁聲以觀其所爲。老婦若未睹陸者。以一杖置門側。望中雷再拜。匆匆登樓。聞與少婦言甚歡。未幾。悲聲酸語。旣而大笑。陸取其杖閱之。倏變爲麻繩。甫坐於身下。而老婦下樓。望中雷又拜。回身覓杖不得。

始見陸。知爲所收。告曰。老婦恃杖而行。客須見還。陸不答。老婦倏變爲少艾。柔聲怡色。以哀之。陸仍不答。倏變爲厲鬼。目凸口凹。聳肩鼓腹。望陸吹氣。則冷風入骨。寒不可當。陸正襟禦之。然老婦作氣甚難。喘息片時。方能再吹。則不及前之冷甚。三吹則無力矣。陸笑曰。汝能吹我。我寧不能吹汝。請還汝氣。亦鼓氣吹之。則老婦胸腹皆洞。乃連吹之。化爲濃血。轉成灰腥。臭實甚。天已大明。陸不去。俟有叩門者。起應之。一少年入。覩陸而叱曰。汝何人。敢入我室。陸知爲少婦之夫。匪語之。故曰。與爾登樓。且救爾婦。少年偕陸踏梯推門不應。肩門而上。則婦懸於床。氣猶未絕。共救之。蘇問其故。婦曰。夜有前村之某嫗來。忘其爲縊鬼。與我言終窶之慘。覺悲甚而泣。繼又言伊證仙果。在極樂世界。可以同窺。遂以帶作圈。望其中飛樓畫閣。金碧輝煌。不覺探首。則被懸繫矣。少年再拜謝。陸曰。若非足下藏其繩。則我婦作替代。而足下亦難明心跡矣。迨後陸得官。漸起至都。闔府而止。

老丐遇騙

有耄而聾者。在金陵大關乞丐。關前來一官舫。揚旗鳴鉦而泊。艙中有五品官探首見丐。使從者扶之登舟。官細察之。曰。汝非某長者乎。前曾繼我爲義子。我因回籍求功名。

去。今幸選得是邦矣。不意義父一貧至此。兒之罪也。丐知其誤。姑應之曰。我年老糊塗。前事如夢矣。官曰。雖係風塵。面目骨格猶存。兒識之無誤。飭從者請封翁先赴澡堂沐浴更衣。移舟至僻靜處。頤養月餘。爲之櫛沐鬚髮。暗以膠粉染之。皤然一叟。謂之曰。兒衣不稱父身。將入市買金帛。爲父修飾。以便同赴任所。但父曾在此行乞。恐城中有識者。碍兒顏面。至鋪內閱貨時。合意只須搖首。不可多言。丐允之。放舟入城。喚肩輿二乘。隨帶二僕。父子皆服五品衣冠。招搖過市。入銀樓換金約臂。每隻重四兩者對兩。謂鋪主曰。我將赴緞局借往兌銀可也。鋪主從之。入緞局以單與局主觀之。須三千餘金貨物。邀入廳堂。殷勤款接。私叩其僕。知少者爲嚴州二府。老者是其封翁。因二府之妹。與首郡太尊之子結親。送至省垣完姻。置辦贈嫁物耳。局主分外趨承。設席讌之。官局邀金鋪主同坐。曰。是我好友。鋪主唯唯聽命。方自以爲榮。乃出綢緞洋呢各物。先奉封翁閱之。封翁皆搖首。局主曰。此上等貨也。可以入貢。豈不堪服用耶。官曰。旣不合父意。可與我妹觀之。飭輿夫扛抬貨物。一僕押去。良久未回。又飭一僕往催。輿夫先回曰。舟中人囑我稟官。綢緞經小姐目俱合意。不知應用何號。平色銀兩。請官自去檢點。官謂局主曰。煩侍父暫坐。我回兌銀卽來。乃乘輿去。至舟中。多給輿夫錢文。曰。爾等往來勞苦。

先吃飯去。輿夫走而舟人遂啓行矣。丐坐局中。俟至更深不來。局主與金鋪主皆惶急。不得不追問封翁。丐亦情虛。語言閃爍。羣擁之鳴縣。大令究得實情。亦無可如何。不過跣緝而已。釋丐。衆褫其衣服。惟靴帽不合時。衆皆不要。此丐尙戴五品冠。着朝靴。赤身叫化。見者大笑。

朝鮮王子

江左徐某知醫道。開設藥肆爲業。門臨官河。栽柳成行。有美蔭。一丐者小艇恒泊於下。有二婦操異音。日與其夫盪槳行乞。盛暑之際。忽聞二婦大放悲聲。徐往視之。丐已欲斃。氣存一息。發惻隱心。謂其婦曰。爾夫當是痧症。我取藥來。或可救也。遂與蟾酥丸用童便灌之。竟清醒。越日大愈。丐登門叩首謝活命恩。自此放舟。一去不復反矣。歷十餘年。徐積得數百金。與親友合本渡海。赴關東販豆。遇颶風。飄入大洋。舟子不能爲力。砍桅去帆。任其播揚。不知幾日夜。亦不知幾千百里。遇島觸礁。而舟碎。財貨俱沉。所幸人無傷損。聚哭於沙山而已。此島內係大鎮市。朝鮮所轄。有瞭望者。見舟破人存。咸來問訊。備錄名單。飛報所司。值小王子巡邊聞報。見單親臨點驗。至徐某細審其行業。曰。先生門前垂柳尙存乎。徐不知所以。謹以實對。王子乃命司官以諸客就養於客館。厚給

其稟餼。曰。遇便送回天朝可也。命備法駕。肅徐登輦。王自乘騎前導。白旄黃鉞。禁衛傳呼。行人跪道。徐怵怵然如夢如痴。聽之而已。越兩日。及大城。百官郊迎。添鹵簿。易鑾輿。稱蹕而入。城中三市六街。人烟湊輻。至宮門。王子挽徐手升殿。交拜。分賓主東西對坐。傳命宣妃主夫人見客。乃有彩娥貴嬪翼二夫人出。法衣象服。佩玉鳴璫。向徐盈盈再拜。徐答拜不迭。長跪於地。曰。小人何德何能。敢受我王殊禮。請明以告我。以誌異數。王子亦蹕告曰。先生忘十年前柳陰下小艇中之病丐乎。卽寡人也。我國法。凡貴者得異症。必遠丐三年。以伸懺悔。寡人二十餘歲時。忽得眩疾。發則眩暈即死。過日而蘇。前王命太史占之。須乞丐中華沿海之區。必有奇遇。疾以痊也。乃指二妃曰。寡人帶渠行乞。得遇先生。以仙丹救治寡人。自此疾愈。逮今十餘年不復發矣。昔年王父崩。寡人接位。國服甫滿。尙未朝貢。請封。故國人猶以小王子稱寡人耳。今天幸先生來此。俾寡人有以報德。先生欲貴乎富乎。欲貴則特設賓師之位。以奉先生。欲富則珍寶貨財。惟先生命。徐曰。小人遠方醫士。無奇才異能。敢妄玷賓師位。以速官謗。無已。本爲運豆而來。請假以資本。送之關東。則感戴無既矣。王子笑曰。關青豆不及小邦者。不意中華貴重至此。異日請先生觀我倉貯何如。乃開大譙畢。館徐於天使行宮。命大臣之善華言者陪。

侍。娛之以本國雜樂。王子日往朝之。居數月。徐思家欲歸。辭留數四。不得已。王子命開大倉。請往觀豆。則一顆之大。約重四五分。果勝關青數倍。徐欲之。王子舉倉以贈。載海舶數十艘。奉徐與諸客。以王大船送之歸國。徐貨豆得十餘萬金。改藥肆爲質庫矣。

繩伎

獻縣來一走繩索伎。頗具姿首。方開場作劇。有武舉能開十四石弓者。以元惡霸一方。縱橫淫佚。無敢與較。見此女投所好。強欲留宿。班主曰。我等賣藝不賣身。客何犯我規耶。武舉怒拳擊班主。伏地。衆皆曰。此武舉官人也。良家婦女。尙不敢抗。爾等旣賣伎。何敢拂之。自取苦惱耶。女子乃笑迎武舉而慰解之曰。官人果與妾有情。請以夜持五十金來。否則不能承也。武舉笑曰。五十金非難事。果處子亦不爲費。入夜至女室。置五十金案頭曰。可以共臥矣。女曰。妾請先睡。官人能犯妾。任意爲之。如其不能。請留金而送客。武舉曰。汝不過欲蓋羞耳。何有於是。女子乃閉門去。衣俯伏坑上。武舉騰身而上。以兩手翻其軀。竟如鐵鑄。莫動分毫。隨作開弓勢。儘平生之力。劈分兩股。力盡而股不稍移。武舉怒擊其臀。堅如石。遍擊首背。皆然。拳反作疼。乃伏其背。以柔情動之。聞女子酣呼睡熟。播弄終夕。無可如何。遲明女子躍起曰。官人旣不傷妾。妾亦無傷於官人。請留

金而退可也。武舉從此力脫委頓而死。是亦淫惡之報也。聞之者可知所戒矣。

朱衣點額

浙有諸生某。名宿也。久困場屋。在闈中藝畢。詩成吟誦間。四鼓人靜。忽見青面獠牙。凹胸凸肚。一怪當面。生胆素壯。不甚懼。徐問曰。汝來何爲。怪曰。吾得一佳破。欲助有福者。掄元。遍覓闈中。惟汝可生。曰。試誦之。怪曰。香油煎。香豈油炒。千張二語。不甚佳乎。生曰。此孩童急口令也。若以爲文。笑死萬人。且玷我聲名。實甚。舉硯欲擊之。怪卽出硃筆。點其額。不覺首肯。竟錄其詞。作破。怪大笑而沒。以下皆已作也。錄畢。繳卷。若忘其事者。二三場悉盡心爲之。受卷所不貼。謄錄照繕而入。是科座主係名公卿。卷落一同考官處。乃係翰林散館。出爲令者。亦自命不凡。閱此卷破題。不覺大笑。致頷頰振脫。張口不能言。僕扶入室。臥不起。座主與考官有年誼。往候其疾。曰。老年兄素稱康強。何忽患此恙。房官以手指案上卷。笑容可掬。座主檢閱數過。不覺欽佩。曰。老年兄得此佳卷。何虞不入彀耶。我將與副總裁共賞之。遂携卷去。兩主司皆朗誦健羨。謂無出其右者。竟定解元。榜放。同考官之疾自愈。聞此卷發解。忍笑往見座主。曰。大人與職聲名。從此掃地矣。是何言也。而可作解首耶。座主曰。文實佳甚。豈出老年兄門下。過作謙詞乎。房官曰。

無論下文如何。觀其一破。概可知矣。兩主司共讀之。不覺狂笑曰。我等皆自開講閱起。未及詳觀破承。致有此失。奈何。考官方將全篇誦之。曰。文實高超。大人所取允當。無已。請召此生。問明其故。易卷可也。監臨乃召生來。共鞠。生始悟場中之事。以實對。考官曰。必魁星欲爲是科光。故作此戲。不然。走馬看花之際。恐遺珠耳。衆皆曰。然。

女陳平

嘉慶初年。白蓮教之擾川楚也。賊帥掠良家婦女無算。內有楚女英英特立。秀出冠羣。賊帥愛而欲留之。女曰。得爲將軍妻。妾之願也。但妾詩禮舊家。雖亂離中。不得父母之命。媒妁之言。然花燭合卺之禮。不可廢也。日後將軍爲王爲相時。妾叨福庇。稱王妃夫人。確係堂堂配偶。自得立於人前。無苟合之譏。亦將軍之光。賊帥悅其詞令。不覺首肯。使入室改妝成禮。於是擇掠得衣飾之美者。及脂粉之類。送添粧。復使他婦數人入供役。使女退之。傳命曰。今夕初見良人。無須人役。明日惟命。賊帥以其處子。碍羞允之。女乃盥沐凝粧。見有利刃竊袖之。賊帥因久待不出。入室竊窺。覩其新粧。益增秀媚。不覺心動。突入擁抱。女以刃直刺其心。立死。推屍床上。以己之妝飾飾賊屍。傅粉塗朱。剪己鬢。貼其首。加以釵鈿。望之宛似女身。女乃衣賊帥衣冠劍佩。薄暮出呼馬執旗而遁。其

親信者候之。徹夜不歸。次日午刻。大營有令。衆議將軍昨何往。夫人諒知之。不得已入室請命。見夫人尙臥。不敢驟近。覺血腥出於床。呼衆入檢之。方知裝夫人者將軍。裝將軍者不知何往矣。嗣是賊營得婦女不敢留頓。掠人之風。因之斂戢云。

太平父母

山陰王生在都訓讀。其戚以廉價得厦屋。因外宅有鬼甚厲。住此者十有九死。以致無人敢住。王生胆素壯。不信鬼神事。謂其戚曰。飲我爲君住宿。辟除不祥。戚深知其強項。不可勸。乃飲食之。生擇最兇之處下榻。燃巨燭讀書。至三鼓倦甚。方臥。燭焰漸青。見人影往來憧憧。生意欲起而擊之。無奈四肢如縛。口禁不得言。惟心甚了了。微聞一鬼言。何人大胆敢來撓攪。我必斃之一鬼來前。細閱生面目。搖手曰。此太平父母。不可犯。衆鬼笑曰。據汝言。亦不過太平父母而已。何足畏。縱不斃之。戲之可也。乃共舉其榻。滿室盤旋。生覺頭暈身顛。煩懣欲絕。雞鳴後始散。生方得安寢。日午未起。其戚慮有他故。使人踰牆拔關至榻前。見生酣睡。喚之醒。生張目曰。公等來看太平父母耶。述其故。共賀之。生亦自將。詡爲明府。且平安也。每謂所親曰。吾若得大令時。某司刑錢。某司總務。吾家大兄。只堪接待賓客而已。無如每試被黜。年逾不惑。猶諸生也。偃蹇殊甚。乃棄儒投

親引入部中作吏。六年期滿。選得太平縣典史。

奔牛司巡檢

浙人邵姓。在部中充貼寫生。夫婦二人。生一子。年已六齡。家寒甚。賃小屋三椽以居。夜半隣宅火發。延及屋梁。夫婦排窗躍出院。其婦謂尙有幼子在室。奈何。邵曰。吾中年只此一子。不可舍也。復躍入。見一青衣卒。手執青旗引烟。旋又一紅衣卒。引火欲下。青衣卒見邵。卽以旗攬紅衣卒曰。姑緩。尙有奔牛巡司未出。於是烟火皆往上透。邵得抱其子躍出。乃自信將來必爲巡檢也。逢南來者。卽訪問奔牛司出息。逾十餘年。依然故我。鬱鬱不得志而歿。其子接業。司官憐其勤敏。拔爲吏。役滿選後。乃得奔牛司巡檢。

結實頭皮

標客金某。籍隸嘉禾。其爲人也。好義。幼習武藝。能運氣。敵金刃。壯年出外保標。江湖赫赫有名。盜賊聞風而懼。及其老也。腰有千金。在江南之清河立船行爲業。攸攸自得。不外出矣。夏日在水閣納涼。見一舟揚帆而過。蓬窗四啓。中坐青年公子。外二僕人。回顧舟子。識皆劫賊。頓起憐憫心。疾捲行囊。追及之。乞附舟南旋。舟子不納。公子見其年老。憐而許之。舟子曰。人各有心。知其無歹意耶。設有他虞。非我等不預言也。公子曰。此一

老我三人能備之。毋須爾過慮。金聞言。一躍登舟。與公子爲禮。遂問行踪。公子告以父宰山左。回原籍武林。就婚也。與金聯鄉誼。談甚洽。以長者呼之。每飯必共。家人心不謂然。見於詞色。公子益尊敬之。舟行長淮時。金密謂公子曰。舟子皆江湖積賊。今當停泊某所。若過此。必逗留曠野。將行其謀矣。公子怖甚。曰。奈何。金曰。有老夫在。彼四五後生。不足懼也。某今夜與公子易地而寢。看其如何下手。公子甚疑懼。果舟至鬧市。竟過金間之。舟子曰。風利不得泊也。公子益懼。夜乃與金潛易臥處。舟行至半夜。忽停。似聞舟子皆息。燈而臥。駕長密謂其夥曰。以我五人。了彼三人。甚易。今添一客。多費手脚矣。夥曰。客似強健。然已老矣。不足畏也。駕長偕一夥持利斧。潛啓艙門。係公子常臥處。撫首砍之。不入。竊謂夥曰。得無誤砍其枕乎。不然。文弱少年。安有如是之結實頭皮也。夥曰。汝於星光下。照窓門劈之。二人聽臥者猶有酣聲。乃雙手舉斧。猛劈之。斧反激回。傷駕長首而跌。金乃揚聲有賊。於是公子主僕舉燈入。艙門大啓。金起坐。呼舟子夥四人咸集。金曰。駕長何在。曰。睡久矣。金曰。頃有賊斧劈我首。似言好結實頭皮者。駕長聲也得無自傷。我標客。金某也。在千萬寇盜中。出入自如。汝五毛賊。欲傷我得乎。恐自不能保矣。駕長卽以布蒙首出。五人僉再拜請罪曰。久聞長者大名。不意在此相見。長者旣明。

此意不必多言。我等願革面洗心。送公等回籍。斷不敢復萌異志。乞怒無知之罪。金曰。諒汝輩亦無能爲。速與我開舟泊揚城。爲公子壓驚。不汝罪矣。舟子叩首出。揚帆前行。公子及僕皆感甚。至揚州盛席宴客。不使舟子破錢。舟子亦感甚。未幾舟抵嘉禾。金客携囊告別。公子泣留。金曰。此去皆官塘大路。不過二日抵省。無下手處。我囑之。彼不敢違。乃呼舟子告之曰。汝等好送公子回府。取得平安信來覆我。日後好相見。若稍有意惰。公子莫給與信。汝五人命懸我手矣。皆曰。不敢。惟長者命是聽。遂送公子歸。趨承恐後。公子乃給舟子平安書札。回報金客而去。

易筋經

有陳孝廉者。家甚寒。貸親友數十金。入都會試。獨行至王家營。以三十金雇車。兩騾甚臃壯。車夫目豎眉揚。挺胸迭肚。亦甚勇健。陳喜。意謂能速馳也。不意車夫橫甚。甫入山東境。車價支訖。宿第三站時。入陳君室。坐借十金。如不給不能前。陳曰。此地距都千有餘里。安得多金濟汝。果不能前。還我原價。另雇可也。車夫曰。長裝短卸。向有行規。休想毫厘也。我不慣與小人乘。請辭。高聲紛爭。陳君泣下。是室逼近上房。所寓亦會試新孝廉。大車五六輛。主僕十餘人。方喚妓雅歌侑酒。聞攘攘聲。使僕詢問。車夫曰。我等算帳。

何預汝事。陳乃實訴所苦。僕入。主來携陳君去。叙科分。同年也。同行三孝廉。此君文姓爲主。謂陳曰。兄獨行踽踽。宜爲小人所侮。我聞車夫甚橫。當教戒之。遂立呼車夫入曰。汝何敢與客爭。車夫曰。小人貧困無聊。故爲人僕。不過向客借數金耳。不意其肆。然也。文孝廉曰。果爲是我假汝十金。明日隨幫早行。不許再有後言矣。車夫唯唯。五鼓開行。使陳君車在文前行。不過二十里。車夫趨狹路疾馳。陳覺有異。始則喝問。繼以哀求。車夫曰。今日之事。我爲政。汝尙有同年友相助耶。時文孝廉僕見陳車斜馳去。告主人。文曰。是不懷好意。疾躍出車。解驂乘健騾。不鞍而馳之。車夫覺有追者。奮力鞭兩騾。而文馳已及。以一足蹠車轅。兩騾寸步不能移。以一手提車夫擲地。飛身踏其背。奪鞭鞭之數百。車夫哀號求怒。陳君下車爲之緩頰。而後釋之。使陳還坐。而已坐轅上。押車回大路。謂車夫曰。我雖文士而習武功。無論汝一人二騾能止之。不足奇。汝觀我以兩手倒挽五六套大車。可使逆行。試之果然。車夫咋舌。始畏懼不敢萌異志。相隨入都。還文孝廉所借之銀而去。陳君感甚。曰。兄神力無敵於天下。生成乎。抑練習乎。文曰。此易筋經法也。其書具在。勉習之。無所不可。人自不爲耳。從此相得其歡。遂成莫逆。

何首烏

何首烏一名能嗣藥中仙品。產山澤者固多。亦有在城市而其根反得成人形者。以得人之精氣多者。然具人形者。必通靈。隱現無恒。人不能得。若得而食之。卽仙去。相傳已久。鹽官有張氏姑婦者。夫與子皆諸生。以家貧教讀外出。惟二婦在家。操作女工。度日。是以紡紗。必夜午方息。每秋月皎潔時。聞院中似有幼孩徵逐聲。拔關視之。不見。婦與姑謀。後若有所聞。一人仍紡。一人穴窗隙窺之。於是輪流伺隙。婦果見兩孩出自牆陰。長不滿尺。一男一女。皆赤體。携手至院落中。對月再拜。互相撲跌爲戲。婦潛告姑。慮曰。恐係妖孽之子孫。犯之自肇衅矣。皆不敢出。然心甚懷疑。一日所親至。知醫博學士也。姑以所疑質之。戚曰。宅若有妖。何能安居。此必靈藥所變。得而蒸食之。當成地仙。婦笑曰。渠聞人聲卽遁。焉能攫取。曰。無難。吾聞稻米天地正氣所結。能壓寶藏。若由窗隙擲之。得中其身。卽不能遁矣。戚去。婦度院中孩戲之處。至窓隙約丈餘。諒擲米未必適當。乃截竹爲筒。撒米其中。以箬捲布催送之。日練其手法。至精熟。復伺於窓隙。二孩來前。婦卽以筒米彈之。果中。二孩皆撲。突出擒拏。入手僵直。呼姑舉火燭之。類木雕者。眉目如畫。氣甚芳馥。姑婦相謀。煮飯時。於鉄鍋內蒸之。一次稍軟。至五六次。香綿可食。姑婦各分食一枚。覺鮮美異常。腹果甚。一日不思飲食。夜眠至次日。皆不能起身矣。卓午門

不開。鄰姥疑有故。踰垣窺之。見姑婦皆仰臥於床頭。面及身俱腫。目開口張。不能言語。憐姥倩人走報其父子。歸不解何由。亦不識何疾。急邀知醫之戚診視。笑曰。非疾也。日前母所說成形首烏。我曾說以捕法。諒必捕而食之。未識九蒸九晒之製。又不知避忌。誤犯鉄器。是以有毒。試以餘毒開通之藥灌之。至七日。腫消人醒。問之。果如醫言。起後強健逾前。累月不思食。其姑年已周甲。髮白再黑。齒落重生。枯縐肌膚。皆皮脫而潤澤。似二十許人。復能生子。其婦年近四旬。轉而爲二八嬌女。連舉子女十餘人。後皆享壽一百六十餘歲。無疾而終。

按製食之法。當以柳木作桶。蒸以沙甌。用桑木火。先武後文。九蒸九晒。以竹刀剖作九頓食。可以絕粒。入山成地仙矣。

翁吞壻銀

劉某軼其名。少孤。獨入贅李老家。李以其穉弱無能虐之。劉不堪。潛投仕宦爲僕。得主。人寵眷。數年積金四百餘。辭歸。與其妻謀置產業。妻乃炫述於父母。李老生心欣然。設。謙。爲壻。洗塵。譽而醉之。且曰。汝妻年幼。交以多金。恐不勝任。况汝須外出謀事。以少婦居守。得無穿窬之慮乎。蓋交老夫權爲收藏。可以無慮。劉唯唯出。金點交八寶十六件。

也。次日劉酒醒而悔。亟向李老索銀。李曰。汝貪如丐。寄食我家。鄰里咸知。焉得多金。寄頓。不思爲汝育妻恩。反肆訛耶。其女助婿爭論。李老大怒曰。女生外向。真不可與處矣。逐其夫婦出諸大門之外。劉冤忽興。訟以妻爲證。縣令曰。汝物無憑。妻不可以爲證。汝妻父曰。女生外向。此言城然。我不能直汝。毋干犯義之責也。劉素稔能吏名。往陳其苦。令以無能爲力辭。劉曰。天下賢使君。惟有老爺。若不肯治理。則無官能明此獄矣。哀之切。令笑曰。若必欲予明此訟。須暫禁囹圄。汝其願之否。劉曰。果能明此。雖刀杖加身。亦甘承受。况暫禁耶。令卽梏收之。乃移文縣尉曰。日者獲大盜張三。據供劫得事主家銀四百餘兩。若干錠件。寄頓某村大窩主李老家。希卽帶捕查起贓銀。連窩主李老解質云云。縣尉見係盜劫重情。卽身自查抄。人贓並獲。解交堂翁。令乃塗劉面以墨。衣以囚衣。械繫於堂。呼李老詰之曰。此囚供在某家劫銀四百餘兩。八寶十六件。寄汝家。今所起贓數相符。汝爲盜窩。罪當梟首。據實陳明。勿自膺三木也。李老呼冤曰。此銀實小人之婿劉某寄存者。聞其得自隨官。是否屬實。請拘劉某與張三質之。以明小人之冤。令笑曰。若見劉某。汝又將圖賴矣。李老曰。與其冤誅。莫若明心。召劉某與張三質對。可見小人實不知情。庶望一線生路。奚肯貪財舍命耶。令曰。若然。則劉某在是矣。乃釋其桎。

梏使醜面易服相見。李大慚無詞。令乃給還劉銀。而薄責李曰。余爲留翁婿情也。劉感激涕零而去。李亦從此悔過矣。

相士神斷

正德二年丁卯科鄉試。士子雲集。星卜之流。皆在前門營趁。有相士自命許負管輅之能。凡朝官微服而來。一見卽能指其現居何職。何係出身。歷試無誤。是以就相者衆。帝知之。亦微服在人叢中觀聽。時八月初八日午刻。突一士人吼奔而來。扭結相士曰。汝誤我功名。當與汝性命相博。衆爲排解不開。帝使衛士分之。入問何如此急。急相士曰。是人前數日來問科名。我以今科解元許彼。自不入場。反賴我誤之。真書歎也。士人曰。因汝以元許我。親朋預作賀筵。飲入醉鄉。家人喚醒。入場門已閉矣。豈有場外解元哉。非汝誤我而誰。二人爭執不休。帝曰。毋譁。使有人送渠入場。不得發解。汝認何罰。相士曰。挖我眸子去。帝曰。言出無悔。卽取案上紙筆書條。鈐以身佩小璽。命衛士送去。帝謂相士曰。半月後來驗汝言也。相士知機。唯唯而遁。當衛士送士人至場外。傳鼓稱聖旨降。門官揭封去鎖。內卽傳點開門。偕士人直入至公堂。知貢舉各官跪接。衛士面南宣讀畢。卽去覆命。御史檢卷。恭送士人入號。內外闕傳皇帝送朋友進場。主考亦留心閱

卷見其文亦尙穩妥。與各官公議皆曰。此公既爲當今識拔。不可作第二人。以拂上意。竟中解元。試官覆命時。力獎其文出衆。賀帝得人。帝大笑曰。命也。命也。蓋帝本欲使入場而不取。以難相士。因豹房新得美人。戀色而忘後命。今竟發解。益覺相士可畏。着錦衣衛追尋。杳不知其所之矣。

轉女爲男

姑蘇某富翁。老而無嗣。僅生一女。及笄病篤。醫皆束手。翁不惜重資。聘名醫葉天士診視。笑曰。是非病。肯以若女爲我女。且從我遊。百日後還閣下。以壯健者。非復嬌弱之態矣。如遲疑不決。是君自殺之。死非正命。良可哀也。翁詫曰。誠如是。願以千金送膝下。天士携歸。另潔密室。選婢之美而豔者。使伴如宿。囑曰。此汝姑也。終身依倚在是。順姑無違。稍有拂逆。致增其病。惟汝是問。於是日給藥餌。恒往覲之。見女體漸壯。顏漸舒。與婢情好亦日密。形影相隨。知事已路。遽入其室。迫喝婢曰。汝與姑所作何事。我窺覘洞徹。必盡言之。如敢隱諱。將以刑求。毋自苦。婢視女而泣。女忸怩曰。婢之伴我。翁之嚴命。如違應責。順何罪耶。婢因曰。是主陷奴耳。以郎君僞稱義姑。而使奴與共衾枕。違既不敢。從又獲咎。使奴置身何地。天士大笑曰。已順從姑夫耶。方爲汝喜。豈汝責耶。速女改裝。

去髮而辮。之以藥屏其弓足衣冠履舄。居然美男子。延其父至。告曰。閣下以子爲女。僞疾誑我。使義女伴之。今爲所亂。將如之何。翁愕然不解。所謂乃使小夫婦出。翁顧而大樂。願以婢爲兒婦。與天士結爲姻婭。往來無間云。

按醫經所載。有五不男。名曰天撻。妬變半。任衝不盛。宗筋不成。曰天。值男卽女。值女卽男。曰撻。男根不滿。似有似無。曰妬。半月能男。半月能女。曰變。雖有男根。不能交媾。曰半。此五等人。狀貌血氣。本具男形。惟任以二脈不足。似男而不成。其爲男。爲父母者。誤認作女。年至十六。氣足神旺。陽事興矣。鬱不得發。是以病篤。幸遇名醫。充以妙藥。誘以所欲。自然陽莖突出。不復女矣。

重義輕財

晉人李材。在京師佐典商。歲入俸錢三百緡。有同鄉趙甲者。與相識。無事業。謀欲設雜貨肆。而無資。商於李。慨然以百貫付之。曰。姑以此試。得意後。與吾合業可也。一言爲約。並無文券。亦無人知。未幾。李以疾卒。典主呼其子來。扶襯而返。適趙甲置貨他出。及歸。後知李已卒。爲位哭奠。由此興旺。不十年。業隆數萬。李子家中落。衣食不充。親黨咸勸出外營謀。卜之大吉。適有入都者。相伴而去。至舊典主處。與父執求引荐。有人知趙與

李父故交。今趙業大興。往求之。諒可錄用。挽友往說。趙聞李子來。欣然歎接曰。我因爾父得有今日。我覓子久矣。奈無音耗。今日來投。若有神使。納爲主賬。而不議勞金。李子安於初學。亦不計較。盡心極力。隨同營運。趙見其辛勤刻苦。出入無私。乃顧而樂之曰。子已逾冠。能自成家。應議婚娶。爲嗣續計。李子曰。姪依伯父爲生。尙無進益。何敢娶婦。自取累乎。趙曰。姑緩亦是。但爾旣爲主帳。應將我所有總計之。現存若干。李子唯唯。數日。查畢。現資並貨物合計六萬餘。趙曰。我與子剖之。子應得其半。李子駭曰。伯父何出戲言。姪在此數年。伯父周給衣食。感無旣矣。矧在小郎之列。本不應得勞金。縱伯父憐而恤之。不過年例數十貫錢而已。何若是之多耶。伯父子孫振振。非無人承受者。姪何敢越分敬辭。趙笑曰。子母卻也。我自有法。乃設盛筵。邀其荐主及鄉里長者咸集。李子亦在坐。三杯後。趙謂衆曰。某昔落魄京師。人皆白眼。李故友與我非素交。亦無瓜葛。一言之下。慨然助以百千。不立契券。是誠信我也。我由此起家。而李兄已逝。當時有與吾合業之說。旣有此語。獲利理應均分。我初晤李姪時。本欲表白。恐少不更事。入手揮霍去也。今見其勤儉。能自經營。我何敢負李兄於地下乎。乃出李子所開單目。請諸公作主均分。衆顧李子曰。趙伯世所難得。君有福哉。一窶人頓成富室。我等借酒以賀。李

子曰。諸公且止。聽我一言。趙伯所云並無證據。是明爲義士耳。姪雖年幼。亦不敢取非義財。卽亡父果存百千錢。以遠年債一本一利。取二百貫足矣。多卽非義。何敢自污。趙笑而入。命羣僕以三萬數百金出。曰。今日交清。卸我重肩。惟子所欲。李子取其百金而出。追之遁矣。趙乃邀衆作證。呈報城坊。求坊恩主。有司異其事。行文山右。喚李子至。質明判給。李子曰。吾儕小人。實無功德。不勞而得多金。暴富不祥。故不敢納也。官曰。無己。今某廟久圯。汝其葺之。非功德乎。二人叩謝去。爭出布施。廟觀巍然一新。官易廟號曰。雙義。而須趙甲以額曰。重義輕財。

飛車

魏地山明府語人曰。丙午謁選在都。九月上旬。偶出厚載門鼓樓前。見通衢無數人咸翹首跂足仰望。闕詫異事。因亦隨衆所指處矚目。見半天一物。如舟無楫。如車無輪。長約三四丈。寬約丈餘。蓬蓬然四圍。如有旂幟。距地數十丈。看不甚明。由東北來。盤旋若飛。鳶忽墮下。洋銀十餘人爭拾之。未幾往西南迅逝。小如一葉。又如一星。轉瞬不見。說者曰。此飛車也。夫飛車御風而行。能渡弱水三千。聞諸古而未嘗得見。乃今竟獲目覩。噫。異矣。

蛇妖

撫州九都地方。有真武神師廟。素著靈應。一日示夢廟祝云。有孽蛇來廟借水出海。我恐傷害田廬人民。已擒鎖門外大樹中。汝可於某日取吾劍。邀集鄰近村衆集視。除此妖物。屆期來會者數千人。廟祝向祖師手掣劍。於空樹中牽出一老人。鬚鬢如雪。急揮劍斬之。頭落乃度爲一斗大蛇首。將身挖出。長約數丈。遠近村民無不感恩。遂醮資演劇以謝祖師。

湖市

嘉慶庚午四月。高郵縣西門臨湖石隄傾圮。河帥委員修築。有州署幕友夏友香者。背工役往來隄上。日將暮時。忽見湖中城市宛然。林木繁茂。斷岸一帶。小橋亘之。橋旁有斥堠列柵。車馬咸備。橋上有人持傘蓋作迎風急走勢。而柳陰之下。二驢嚙草於其間。惟時落日沉山。暮霞四起。適當湖中城門闕處。金碧萬道。沿堤水紋如縠。與夕陽相激。宕光怪陸離。不可名狀。城中炊煙縷縷。傑閣嵯峨。浮屠高聳。鐘聲如在耳也。晚風乍起。而所觀城市林木橋亭樓閣者。漸淡漸遠。頃刻盡滅。然已踰數刻矣。嘗聞山東登萊有海市。四川青城錢城有山市。今此處更有湖市。亦奇觀也。

李綠芸

有女李氏綠芸者。世居鹿城。仙根太史之猶女也。少喜讀風鑑書。每爲家人決休咎。多奇中。其家因呼之爲女柳庄。然女亦不肯輕爲人言。有問者輒遜謝之。故人亦未之異也。時仙根以任安徽學政。期滿請假回里省墓。至是將入都。置酒讌客。賓朋畢集。鼓吹競作。絃歌方半。忽風起燭滅。堂中都作鬼嘯聲。主賓盡悸。遂至罷席。家人以爲大凶。競來詢女。女曰。此吉徵也。叔方有陳臬之命。寵任方隆。但自後宜慎之耳。仙根入都。陛見後。果簡授山東臬司。遣人迎眷屬至。任女亦隨往。無何以失察被議。罷官挈家而歸。行及滕縣。處逆旅中。忽遇流寇至。仙根於倉猝間無策走避。遂被難。妻妾爲賊擄去。女獨以匿身牆隅下得免。數日寇去。官民漸集。而女家僅遺一媪。避外得歸。女已不食數日矣。委頓不能興。寓中所携無一存者。計無所出。逆旅主人因爲之報官。官爲之備舍殮。結資斧以歸其柩。女行至中途。舟人窺女美。謀鬻之於富室。因至荒僻處。醉媪以酒縛而懸諸樹。而委其柩於路旁。比曉。行人見之。有好事者爲下之。而釋其縛。時媪猶未醒也。知爲毒所迷。乃以藥解之。良久始能言。詢其所自。備述顛末。踪跡舟所在。則去已遠矣。其地近揚州。距鹿城僅數百里。衆爲之鳴於縣。遣役四出。逾月杳然媪歸。親串中知

其事者無不爲女惋惜。或言昔時仙根家有異兆。果大不祥。乃以爲吉而從之。偕去。死生固有定數矣。媼歸之逾年。洪楊之亂下竄。蘇台旣陷。鹿邑亦墟。時遷徙死亡者無算。甲子春間。官軍克復省垣。居民始得歸田里。安耕鑿。而女忽偕媼而歸。車馬喧闐。行裝烜赫。前後僕從知雲。翌日卽令人購厦一區。大興土木。數月間煥然一新。人咸異之。戚族都往賀問。細詢顛末。女乃緬述所遭。聞者始知女有先幾之見。蓋特遠行以避兵難。先是女爲舟人鬻於秦州蔣翁家。翁固鉅富也。暮年無子。故納小星爲嗣。續計。及一見女。驚其豔絕人寰。而舉止態度迥非小家碧玉。因詢其家世。女備言其故。翁瞿然曰。官室女公子。何堪辱作妾媵。乃認作螟蛉女。使伴其女讀書。翁女小字秋琴。才豔而貌美。可與女並稱二妙。於是爲閨閣良友。凡擘箋作畫。擊鉢聯詩。無不與女偕。里中喧傳爲不櫛才人。世家子爭欲委禽焉。而女意殊少所可。顧時與秋琴商。急欲爲翁謀置副室。一日出遊蕭寺。看浴佛會。偶遇城南見餅師女。密謂秋琴曰。此女大有宜男相。盍以重金致之。秋琴笑問之曰。姊何由識是。女曰。愚姊幼精風鑑之術。頗自謂百不爽一。竊觀義父相應得元宗子三。明年是其時矣。過此而往。恐不易也。秋琴遂爲言之於父。納之後房。逾年一乳而生三子。具有異相。舉家歡慶。共以女爲神。翁喜欲爲女聯姻於仕族。

適有周氏子來求婚。其家固閥閱也。周子以十六歲入府庠。才名甚噪。女請於翁。必欲一見。然後定。翁爲置酒召之。至以簾隔內外。俾女於屏角窺之。旣去。翁使秋琴轉詢之。曰。何如。女粲然曰。此妹婿。非姊婿也。秋琴雙頰微酡。良久乃曰。姊何戲妹之甚也。女曰。事有前因。緣由前定。此月老一線之牽。非愚姊所能主也。愚姊當與妹共歸於一家。妹適其弟。姊嫁其兄。在家可爲姊妹。作婦則爲妯娌。豈不美哉。秋琴以告父。父因問之。則周子固有兄也。但才遜於弟。弱冠猶未青一衿。是以不敢求翁女。翁聞女言。假以餞春爲辭。折簡招其昆仲偕至。而令女密規之。頃之客去。問女曰。此堪稱爲今之雙丁兩到矣。阿兄渾含內蘊。他日所造。不在弟下。翁信其言。遂以女歸周氏長子。而以秋琴許字其弟。女自嫁後。勸婿納粟爲上舍生。往應北闈試。果獲隼。明年聯捷成進士。入詞林。至秋杪。送二女偕至鹿城。居焉。女之歸也。以二親未葬。故遂倩青烏家覓地於洞庭山麓。周生以莫釐山色甚佳。遂卜宅焉。觀綠芸之遇難不驚。可謂奇女子矣。

陸學海

山東陸學海。字川之。濟南世家子也。其父曾爲廣東學政。家素殷富。性尤豪邁。綺羅接席。粉黛盈前。或以奔走供役。或以歌舞娛情。以是陸氏妓樂爲郡中最。乃捐館之後。凡

曾充妾媵者。悉贈之川資。遣歸。一切悉崇儉素。惟愛客好施。孜孜不倦。貧族有告貸者。無不立應。而又不善持家。因之家計日落。然生仍不以爲意。日事誦讀。乃六應秋試。悉不利。偃蹇名場。益復落拓不偶。後李宗師觀風齊魯。得生卷。異之。拔之前列。及延見。乃知爲通家子也。詢知貧况。有意提携之。不意捻匪竄境。居民驚徙一空。僧王統兵追賊。中伏失利。生一時倉猝不及計。子身出走。依於故人家。賊去城空。仍還故里。則屋廬悉燬。村市全墟。大有滄海桑田之感。生無所棲止。乃宿於城北廟中。一日以應試至省。偶然偕友出寓散步。見衆人聚而圍觀。咸嘖嘖讚美。生異之。亦插身入人業中觀之。則一相士方口講指畫。判斷休咎。若燭照數計。絕不作一含糊語。生因偕同試數友。亦前請其剖決。皆言公等悉平平。不過以窮措大老耳。最優者僅得貢成均而已。獨指生曰。此大財星也。奈何以敝衣見我。豈謂賽柳庄無眼珠者乎。數友皆匿笑。以目相視。生曰。予一貧徹骨。行將隨伍子胥乞食吳市矣。君言何謬也。抑與我戲言耶。否則汝之雙瞳。恐爲我抉耳。相士聞言仔細端相曰。吾不誤也。君財運應在今八月中。然宜得於生長之地。第今已初旬。君當速返。自有奇逢也。過此則恐無際遇矣。生對以現將求一科舉。相士曰。此區區者。何足係戀。利至則名自歸矣。君如不信。我當假君旋里之資。他日富貴。

毋相忘也。遂傾囊出十餘金授之。生固辭不受。相士弗顧。委之於地。而轉與他人論相。生友代爲受之。致謝相士而去。生信其言。束裝旋里。則廟中道士方擬至省覓生。見生大喜曰。昨有某提督家眷至。遣人遍訪陸家。指名索君。有人導引至此。聞係與君爲姑姪。現提督家眷已先發。其僕從尙維舟留此。以待生。思父親並無姊妹。卽族中亦不聞以女嫁武員者。躊躇不解。而道士獨慫恿其行。曰。此行必不虛負也。生思相士之言或驗在此。因拚冒昧一往。以觀其何如。乃出相士所贈之金。購置衣履。煥然一新。偕道士諧僕舟。隨僕前往。則提督卽出延見。禮貌優異。居然待以內侄禮。及入內堂見姑。則珠圍翠繞。環佩鏗鏘。一三十六七之麗人也。雖絕不相識。而賜坐殷勤。絮問家常。似甚稔悉。生支吾應對。莫測所自。茫然而出。居兩月餘。供給豐腆。款待殷渥。提督欲委以事。生辭曰。山居之人。惟解書史。此外弗敢預聞也。提督因贈以五百金。而令之歸。置酒餞別。囑曰。嗣後無事。可以常來。至戚相關。無疏外也。生唯唯。宴罷歸寢。啞然自笑曰。此卽相士之所謂財運臨時也。方欲解衣就榻。忽聞剝啄聲。啓扉視之。則小婢奉夫人命見召。生隨入謁。夫人忽屏人語曰。君識我乎。我卽汝父侍兒翠翹也。蒙君資遣之後。嫁一軍校。屢隨大帥出戰。積功洊至今職。感念舊恩。每不能忘。今以江浙底定。告假歸里。故迂

道來訪。冀一報君德耳。聞君舊廬已燬。墓址蹤跡。當可辨認。園西魚池旁。汝父在時。埋有三十萬金。今必無恙。此事惟我獨知。君歸可掘取之。足以成家矣。生起拜謝。歸如其言。尋掘果得金如數。因鳩工庀材。就地建築。不數月。立還舊觀。頓成富室。因至省往訪相士。報以十金。竟認翠翹爲姑。以姪禮自居。往來如姻婭云。

菊隱山莊

常州吳秀才。學問優長。性情豪爽。名下士罕其匹也。然顛躓名場。屢試不售。年三十餘。猶困諸生。因避亂徙居海上。爲入幕賓。館穀所入。不足供日用。無何。居停以憂去官。益無聊賴。時值寇警頻仍。吳無力遷徙。聽之而已。旋吳妻又以弱症卒。憤懣寡歡。遂擬出外遍遊。以抒鬱結。適姊婿曹荔江得官。分發豫省知縣。覓襄佐筆墨者。因偕之同往。既至。怵需次省垣。久未得缺。曹亦貧士。旅費不充。吳懼以口腹爲戚。累乃寄榻僧寺。爲擘窠大字。代書門榜。糊口之外。略有所贏。一日有峨冠博帶者數人。游戲佛殿。見生所書。大奇之。曰。筆法勁挺。真逼山谷矣。問出何人手筆。僧曰。此毗陵吳秀才所書。現在寺中。其人名下士也。諸檀越願一見之乎。皆曰。幸甚。僧遂導之。入室識面。彼此恨晚。繼詢家世。內一人曰。子山先生。係令祖。是予通家同輩行也。如蒙不棄。寒舍距此不遠。明日

當遣小价控蹇。驢奉屈。幸君勿却。生但唯唯。遜謝而已。明日果有二僕控雙衛至。名刺書通家弟唐鈞。生促生卽發。生遂易冠服。命僕爲導。旣出郭。斜趨山徑。途漸荒涼。人迹絕少。行久之。萬峯攢聳。溪澗迴環。似非塵世所居者。心竊懷疑。勒馬停轡。躊躇不進。僕前白曰。此主人之別墅。但轉山坡卽至矣。未數武。果見山麓隱隱有屋廬。林樹濃密。葱翠撲人。旣近。則廣院連牆。巍然甲第。院門之額。大書菊隱山莊。生未升堂。則昨日之人已拱立階際。相見歡然。握手並入。禮意優隆。卽刻肆筵設席。水陸畢陳。酒罷。偕吳入東軒。指謂吳曰。此榻專爲君下。不嫌簡褻。暫息此間。俟貴戚補缺後。歸亦未晚。自此吳一往旬餘。享用豐腆。軼於王侯。軒中琴書筆硯。並皆精雅。一夕飯餘無事。月色如銀。獨坐撫琴。爲操一曲。聲韻清亮。迥異凡音。心甚快悅。因此每夕一彈。率以爲常。而窓間似有人影幢幢。逾刻始去。意是僮僕之來潛聽者。初不甚異。居數月。天氣漸炎。生道暑。一小亭中。鋪簟當風。涼飈颯至。被襟當之。曰。快哉此風。正欲睡去。忽聞琴聲疊發。側耳聆之。絕似平日所操者。因躡足尋聲而往。則亭左有一大石當前。上刻峰迴路轉四字。甫過石畔。空明朗暢。覺別有一洞天。紅欄白石。曲徑通幽。徑盡一澗。界之。度以板橋。橋隔澗一舍。晶窓四敞。綠簾下垂。琴聲正自此出。生揭簾而入。則一麗人。年約十七八許。高髻

淡粧焚香危坐。正在調絃弄軫。見生至。赧然推琴而起。却立不語。生知爲內室。斂步急退。而主人已自屏後出。揖生曰。誼鬪通家。何妨相見。因指女謂生曰。此舍妹。酷嗜琴理。幸指教之。女卽檢衽作禮。生因爲略撫數曲而退。翌日。生臥未起。有主人之友來訪。正欲着衣出迓。而其友已在床前。笑謂曰。今日早至。特來相賀。唐君有一女弟。四德俱優。願備箕箒。挽弟執柯。此主人之雅意也。君其勿辭。生聞之。喜極不能置一語。卽解所佩玉藕爲聘。曰。藕者耦也。以志喜耦之義。其友携去。後主人卽爲之消吉成禮。伉儷之間。恩愛異常。居年餘。吳生擬出山訪其戚商之於女。欲與偕去。女亦樂從。主人乃以油碧車送之。經三四日。始達城中。曹君已得選他去矣。乃賃屋暫住。女出奩資經理食用。頗得溫飽。後生再往山中。竟不得其處。歸詢之。女微笑不答。生亦不窮詰。遂偕女旋里。同回吳下。歌偕老之章。而絕無所異也。

魯澄軒

魯生澄軒。山東蓬萊縣人也。瀟灑豪俠。讀書日數行。下弱冠補博士弟子員。以應北闕試。寓京師宣武門內。於京中諸執袴習。概無所染。人以其少年老成。羣目爲遠大之器。一日偶至眞武觀前散步。見衆人圍聚一處。觀者皆交口讚曰。真好鐵口。賽半仙矣。心


異焉。亦入人叢中薄觀之。則一術士疎髯古貌。方據案與人談休咎。判決如流。瞥見生。卽揖之曰。子今秋孝廉。明春翰苑也。惜年壽不永耳。予得異人秘授。別具妙訣。非徒表柳庄一流可比。子勿以予爲妄談也。生因請畢其說。術士約以明日可來。當有以授子。翌日生如期至。術士與以密函。數封皆重疊緘固。上悉記某月日。可以啓視。戒以未至其時。切勿輕啓。恐干天譴。是秋生試獲售。報到之後。始啓第一函。則題目名次。主考房師。一一吻合。因嘆爲奇。轉慮促齡之說有驗。故不以爲喜。而反以爲憂。雖賀者盈門。而酬對之間。神情頗爲淡寞。戚友怪詰之。以術士所占對。戚族中有鄭補秋者。亦豪士也。聞之大笑曰。吾以子爲達人。乃亦一迂拙士也。相由心造。一切窮通壽夭。當在自爲之。豈區區骨格部位之所能限哉。術士相子。當聯捷。何如不試而歸。以窮其術。生曰。此言是也。乃始開顏爲笑。命治酒肴相對。痛飲。九月杪。竟從鄭言。束裝而歸。至家則父正當臥病。延醫問卜。日罔見効。生侍奉湯藥。衣不解帶。眠不合睫者浹月。而其症益劇。正無所爲計。忽憶術士贈函。急開笥檢閱。則第一函正當十一月中旬所啓者。內云。尊父病重。可服石膏湯自愈。如言投之。三日後。病已霍然。一家皆服術士之神。其父因謂之曰。功名固由分定。而修短亦數也。吾老矣。急欲睹汝成名。明歲春闈。不可不去。顯親揚名。

即謂之孝。及吾之未死，目見汝之扶搖直上，致身青雲，較五鼎之奉，尤快也。生迫於父命，不得不行，策蹇就道，步步悽惻。一日午後，以雨不能攢程，宿於逆旅，聞有哭聲，甚慘。詢之於人，則姑鬻婦者也。生意鬻媳，則其子必死，今哀痛如此，其必貞節自矢者矣。惻然憐之，因細詢顛末。逆旅主人曰：非也。其夫尚在，因逋負官糧，禁之狴犴，追比甚酷，而家中實無所有，計惟鬻媳，則可以出子。頃已有山西賈來端相，媳故有姿，極爲合意，業許之。百金已付定矣。此婦以鸞鳳分離，故哭殊哀也。生默念生命不長，此阿堵物亦復何用。況家中非不充裕者，卽入內啓篋，取三百金，納諸袖，命寓主引至縣前，代其人完納糧餉，并以門包饋閹人，立刻釋歸。生卽招其人至寓，付以所餘百金，曰：以此爲作小經紀，歸返山西，賈之定金，勿與較也。其人感激出涕，叩頭如搗蒜，生促之立去。整裝遣發，至京應試，榜發竟不得售。啓術士函觀之，全然不驗，悻悻而返。後生以大挑，就知縣分發江南，以積軍功，仕至道員，與術士所定無一同者。以是知人定勝天，造化可以挽回也。

汪百萬

汪氏者，蘇州之巨族也。蓄貲饒裕，吳人皆呼爲汪百萬。其族中有一家，僅屬小康，屋宇

亦不甚宏敞。當粵匪竄陷。倉皇出遁。室中無一物可携。惟將祖傳古銅鼎彝諸器。瘞於室後菜圃中。賊退歸家。見所居無恙。喜甚。旋即携家入處。顧手埋銅器之僕。已病死於外。家中人無有知其處者。越一年春杪。汪某偶督傭人至園鋤地。播種瓜蔬。忽覺鋤下甚堅。則有石板爲阻。以告汪某。汪某歡躍曰。此吾所瘞古器也。覓之不得。今在是矣。因命傭人墾土發石。則首一層皆係杯罍壺碟。鏤刻精細。持之甚重。磨去沔蹟。粲然黃金也。不覺驚喜過望。復檢閱第二層。纍纍然黃白物也。盡行搬取入內。陳之几上。約有數十萬金。第三層乃已之鼎彝古器。點之皆在。未失一物。於是厚賞傭人。然汪某雖暴得巨金。而不解其所自來。或擾攘之際。富人避亂其居。即以所携之物瘞之歟。或粵匪渠魁所埋歟。均未可知也。今諸汪自經亂後。而此族遂首數及之。



中華民國三年四月印刷
中華民國三年五月出版

版權所有
翻印必究

編輯者

海上醉花生琴珊氏述

印刷所

震華印刷所

發行所

文明進行社

發行所

茂記書莊

分售處

各大書局

總發行所

上海新東北門
老街江東里

江東書局

聞見述奇

定價大洋四角

馮輯 民國經世論說文集廣告

去歲二次革命蹂躪數省禍及全國至今元氣凋殘瘡痍未復言者痛心聞者疾首前任湖北施鶴安撫使馮君仁侗素抱國家主義不偏黨見爰就京津滬漢各報選取議論之正大者彙集成書計得論說百篇附以雜誌餘錄等都十餘萬言其中關於中央平亂規畫兩軍攻戰情形以及各省獨立之真象人民被禍之慘狀均經窮源竟委闡發無餘洵爲經世秘鑰凡屬政商軍學各界亟宜人手一編以資參考書印無多購者從速每部洋裝一巨册定價

洋二元

總發行 上海江東書局寄售處各省大書局

最新名花尺牘預告

二十年前坊間曾刊有海上名花尺牘一書爲元和臥讀生所輯頗受社會歡迎顧篇中所集者皆駢四驪六之文以詞藻華美爲能事而於言情之本旨反覺膚泛不切閱者憾之本局有鑒於此特倩高君浣紅蒐求近日花界酬酢之文選擇情致纏綿悱惻動人者彙爲一篇命之曰最新名花尺牘現已付印准於月內出版凡屬墜鞭公子走馬王孫均宜人手一編藉作言情之導師也總發行所上海新北門江東局特色錄后

一是篇散體駢文兼羅並收故筆意暢達能曲繪相思之苦較諸坊本以詞藻見長轉失作書之本旨者有天淵之別特色一

一坊間所刊名花尺牘大率皆敷衍成文毫無事實而是篇所輯事實居其多數使身與其間者讀之將舊事重提即非身與其列者亦可添其興趣特色二

一是篇遇有事跡離奇可作傳記者每增入按語一段敘其顛末既可作尺牘觀又可作閒書讀且能爲小說家添其資料特色三

一是篇筆墨力求雅馴而不尙深奧俾使雅俗共賞至印刷精良定價低廉猶其餘事特色四

精裝四冊一函

中華商業進行新尺牘

定價實洋六角

是書編集商界往來各手續凡關於商界進行事宜舉如振興商業擴張商務達商情通商意商界所應有事靡不畢集為商界後學牖啟商務知識字體高超足資摩仿凡為商界誠不可不備

精裝四冊一函

中華普通分類新尺牘句解

定價實洋六角

尺牘句解久已風行海內為世界歡迎乃時移世易文事變遷不得不花樣翻新以適時宜是書體例聿新解釋詳明實足為輸入文明知識之一助較諸舊本迥不相侔新學同胞誠不可不備

精裝四冊一函

和國民分類新寫信必讀

定價實洋六角

尺牘一門為人生所最不可少無論政學工商各界相問訊相慶吊寸心千里莫不以魚書一紙是賴是書凡有社會宗旨無不莊諧並列音註分明為共和世界寫信必讀之書敬告同胞誠不可不備

精裝四冊一函

中華速成淺近易學函稿

定價實洋六角

是編蒐羅世界公民交際各函稿選擇淺近易學者編訂成書言簡意賅俗不傷雅為白話尺牘中別開生面洵足牖啟智慧乃初學者之特色階梯也字體正草咸備凡在初學誠不可不備